

大覺普濟能仁玉琳琇國師語錄

嗣法門人行岳編



清刻龍藏佛說法變相圖

大覺普濟能仁玉琳琇國師語錄目錄 幾一

卷第一

上堂 一

卷第二

上堂 二

示眾 幾一

卷第三

小叅 一

卷第四

小叅 二

卷第五

法語

客問

機緣

卷第六

機緣二
頌古
書問
像讚
卷第七
詩偈
佛事
雜著
塔銘

大覺普濟能仁玉琳琇國師語錄卷第一

嗣法門人行岳編

上堂一

順治十六年己亥閏三月初一日萬善殿
奉

御旨上堂師至座前召衆云會麼若也會得
山僧未離江南陞座說法已竟如或未然
看向第二門頭施展去也便登座拈香云
此一瓣香親受靈山記荊炳向爐中祝嚴
佛心天子成等正覺次拈香云此一瓣香華

藏海會早已敷宣炳向爐中祝嚴

佛母太后百福具備保助

皇躬大揚法化上首白椎竟問百福叢中選
佛場海衆側聆求法要如何是賓中賓師
云一盞千家飯進云箇中好消息剎剎塵

幾一

二

塵現如何是賓中主師云青目覩人少進
云一人有慶兆民賴之如何是主中賓師
云庭前古栢蔭人天進云天高羣象正海
濶百川朝如何是主中主師云當堂不正
坐進云賓主歷然承指示當陽一句又如

何師打云有功者賞問仁皇好道啓大會
於重元祖令當行建法幢於今日從上宗
猷如何展演師云進前來與汝道進云金
輪頂上無生曲唱徹皇都調更新師云一
句聳人進云恁麼則萬善殿中爲雨露五

幾一

三

龍亭上起清風師云共願如是進云只如
仰答聖明一句又作麼生道師云天台華
頂萬年藤報德酬恩心鐵石問即今萬善
堂中頂禮萬佛寶號但知其名未審居何
國土師云上座醉那進云某甲則不然師

便打僧喝師又打進云不勞重舉師復打問如何是十方薄伽梵師云處處撞着進云如何是一路涅槃門師云看脚下進云如何是選佛場師云棒頭有眼明如日進云如何是心空及第歸師便打進云怎麼則天上有星皆拱北人間無水不朝東師又打問五祖門下有一神秀大師因什麼不得衣盜師云爲他通身是佛法進云盧行者因什麼却得衣盜師云爲他不會禪道進云怎麼可謂伶俐不妨隨處有癡愚端的世間稀師便打是日名德頗多師復左右顧眎云世尊拈花迦葉微笑百萬人天次第成佛

聖駕儼臨命登萬善寶座揭露正法眼藏涅槃妙心作家禪侶盡出相見還更有麼乃

云九年面壁計較未成立雪齊腰苦勞徒爾三拜依位立可知禮也懺罪解縛鞭影高飛無性性空松風聒耳本無一物追金琢玉兩枝嫩桂五葉芬敷異口同音千山一月乃至笑巖老祖挺生神京建立臨濟宗旨禹門浪濶突兀孤危事是怎麼事人須怎麼人但得怎麼人何愁怎麼事且道如何是怎麼事舉袈裟云如天普蓋似地普擎好風齊着力盡向此中吹

上堂上首白椎竟問仙客乘雲泛紫畿欣逢聖主話玄微五旬金殿垂恩重又許扁舟渡雪谿未審其中祕密還得大家知也無師云天高地厚進云雷音已震青霄外四海咸聞第一機師云日光月華問當今天子聖明君隆興三寶剔禪燈特請和尚

登寶座御駕親臨轉法輪如何是轉法輪
師云山僧慚愧進云本來大道無言說未
審如何又有言師云聖恩難報進云一顆
明珠在海中光焰虛空作慧燈師卓拄杖
云念汝老實問舌無十字關脚斷五色線

卷一

四

請問和尚如何是舌頭上無十字關師云
恁麼的人來與他茶喫進云如何是脚跟
下斷五色線師云恁麼的人來教他地下
坐著進云打破十字關掃斷五色線師打
云你替他各喫三十棒乃云釋迦文佛降
生之月朔旦良辰奉

旨重陞寶座舉揚大法通瑒打點此佛法出
來供養大眾及乎陞到座上觀諸大眾通
身是法一一毛孔出無量口一一口出無
量音聲一一音聲宣無量妙義人人爾法

卷一

五

法爾盈虛空徧法界無有一毫虧欠處無
有一毫空缺處通瑒更作麼擔水河頭賣
直如河伯見海若恍然自失耳伏惟大眾
各自珍重下座

己亥春詔迎入京命住西苑

世祖問心在七處不在七處師云覓心了不
可得

世祖問悟道的人還有喜怒哀樂也無師云
喚什麼作喜怒哀樂

世祖問山河大地從妄念而生妄念若息山
河大地還有也無師云如人睡醒夢中之
事是有是無

世祖問如何用工師云端拱無爲

世祖問如何是大師云光被四表格于上下
世祖問本來面目如何泰師云如六祖所言

叅云六祖如何說師云祖言不思善不思惡正恁麼時如何是本來面目

世祖問思善思惡時如何師云好善但好善惡惡但惡惡正好善惡惡時即叅者好善惡惡的是箇什麼所謂要一切處叅第一

要動裏叅動中得力靜中愈勝古人所謂從緣薦得相應捷也

世祖退命近侍傳語云恨相見之晚

庚子秋

世祖馬上有省連

詔敦請至京

世祖就見西苑丈室相視而笑日窮元奧

世祖見一矮戒子指問師師云長者長法身短者短法身

世祖喜謝

奉

旨進頌

深殿焚香永心齋笑坐忘大圓鏡智淨應物妙無方

又

慈幃色養適侍坐快談玄法界塵塵佛同光照大千

雨夜奉

旨書

僧問趙州如何得不蹉路州云識自本心

見自本性即不蹉路

心同虛空界示等虛空法證得虛空時無是無非法且道虛空作麼生證

心隨萬境轉轉處實能幽隨流認得性無喜亦無憂見聞覺知是流且道性作麼生

認

一念不生全體現六根繞動被雲遮且道全體現時如何畧約不是趙州橋明月清風安可比

世祖賓天拈香

師云報身如夢幻世界若空華唯過量大人去來無礙進如意云此是

皇上生生用不盡的現前大衆專精持念究竟堅固大陀羅尼執事舉楞嚴大悲藥師往生等神咒並遶誦普門大士名懺悔發願回向

元旦上堂問答不錄師云追金琢玉繡口文心自有當行作者轉身掉臂努目撐眉一任逞俊禪流兩眼對兩眼真金不博輸未舉先知早已屬二屬三當陽薦取豈止

落七落八諸佛不出世祖師不西來目前無闍黎此間無老僧但有言說都無實義擲拂子云踏着故鄉田地客人人鼓腹樂昇平下座

端陽上堂白椎竟舉天龍爲玄沙侍者侍沙山行遇虎龍曰和尚虎沙云是汝虎師召衆云衲僧行處如火消冰萬法本閒惟人自開六祖大師云非風旛動仁者心動將謂說心性禪承言者喪滯句者迷舍多尊者云非風鈴鳴我心鳴耳多少人面牆而立心復誰乎俱寂靜故大衆還會麼一物寂靜多物寂靜一身寂靜多身寂靜一世界寂靜多世界寂靜先師天隱老和尚如是龍池幻翁老和尚如是濟宗上下諸祖如是東土二三西天四七如是卓拄杖

云柱杖如是山僧如是大衆如是顧左右
云堂中喫糗子如是下座

幻有大和尚誕日設供師指真云兀坐嘴
盧都教人沒奈何箇老漢慣得其便者裏
透得過的如龍得水似虎靠山有意氣時
添意氣不風流處也風流而今大明國裏
稱爲師翁後裔者不啻百十萬億究竟得
大機顯大用堪爲的骨兒孫者能有幾人
某上座初閱龍池語錄見師翁云世間多
少不平之輩務要別尋一箇人與我老釋
迦比勝負較優劣還知我釋迦如來是何
等一箇面目麼某上座便於此喪身失命
將謂師翁面目只如是後來呈似先師和
尚受他許多惡辣鉗錘方知見與翁齊減
翁半德見過於翁方堪嗣續從此脚跟下

自解作活計雖與師翁同條生不與師翁
同條死師翁善爲隱語云人還知我釋迦
如來是何等一箇面目令其小瞎禿最初
祇見師翁殺人刀未見師翁活人劍今日
某上座不妨顯示令見者聞者知我祖師
門下亦有殺人刀亦有活人劍顧視左右
云若有問如何是我師翁真面目拈香云
急著眼

佛誕度僧上堂師云報恩新長老今年纔
廿四黃面老瞿曇是吾最小子古往今來
多少居曲彙牀的大善知識凡於四月八
日播弄瞿曇小老的矢臭氣則有分還曾
夢見瞿曇的師麼若向者裏緇素得則不
論鬚髮不鬚髮不虛親到報恩來若者裏
緇素不得直饒新報恩親手爲他剗草也

未免對面白雲千萬里驚喝一喝下座

秋中行化上堂師拈拄杖召衆云終日與山僧同居共處還識得山僧立地處也未時常見山僧搖唇鼓舌還會得山僧真實相爲處也未若識得山僧立地處則於此深山窮谷卧月披雲却在十字街頭拖泥帶水而十字街頭拖泥帶水却在此深山窮谷卧月披雲若識得山僧真實相爲處則與大衆耳提面命却千里萬里而千里萬里未嘗不與大衆耳提面命還會麼卓拄杖云頂上一輪滿清光何處無

元旦上堂衆問話畢師乃云叅禪流聽我說此事非常休倉卒登山須到絕頂頭入水須至最深窟乾坤寬廣實難知滄海淵深豈易識不識不知且止透頂透底一句

作麼生道草樹盡非前度色藍田日暖玉生光

便舟化主領崑山衆居士請上堂師顧左右云毀形易服作世外之士直須不惜身命饑寒困苦置之度外顯究大事圖報佛恩所以古德示衆云夫既出家如囚脫獄於佛法中萬死一生更莫棄捨蓋慮後學遇境界艱難一時打不過故爾苦口叮嚀殊不知清苦僧家本分不獨今時如此自古皆然昔日大愚芝和尚常住澹薄想與報恩差不多而芝老和尚窮酸直是窮酸到底幾株宿菜也不令人好喫嘗上堂云大家相聚喫葷菜喚作一葷葷入地獄如箭射報恩者裏雖云澹薄然山僧素願有食有法令衆安止近因饑饉安衆無方直

是食不下咽坐卧不寧幸有化主發心在外漸領信心檀越入山且不要學他古人見識度量與麼小口門與麼窄大家相聚在此澹薄時澹薄喫齋時喫齋喚作喫齋我等與施主皆共成佛道問如何是函蓋

集一

十

乾坤句師云滿院梅花香噴鼻進云如何是截斷衆流句師云近日厨房幾斷烟進云如何是隨波逐浪句師云禮拜著復舉雲竇禪師云客從遠方來贈我徑寸璧中有四個字字字無人識報恩亦有一偈化主崑山歸獻我數塊石通身渾是口有眼誰不識下座

行化過清谿明道蔡封翁就開封寺請上堂師云本是真實人共譚真實話欲明真實事須辦真實心會中辦心真實的出來

集二

十一

互相酬唱問臨濟問黃檗佛法大意黃檗便打某甲問和尚佛法大意和尚如何師云化長生米師迺云佛祖出世爲一大事因緣人人悟自妙心得自寶藏虛空不足以喻其久宇宙不足以喻其寬岱嶽未可

以爲高滄海未可以爲深取之不竭用之無窮明道老居士深受靈山付囑欲爲有情揭開迷封悟自妙心得自寶藏特重建此開封古刹玉琳道人到來特爲舉揚薦召衆云我不輕於大衆大衆皆當作佛下座蔡居士作禮云弟子每對神佛前發願護持蔡鐸正念禁止蔡鐸邪思惟願臨欲命終時淨除一切諸障礙等是否師云即此誓願真實皆成佛道士再禮謝誕日上堂衆僧問話畢師乃云白雲千頃

老屋數間一榻高眠令土木瓦石爲大眾轉大法輪者是先師和尚向日家風唐存翁合諸檀越建大禪堂十方聚會應時及節請山僧說法者是新報恩今日行履且道先和尚向日家風是新報恩今日行履

是豎拄杖云若也會得釋迦不在前彌勒不在後大眾與諸佛同證一相三昧山僧與大眾壽量無殊若也不會父少而子老舉世所不信擲拄杖下座

出坡上堂問歲將終期已半當人脚下事請師相爲師云三十棒一棒也較不得師乃云報恩寺裏禪盡在衲僧邊搬柴及運土終日擔橫肩下座

上堂師云馬祖道一口吸盡西江水慈悲之故而有落草之譚世尊道十方虛空生

汝心中猶如片雲點太清裏與麼會得正好捉來朝打三千暮打八百有般漢迷頭認影棄本逐末以守箇昭昭靈靈爲悟主人公把舉足動步搖唇鼓舌的爲常住心體認六塵緣影爲自心相譬如病眼見空中華及第二月百千澄清大海葉之惟認一浮漚迷中倍人佛所深愍世尊又示阿難云如汝今者承聽我法此則因聲而有分別縱離一切見聞覺知內守幽閒猶爲法塵分別影事今時外道好笑殺人既以曉得走路問話的爲悟自心更以識神空主人公也不可得爲末後無疑誰知數千年前盡被世尊痛呵明叱有如斯舉凡學者可弗見不善如探湯猛看破浮幻身心向一念未生前當下證得廣大心體連證

之一字亦不可得便識得一切佛祖廣大
心體方可出生出死方可入死入生事是
恁麼事人須恁麼人苟不如斯生死到來
便驗真僞復舉古德云毫釐有差天地懸
隔師驀豎如意召大衆云還會麼良久擲
如意云萬古碧潭空界月再三撈攬始應
知

卷二

十三

元旦上堂師云有一句子河沙刹土三世
諸佛不能說西乾東震歷代祖師不能說
天下善知識不能說先師和尚亦未曾說
某上座今日既居此位爲衆分明舉似也
元正啓祚萬象咸亨下座

燈節上堂師舉杖示衆云我見燈明佛本
光瑞如此衆仰視師擲拄杖下座
行化上堂師云西天佛祖多行化而不興

道場東土知識多興道場而不行化雖是
殊方合天仔細簡點將來也是各守一隅
不善通變新報恩則不然興道場不妨隨
時行化隨時行化原爲興道場且道新報
恩是什麼人有恁麼力量惟憑一點報恩
心身命全將奉塵刹拈杖竟行

鄉友臨訪上堂舉僧問雲門大師云如何
是諸佛出身處門云東山水上行又有人
問龍池幻有師翁云如何是諸佛出身處
翁云西河火裏坐師云某上座則不然今
日若有問如何是諸佛出身處但向道我
是蓉城楊四郎下座

上堂白椎云法筵龍象衆當觀第一義師
拈拄杖云第一第二熱盃鳴聲龍象之衆
莫如是觀具得臨濟小厮兒眼的出來與

報恩拄杖子相見有麼良久云當今之世頗多唱導之師到處聚三百五百商量佛法浩浩地不論自己誕日與他人生辰便唱無生曲調聲震寰區新報恩不是時流爲甚檀越弟兄也攀條例各與三十棒趁

卷二

十四

出三門外還怪得也無然而事無一向既承設齋辦供請陞此座不妨吐露古今人所夢不見說不到的祕密法門去也且道如何是人所夢不見說不到的眉毛生眼上鼻孔長口邊擲拄杖下座

上堂師云從上來真實爲法者不論院之大小衆之寡多無時無處肯置此事所以有同居止四五人而亦上堂入室小參示衆宛然如領千衆一些不肯苟簡更有行脚僧無一個而亦開爐結制令一力搥鼓

與十八緘口大士互相躊唱甚至有一力也無豎石爲徒與之說法今報恩者裏共住常有百十人又非邠汾苦寒迺罷晚叅不恒陞座難免少叢林之號然而某上座內省不疚未嘗孤負於人今日借六湛不二師鼻孔出氣要令大衆一處通則千處萬處一齊通一節了則千節萬節一齊了顧左右云各各落堂喫齋下座

卷二

十五

聲谷師請上堂師拈杖云叢林安好先師說法竟大衆還會麼堂中勝他趙州第一座也有第二座也有庫司得人廚房安帖內外苦行無不忻然某更說個末後句擊香案云莫動着動着則三十棒下座六月十九上堂師以杖擊案僧出師云敲波驚鯨鯢驚出個蝦蟆僧擬議師便打師

迺云先師開法磬山飛錫烏峯及住此報恩數十年如大富長者打開寶藏拯濟貧乏奇珍異寶靡不悉具隨人知見隨人力量一任取足得先師重器者固是知恩不少即得先師根折釵脚的也道見過磬山和尚曾受益來蓋先師天覆地載海納山容之量自然如此而某上座雖是他兒孫撐立他法門卻迥不相似一雙窮相手兩個鬼眼睛握根拄杖莫道者裏無一物與人直饒他處得奇珍異寶而來也與他徹底掀翻一棒打死直須未跨嶺門便識得某上座爲人處若來此仰觀進益那有語話分說到此香爐蹕跳起來云和尚與麼道則觀音菩薩於是日從耳根證圓通亦從門而入不是家珍師復擊案云洎放過

者個不唧溜漢擲拄杖下座
叔芳居士請上堂師至灤座前居士呈祖衣師云佛制比丘著壞色服用瓦鐵鉢當初宋朝仁祖作殊勝福業特賜瑪瑙鉢與大覺璉禪師大覺老人感君厚德說真實義爲使者言此鉢不合佛制因對衆焚之仁祖聞之大喜正所謂打鼓弄琵琶相逢兩會家然而丈夫志氣衝天豈可踐人剩迹今日叔芳居士作如意佛事施紅羅大衣報恩又且如何施設豁人正目不附合古今迺舉衣搭云金剛正體昭然著喚作袈裟被眼瞞搭衣畢召大衆云高著眼有意氣時添意氣看他高步上頭關便陞座西堂白椎云法筵龍象衆當觀第一義師云直饒無憂樹下石脇降生九龍噴水沐

其軀地湧金蓮而捧足一手指天一手指地現大人相周行七步作獅子吼曰天上天下惟吾獨尊與麼播弄早落第二更說其麼拈華微笑直指單傳至於衆生前生後非止錯七錯八直是被入捺在矢窖中

卷一

十六

稍知氣息的豈甘與麼現前大衆都是英靈男子奇特丈夫有解觀第一義的麼問四月初八釋迦降生八月初一沈居士初度是同是別師云識取居士與你道師卓柱杖云一向舉揚大法直教一個個荷包遙遁何故各人閨閣中物甚難放捨到者裏不是其人識甚好惡果向報恩拄杖頭知得落處卻如作大檀那把平日所愛惜所寶重的物傾心布施而亦不作布施之想然後却令幽谷現瑞枯木放華展淨名

卷二

十七

手截取妙喜世界如轉陶家輪滿盛香飯普供一切珍衣妙供集而爲雲結而爲蓋奇香異燭一一同妙高聚論其壽福非算數譬喻之所能及論其智慧非心思意解之所能測延片時爲長劫貫一念於萬年有如是力量有如是神用濟世也生成萬物同地同天出世也扶豎綱宗超佛越祖殊勝中現殊勝奇特中顯奇特豈不慶快平生衲僧家若不如是非但難作人天福田受檀那供養未免轉見笑檀那到者裏有人出來道今日沈居士四十大誕與和尚賓主交參財法二施等無差別更有末後句望和尚一齊布施卻師以拄杖畫一畫云小長老八字打開大施門去也驀喝一喝下座

祈遠唐居士京中回請上堂白椎竟師拈拂子云留書別我去半載而有餘今日重到來聞見共歡愉先師穩坐暗解頤囑託得人何所虞更要玉琳小阿師當陽指示第一義憶昔梁王著有爲初遇達磨殊不

契羨君般若宿因深轉展不忘此大事舉拂子云顯爲此大事也則布施亦是第一義持戒亦是第一義念佛亦是第一義放生戒殺亦是第一義齋僧建造亦是第一義喚甚麼作人天小果有漏之因若不爲此大事則布施祇是布施持戒祇是持戒念佛祇是念佛放生戒殺祇是放生戒殺齋僧建造祇是齋僧建造未明正法眼藏焉得涅槃妙心唐居士問惟憑一點報恩心身命全將奉塵刹還許學人發此心麼

師云許進云既發心矣如何奉行師云善始善終大衆競出問話師以拂子畫一畫云有問有答總落今時說迷說悟盡涉程途且不涉程途一句作麼生道歸家盡是兒孫事祖父從來不出門下座

上堂師拈拄杖云新報恩拄杖子有時踣跳梵天有時翱翔大地有時立辯龍蛇有時千眼難觀且道作麼生與報恩拄杖子相見以拄杖旋風打散

行化上堂師云六祖大師云無相爲體無

幾一

十八

念爲宗無住爲本者三句中有一句如千雷並吼千日並照有縱有奪有殺有活若人會得許你雙眼圓明後來白雲端禪師有一偈云他人住處我不住他人行處我不行不是與人難共合大都縑素要分明

只者一偈不虛爲祖師之後今日新報恩
亦有一偈說似大衆他人難住我獨住他
人難行我獨行不是生平多力量祇緣深
受我師恩且報恩功圓一句作麼生道待
行化回更與大衆吐露

卷一

十九

過烏戌祈遠唐居士就石佛寺請上堂師
拈拄杖云奇特因緣須奇特人拈出驚羣
句子於驚羣處舉揚今日既遇奇特人有
奇特緣真是驚羣處且道驚羣句作麼生
舉驀召大衆云吳中石佛大復舉僧問龍
池師翁云如何是如來禪師翁豎起拳如
何是祖師禪師翁豎起拳如來禪與祖師
禪是同是別師翁復豎拳云不是拳頭便
是巴掌今日設有問新報恩如何是如來
禪以杖指前云前邊是三門如何是祖師

禪以杖指殿云中間是佛殿如來禪與祖
師禪是同是別但向他道明眼人難瞞伏
惟僧俗衆知識久立珍重下座
唐存翁總憲及顧長白唐遠生顧英甫顧
晉徵唐聲伯等衆居士啓請爲古山寺伽
藍神說戒上堂時設神位於座下師先對
神云索靖明王你久作我家裏人我今與
你說家裏話迺爲說三歸五戒說戒畢師
云既受淨戒方可借座燈王爲汝揭露本
因迺陞座師拈拂子云大衆當知此索靖
明王數千年前早受靈山記別今日於古
山門下受其上座戒法統同眷屬侍從并
供獻所殺衆生齊成正覺斯會檀護悉乘
願輪保安人物迺以拂子擊案云但願天
風齊着力一時吹入此門來

密印寺衆請上堂師拈拄杖顧視左右云
大衆我今分明示汝汝等本來是佛卓柱
杖下座

歸院元旦衆請上堂師云昔日香嚴禪師
云去年貧未是貧今年貧始是貧去年貧

卷一

二十

尚有卓錫之地今年貧連錫也無後來真
淨文和尚云去年富未是富今年富始是
富去年富一領黑縣布褊衫今年富添得
一條百衲山水袈裟歲朝抖擻呈禪衆實
爲風流出當家二大老雖是頂門具眼各
出好手扶豎宗乘薦豎拂子云若到報恩
門下還敢高聲也無打一拂云嶽邊頓落
千山勢海上全消萬派聲下座

衆坐七畢內外職事請上堂師云敲鐘擲
鼓早已惡水發人禮拜焚香倍爲互相鈍

置旋風打散落第二機重形言語堪作甚
麼然而法無定軌不妨放一線道與大衆
葛藤貼案問如何是見性成佛師云厨房
辛苦進云佛法現前爲甚不會師云勞而
無功師迺云纔見新報恩陞座便拽下地

去痛打一頓猶較些子今既不能任我打
模畫樣去也以拄杖打圓相云者個真空
性體本自圓滿本自靈明本自廣大本自
神妙惜乎多少人當面蹉過多少人望崖
而退若果能懸崖撒手自肯承當如日麗

卷一

三十一

天如鏡照像漢來漢形胡來胡現變化自
在應用無方道有也得道無也得若未能
證此道有也要喫人痛棒道無也要喫人
痛棒所以道不是山僧逞人我恐人墮落
斷常坑葛拍案云雪後始知松栢操事難

方見丈夫心下座

二月十九上堂師拈拄杖云今日是普門大士脫珍御服著敝垢衣的時節多少年來盡向棚頭看傀儡阿誰覩破帳中人山僧若據令而行纔見大衆道觀音生日啓請陞座各與一頓痛棒直教血濺梵天未爲分外然而拄杖子有殺有活有縱有奪有放有收置杖案上云今且放過令大衆通氣問答畢師迺云雲門大師道聞聲悟道見色明心擡起手云觀音菩薩將錢買胡餅放下手云元來是饅頭師云雲門老漢奇特甚是奇特仔細簡點將來未免起起倒倒翻翻覆覆報恩者裏則不然今日行顯出家做饅頭供養大衆尋尋常常百味具足大家喫得飽齣齣地饒他千手千

眼觀音到來那敢變換一絲毫變換則管教頭破腦裂復卓拄杖云長安風月貫今昔那個兒童摸壁行擲拄杖下座

佛誕上堂師卓拄杖云今日老瞿曇在拄杖頭上一任山僧扶起放倒還有作家禪

客麼向前來共出隻手問答不錄師迺云

有一人佛之一字素不樂聞念佛一聲漱

口三日有一人見佛歡喜禮拜讚歎種種

供養一人恁麼一人不恁麼同到報恩來

且道留那一箇即是有般漢便道功德天

卷

主

黑暗女有智主人二俱不受是者般的正

好捉來朝打三千暮打八百何故大海若

不納百川應倒流

誕日衆請上堂問世尊纔出母胎便道天上天下惟吾獨尊爲甚又要六年雪山師

云不是個中人不知進云今日和尚誕辰
報父母恩一句乞垂指示師云終不教壞
人家男女師迺云某甲生來愚執了無一
德亦無一能只是尋常饑餐渴飲倦則坐
眠健則行道今日諸道友請陞此座且道
有何法可說合掌云謝種種供養下座

上堂師云昨日初一山僧擬欲上堂爲大
衆舉揚個事反覆看來無有少法可說至
晚到此殿上簡點一回見個中少人不容
坐觀寥落今日爲大衆說誠實言令各各
共繇斯道亦不顯爲現前衆等並令天下
衲僧齊開正眼不墮狂蹊邪徑克明從上
綱宗徧一切處迺高聲召云大衆諦聽二
時課誦切莫蹉過

中元上堂師拈拄杖云佛歡喜僧自恣設

孟蘭盆羅列盡世甘美普供一切教有明

文是名報恩其上座者裏則不然剛剛一
味拄杖子佛也祖也僧也俗也凡也聖也
遠也近也舉凡恒河沙界一切有情盡教
一個個飽餉地祇是目前大衆無下口
處何故卓拄杖云只爲分明極翻令所得
遲復舉長沙岑大師因一秀才看千佛名
經問云三千諸佛祇聞其名未審居何國
土還化物也無沙云黃鶴樓崔顥題後秀
才還曾題否才云不曾題沙云得閒題取
一篇好師云欲會怎麼事須是個中人有
麼聽取山僧一頌碧眼頭陀坐石牀古梅
繞屋冷飄香遊人熱鬧尋朱紫咫尺千山
難共堂下座

上堂舉睦州陳尊宿因僧問高揖釋迦不

拜彌勒時如何州云昨日有人問趺出了也僧云和尚恐某甲不實那州云拄杖不在笥帚柄聊與三十師云提持個事須是恁麼人始得雖然如是未免勞而無功報恩則不然若有問高揖釋迦不拜彌勒時如何便向他道請落堂喫齋他若果是個入直是令人讚歎不及大眾還會麼揮拂云選佛若無真正眼宗門那得到如今下座

祈遠居士請上堂問雲門大師爲甚要一棒打殺釋迦老子師云莫謗雲門好僧喝師便打師迺云英靈漢子切忌刺頭入膠盆世諦纏擾是刺頭入膠盆佛法支離是刺頭入膠盆叅話頭起疑情是刺頭入膠盆耽空滯寂是刺頭入膠盆懺罪安心是

刺頭入膠盆絕學無爲是刺頭入膠盆還有不刺頭入膠盆的麼正好出來喫山僧痛棒且道既是不刺頭入膠盆爲甚又要喫棒驀卓杖喝一喝云果向山僧棒下瞥爾知羞得個大休大歇頂後光圓面前路

聞方知本自瀟灑本自超越本自清淨本自解脫逆順卷舒縱橫無礙佛祖不能親鬼神焉可測等閒哮吼似震雷音如過毒鼓黃檗臨濟管教聞風吐舌其餘淺鮮一任似鴨聞雷顧左右云阿呵呵好大哥畢

幾

三四

竟誰人不丈夫下座

至金陵慈引蘇居士就一華庵請上堂白椎云法筵龍象衆當觀第一義師云若論第一義釋迦老子因衆生根鈍不可直捷指示只得四十九年權巧方便提獎嬰孩

橫說豎說委曲垂慈實不得已根機漸熟
廼於法華會上略露一斑直至涅槃時到
廼把一生千說萬說說不到千喻萬喻
不及的舉起一枝華分明剖示博得識者
一笑謂之正法眼藏的付飲光方遂本懷

幾

五

隨復殷勤付囑國王大臣今日者一枝華
在慈引居士手中當陽拈出建梵刹竟一
切天人莫不稱譽居士大智大力新報恩
到來亦是讚歎不及更有忍俊不禁的麼
出來大家鋪華錦上問第一義諦即不問
報恩的付事如何師指案上華云秋桂更
清香進云猶是門前之遠師云誰人教汝
門前遠何不擡眸向上看進云看個甚麼
師云好與三十棒僧喝師拈杖打云再犯
不容僧禮拜師廼卓拄杖云報恩新長老

本來無住握根拄杖倒用橫拈把個斗笠
遮卻一切人眼孔東西南北少有識者到
者裏遇着同門老道兄瞞他不得被推向
人前要某舉揚先師現成句子召衆云擲
個蒲團說法隨處薦喝一喝卓杖一下復
倚杖云今日陞座於彌勒殿中更爲大衆
舉則古語當初布袋和尚亦與新報恩一
般行脚常自述行繇一鉢千家飯孤身萬
里遊後來慈悲之故更有落草之譚云彌
勒真彌勒分身千百億時時示時人時人
自不識咄哉者呵師慈則大慈愜亦少愜
新報恩今日既與大衆有緣同此一會一
發打開布袋更不露頭藏尾去也大衆諦
聽彌勒真彌勒分身千百億額橫兩道眉
面豎一個鼻阿呵呵笑不輟掀起嘴唇片

片皮露出牙齒許多骨展手云大家施我
一文錢更有一句爲君說十箇指頭八箇
了誰人平易誰奇特擲拄杖下座

建禪堂衆請上堂頭首白椎云法筵龍象
衆當觀第一義師云當今海內居位設化

幾

三六

者頗多若論舉揚第一義不謂全無敢道
希有承虛接響作隊成羣動著便道那一
句向上那一句向下那一句平常那一句
奇特那一句現成那一句靈妙滯句承言
迷宗失旨要個解觀第一義的非但希有
惟恐全無今日新報恩舉揚第一義也須
大衆具眼始得過云崇禎十有一年九月
十五日報恩建左右禪堂竟拈杖便起問
如何是臨濟宗師云耀古騰今進云如何
是雲門宗師云普天匝地進云如何是曹

洞宗師云家風綿密進云如何是瀉仰宗
師云父子作家進云如何是法眼宗師云
進前來與汝道進云打破沙盆透底去師
云放汝三十棒師迴顧左右云大衆久立
下座

幾

三六

無偽老衲請上堂師拈拄杖云趙州八十
猶行脚只爲心頭未悄然直至到頭無一
字始知虛費草鞋錢有知得趙老立地處
的麼出來互相酬唱問正當古稀時如何
師云大衆爲無偽師祝壽師迴云大凡學
道須一切放下若一事放不下則去道遠
矣富貴放不下則受富貴累才能放不下
則受才能累盛德放不下則受盛德累高
年放不下則受高年累今者無偽老衲世
緣早已周備因信向者箇法門卻能一齊

放下富貴固非所慕謙和不逞才能忘年
忘德在此深山舊院決欲究竟此道茲遇
古稀大誕請新報恩陞座說法且道新報
恩說個甚麼一念萬年常不易何愁古佛
不齊眉慕卓柱杖下座

臘八上堂師云事是過量事人須過量人
不是過量人怎明過量事有麼有麼衆問
話畢師迺云昔日釋迦文佛初生下地一
手指天一手指地周行七步目顧四方道
天上天下惟吾獨尊將謂奇特早入膠盆
十九逾城歷外道處受種種勞煩復深入
雪山苦行六載臘八明星出時悟道歎曰
奇哉一切衆生具有如來智慧德相但以
妄想執着而不證得惜當時不令報恩小
長老見小長老若見取把火炬看者老子

面皮厚多少且道小長老有甚長處敢恁
麼道自具一雙窮相手不曾輕揖等閒人
元宵上堂師云我有一燈無暗無明通身
是眼遍界分形不繇造作豈屬生成天不
能蓋地不能擎無幽不徹無遠不存個中

磨日月隨處立乾坤呵呵笑倒人杜舞
村歌未了音惱得金剛忍不住擲碎虚空
火燄增燒斷西江萬丈聲跳起顛狂龐老
子臨風高叫道有口如啞眼如盲下座

楊家塢靜主同衆道友請上堂問如何是
報恩旨師拍案一下進云還有向上事也
無師云有進云如何是向上事師云打你
頭破腦裂師迺云欲識報恩人須到報恩
境既到報恩境須識報恩人諸人到者裏
還識得山僧也未須知未離德清與山僧

相見已竟未上船來請山僧陞座已竟山僧未離臥室與諸人說法已竟且道未離臥室說法已竟如今又出來叨咀作麼豎拄杖云錦上鋪華是山僧尋常用處驀喝一喝卓拄杖下座

卷二

三

到楊家塢阿蘭若衆請上堂師云神光獨耀萬古徽猷入此門來莫存知解不存知解的出來相見問臨濟大師道沿流不止問如何真炤無邊說似他師云恰進云離相離名人不稟吹毛用了急須磨師云恰恰問如何是楊塢境師云四面青山遠進云如何是境中人師云長的長短的短問如何是第一玄師云日頭進云如何是第二玄師云亮月進云如何是第三玄師云鏡鉞問向未讀書文字不明師打云者是

卷二

三十九

什麼所在說明不明師迺云山僧參學幾年成得一道祕密真言不會輕易吐露今日本庵行進得度在家弟子沈行豐七十諸上善人俱會一處便迺布施大衆令於我此法門未信者信已信者深入未證者證已證者不墮窠落白迺高聲云趙錢孫李周吳鄭王馮陳褚衛蔣沈韓楊下座行化歸孫熙室居士請上堂師云求人不如求己驀擲拂子下座入新方丈德清明道蔡封翁暨遠近諸檀護請上堂問四衆駢臻請揚法要師云今日入新方丈師迺云把住也法堂前草深一丈放行也盡大地是圓覺伽藍且道把住爲人好放行爲人好卓拄杖云知音不用頻頻舉達者應知暗點頭

上堂師拈拄杖云先聖道有時奪人不奪境有時奪境不奪人有時人境兩俱奪有時人境俱不奪高聲召衆云者是什麼所在驀擲拄杖下座

臘八上堂師云遠山青近水碧氣斂天空濶庭寬得日多境僻來蹤別晚節馨香骨傲梅卒歲堅持苔裹石白雲閒澹挂松梢古道坦平堆竹葉山僧一榻坐還眠何期四衆同時集敲鐘撾鼓請陞堂香煙透徹諸人鼻立久合休即便休大衆有言向前說問答畢師廼云周穆王三年癸未臘八釋迦文佛睹見明星豁然悟道歎曰奇哉一切衆生具有如來智慧德相但以妄想執着不能證得崇禎十二年己卯臘八玉琳道人望見青山不覺好笑顧左右云汝

等各跼毘盧頂上行誰能拈些子妄想智慧誑謔山僧看拍案云阿呵呵好大哥上來也恁麼散去也恁麼今日行端行鎮鬻度有齋供養大衆大家落堂喫了飽齣齣地要行便行要坐便坐下座

元旦上堂維那白椎云法筵龍象衆當觀第一義師驀喝一喝下座

良渚安谿衆居士請上堂問風調雨順五穀豐登請和尚提唱一句師云常願如是進云皇圖鞏固帝道遐昌願和尚祝讚一句師云天長地久進云闡揚祖道佛日增輝今日上堂以何示衆師云杲日當空師廼云雪後梅增勁霜餘栢倍青到來詢祖意分明舉似君召大衆云還會麼若也會得便見臨濟大師道大凡演唱宗乘一句

中具三玄一玄中具三要有權有實有照
有用放下拂子云選佛若無真正眼宗門
那得到如今

雪文師同盛澤衆居士請上堂師拈拄杖
云久病扶藜連上堂也緣檀信至誠叅誰

卷三

三

人直下知休去更不遲疑乞指南問如何
是報恩境師云主山高案山低進云如何
是報恩人師云眉橫眼上鼻豎嘴邊進云
如何是報恩事師云檀信遠來山僧上堂
進云滿座春風吹不竭梅花纔吐暗香來
師云一絲界破青江色釣得鯨鯢方始休
問梅花未發時如何師云鐵骨撐天進云
發後如何師云清香噴鼻問如何是常住
佛師云殿裏的進云如何是常住法師云
藏裏的進云如何是常住僧師云堂裏的

師迺云舉起便知猶爲遲鈍若更未能山
僧屈曲垂慈去也昔日大慧禪師住雲門
時嘗拈竹篋問人曰喚作竹篋則觸不喚
作竹篋則背喚作什麼開口便打少有契
其機者一僧入室請益慧復示以偈曰雲
門舉起竹篋開口知君話墮上方香積不
餐甘伏食人涕唾師驀豎起拄杖云大衆
畢竟喚作什麼擲拄杖云各落堂喫齋
上堂師豎拄杖云明眼禪人出衆相見二
僧競出師以拄杖畫一畫云領取鉤頭意
莫認定盤星下座

振陵太老師忌日上堂師云山僧昔日芟
染蒙先磬山老和尚執刀三髻口占有云
一子出家九族昇天若不昇天佛有妄言
山僧出家來業已多載且道先師今日何

在識得落處的出衆相見衆問話畢師迺
云沙界通紅一團火個中毫髮不容存森
嚴明淨先翁面普示人間子若孫

誕日上堂師按拄杖云放光現瑞鼓舞小
兒動地兩華助揚末技止止不須說欺侮
殺人數數請敷宣顛狂幕外青蓮華下笑
顏開奴見婢殷勤積雪巖前斷臂舉人逢
鬼迷悶現前大衆十二時中各各蹋佛祖
頂顛行有不受惑的出來相見問答不錄
師迺云山僧未出母胎已爲諸人作大佛
事舉揚大法汝等諸人早已如實知如實
見如實證如實行如實說爲甚今日卻受
人處分只爲忘脚下却見別山高下座
歸院上堂師顧左右云一總都是家裏人
出來同說家裏話問報恩佛凈最希奇一

幾一

三十二

下雷轟天下知莫道學人無骨氣請師指
示向上機師云霜打香毬滿樹金問蹋破
乾坤事若何師云江上蘆華頻白頭進云
還許學人進步麼師云青山個個低頭看
問兩邊不立中道不安請問和尚向甚處

行脚師直視云君家若是僊陀客不用求
人更下推進云恁麼山河無隔礙世界掌
中擎師云且過一邊師迺云先師縱我無
拘束收放自繇誰可度大家同蹋上頭關
方顯吾宗未寥落召衆云珍重下座

幾一

三十三

大覺普濟能仁玉琳琇國師語錄卷第一

音釋

髻 他計切音 髻 呼候切吼平 篋 邊迷切
替削髮也 髻 聲氣急也 篋 音鏡
侮 周古切音 武優也

大覺普濟能仁王琳瑯國師語錄卷第二 幾二

嗣法門人行岳編

上堂二

閏正月旦上堂師拈拄杖云一不成隻兩不成雙今朝正是奇特月日還有奇特人

幾二

出來共明奇特事麼問答畢師過云茲者

好日多同化主自遠歸來施主入山設供

山僧也趁鬧熱供養大眾一上幸諸大眾

各各現大人相赴山僧齋山僧將無邊世

界一切地土爲米一切河海爲湯一切森

羅萬象爲奇餚美饌一任大眾放開肚皮

展開大口飲之不竭食之有餘飽齰齰地

乘風徐行片時遊徧諸佛國土向虛空裏

打箇翻筋斗下來山僧再呈第二番供養

把無邊世界依舊撒開以一世界爲一齋

一任大眾樂一味者即向一味世界應供樂多味者即向多味世界應供隨大眾種種所樂即向種種世界應供齋畢旋歸然後山僧將無邊世界仍前還他無邊世界一切地土仍前還他地土一切河海仍前還他河海米還是米湯還是湯餚還是餚饌還是饌殷勤請山僧陞座畢然後落堂喫齋令諸檀信求福者福集懺罪者罪滅薦亡者亡人高昇生安死利靡不如意顧左右云且慢散去三番供養大眾了更要總散大眾一大分贖錢過舉百丈上堂云我有一句子百味具足大眾還會麼慈悲之故而有落草之譚下座
新市覺海寺繼白道侶請上堂問請和尚直指西來意師云久雨今日晴問弟子年

老求和尚開示師豎拄杖進云不會師云
高着眼師迺云天地成人物立有美有惡
有是有非有邪有正有曲有直有宜有不
宜有可有不可從而分別指畫去取戒勉
令修令治使知使行扶持世道匡正人心
此儒教治世之理也譚無破有推小至大
求精棄麤輕外重內此道教出世之道也
道有也而不立一塵道無也而不撥一物
有時恁麼有時不恁麼有時恁麼也得
不恁麼也得有時恁麼也不得不恁麼也
得有權有實有照有用有縱有奪有殺有
活可以意會難以言傳承言者喪滯句者
迷此釋教入世出世之法也方便指迷之
謂教直下傳心之謂宗漸者繇博而至約
頓者一了而百通把住黃金失色放行瓦

幾二

二

礫增輝且道把住爲人好放行爲人好卓
拄杖云人歸大國方知貴水到瀟湘一樣
清

上堂師拈拄杖云自慚少福住幽林澹薄
辛勤歲月深散衆欲眠峯頂石捐身助道
是何心仔細看來竭誠爲衆的也有肯心
檀護也有只要我輩顚精學道古德云學
道如鑽火逢煙未可休直待金星現歸家
始到頭又有云歸家盡是兒孫事祖父從
來不出門你看先聖與麼激揚可知學道
非同小可幾二若不一聞千悟直須一切放下
忘苦忘樂忘死忘生歷盡艱難方能透脫
顧左右云有蹋著上頭關的出來通個消
息師迺云世出世法非憑一點真心不能
成就故有此真心也可以自利有此真心

三

也可以利人有此真心也可以自利而利人有此真心也可以利人而自利徹此心源便見瑞林面目清勝化儀目在報體淨滿金方伯與潯谿衆信凡受瑞林所化生一念淨信所作佛事皆成佛道驀卓柱杖下座

上堂舉五祖演和尚云四五百石麥二千石稻好個休糧方耆婆不得妙千巖長禪師云管取有錢常住不無演祖若是將無作有拔貧作富須還無明始得米不蓄一粒菜不栽一莖任渠來往者喫得飽彭亨師召衆云用四五百石麥二千石稻如何喚作休糧方米不蓄一粒菜不栽一莖如何喫得飽彭亨阿呵呵大海納流寒巖發燄一大老不無些小巧妙簡點將來

未見大人體態報恩者裏則是直心道場不用蛇足有米喫三餐無米喫兩度也有時恰好也有時忍餓擲拂子下座

瑞安禪人請上堂師拈杖云過去已過去未來猶未來佛法付在報恩明眼禪流出衆相見問答不錄師卓柱杖云一棒分賓主炤用一時行會得個中意日午打三更且道會得個中意如何日午打三更擲柱杖云不是苦心人不知下座

檀越請上堂衆僧問話畢師迺云深固幽遠無人能到大家者在者裏其中事合知青蘿夤緣直上寒松之頂白雲澹泞出沒太虛之中隨緣灑落者皆已成佛道百千法門同歸方寸河沙功德總屬心源一念純真者皆已成佛道實際理地不受一塵佛

事門頭不捨一瀆勤勤懇懇力行衆行者
皆已成佛道終日著衣不挂一縷絲終日
喫飯不較一粒米孤迥峭巍者皆已成佛
道逢茶喫茶逢飯喫飯和泥合水者皆已
成佛道事事無礙七縱八橫者皆已成佛
道矜矜自守重因果罪福者皆已成佛道
驚羣動衆激揚躊唱者皆已成佛道入林
不動草入水不動波者皆已成佛道擊香
案云但願春風齊著力一時吹入此中來
驀卓柱杖喝一喝下座

佛誕上堂問報恩門下如何設施師云舊
蒲谿水西流碧師迺云第一義如何舉梁
王殿上道不識老達磨也只道得一半者
一半報恩爲衆竭力驀拈香云今辰是我
始祖釋迦文佛降誕之期遠孫通秀敬拈

卷二

五

片香用躊法乳下座

檀越請上堂上首白椎云法筵龍象衆當
觀第一義師拈柱杖云道個第一早落第
二了也然而屈曲垂慈不妨左之右之靈
利衲僧出來躊唱問話畢師卓柱杖云大
解脫門同證同入僧俗長幼男女貴賤富
貧智愚罪不俱在個裏平等一味設齋也
在個裏喫齋也在個裏修福也在個裏修
慧也在個裏求壽也在個裏求貴也在個
裏一一殊勝一一圓滿一一不退一一無

漏寒巖枯木華如錦六月炎炎滿市霜連
卓柱杖下座

結制了悟禪人率湖城衆居士請上堂師
拈香云此辦香從大衆實地中拈出蕪向
爐中伏與法界普熏四恩總報敝衣就座

白椎竟問祖上門庭即不問重整家風事
若何師云一條白棒驗龍蛇進云正令當
行不存執則更借一問時如何師云要第
二杓惡水那進云千古模範從今立萬派
青山展笑顏師云爲衆竭力師迺云山僧
質直無文從來如實爲衆以盡虛空徧法
界爲清淨伽藍令無邊國土情與無情平
等安居無內無外何逸何勞喝一喝云普
利羣機一句作麼生道薰風自南來殿閣
生微涼

癸未誕日檀越請上堂師至座前滌凡劉
居士同涼禪等呈祖衣師云兩年福薄勉
爲人糠麥爲糜草作羹時節漸佳慚未輟
此衣珍重至誠心便搭衣顧左右云先聖
有言此衣表法舉衣云者個是衣喚什麼

作法復舉衣云者個是法喚什麼作衣向
者裏千眼頓開何事不辦如或未然更爲
當陽揭露陞座白椎竟問如來和尚同月
同年如何是無量壽師云山僧今年三十
師迺云圓陀陀七華八裂錦攢攢絕點純
清明中有暗黃金失色暗中有明瓦礫生
光擬議承當白雲萬里愁眉退避涼颼滿
目取不得捨不得事是怎麼事人須怎麼
人得在此失在此但得怎麼人何愁怎麼
事且超羣越格一句作麼生道良久云普
下座

義二

六

九日姚均仁居士請上堂師云見離斷常
道無明昧斷常之見非真見明昧在人
在道直饒戴角擎頭未是當家種草一種
平懷悠然自得的衲僧出來道個應時及

節的句看問如何是無生話師云池無孽
雨綠庭有傲霜黃問應供一句如何道師
雲端坐受施主樂師迺云金華布地玉蕊
承天今正是時果日當空乾坤朗耀古今
無異閻黎老僧面目現在悟人瞎人誠諦
之言一句明明該萬象離邊斜插驗人枝

驀喝一喝下座

上堂師卓柱杖云彩雲影裏仙人現手把
紅羅扇遮面急須著眼看仙人莫看仙人
手中扇具眼衲僧出眾相見問話畢師迺
云大凡參學之士直須絕情絕解親證親
悟向一念不生前透脫本地風光方可任
運穿衣喫飯健則行道倦則打眠青青翠
竹總是真如鬱鬱黃華無非般若於古人
言句自然舉一明三通此達彼邇來逐塊

外道妄認搖唇鼓舌舉足動步的識神爲
主人公爲本來面目自不知非更引佛祖
相似言句謬解妄會欺愚瞞瞞所冀真實
爲生死者力忝涅槃堂裏禪於臘月三十
闕頭不可自誤豈肯爲邪外所惑復卓杖

云不是與人難共合大都緇素要分明

解制上堂師左右顧視云山僧與諸大眾
恒處普光三昧直是如天普蓋似地普擎
住者朕跡不留去者迴避無計恒沙國土
情與無情同一受用同一自在同一解脫

在迷不滅在悟無增數千年前有多口阿
師命之曰大圓覺場曰真如性海種種彊
爲名目無非當人有恁麼事故爲當人說
恁麼話如是知者名爲正知如是行者名
爲正行有何長期短期復何結制解制然

而某上座有時現無邊身說無邊身法有時現七尺比丘身說七尺比丘身法有時與大眾遊大寂滅海上無佛祖下無眾生中無自己正報既爾依報亦然有時隨順眾生七顛八倒向無修學中說修學無迷悟中說迷悟便乃無制無期中立期立制無解無結中立解立結結也高挂鉢囊解也緊峭草屨結也如是解也如是阿呵呵好大哥大抵還他肌骨好風流不在著衣多

檀越請上堂僧擬出問師左右卓柱杖云知恩報恩的衲僧方許相見進云祖道凌夷法門衰替如何是和尚拯一絲九鼎之危的句師和聲打一拄杖進云恁麼則三玄開正道一句破邪宗也師云向上道將

卷二

來僧喝師連喝兩喝問當機一句是如何師卓杖云一棒一條痕一掌一握血師迺云昔日世尊有四弘誓願眾生無邊誓願度煩惱無盡誓願斷法門無量誓願學佛道無上誓願成白雲端和尚有四弘誓願饑來要喫飯寒來要添衣困來伸脚睡熱處要風吹山僧也有四弘誓願識得拄杖子許他有喫棒分識不得拄杖子許他有喫棒分識得不識許他有喫棒分不識識得許他有喫棒分高擎拄杖云看看盡山河大地明暗色空并汝等諸人周身上下毛孔骨節盡成山僧拄杖子諸人還知麼卓柱杖云知得也三十拄杖知不得也三十拄杖且道拄杖子因甚麼有如是威力蕩蕩一條官驛路晨昏曾不禁人行下座

卷三

九

開爐上堂師拈拄杖云一椎便就未是性
燥不假一椎漆桶不快入得從上爐輔的
衲僧出衆相見一僧出禮拜師云欲釣鯨
鯢澄巨浸却嗟蛙步驟泥沙僧擬議師打
出又僧出師震威一喝僧擬議師亦打出
又僧出師云當場相見須是作家僧喝師
云胡喝亂喝作麼僧又喝師又打出師迺
卓拄杖云莫道法王得自在緇素不得不
分明擲拄杖下座

臘八上堂師云從門入者不是家珍過量
衲僧出衆相見問世尊睹星悟道悟個甚
麼師云好狗不齧枯骨進云四十九年說
法說個甚麼師云誑謔愚瞽進云拈華示
衆示個甚麼師云轉見不堪師迺高聲召
衆云大衆能仁是汝之奴下座

大雪檀越請上堂師拈拄杖云第一句薦
得鶴有九臯難翥翼馬無千里謾追風第
二句薦得左右逢源珠回玉轉第三句薦
得眼睛烏豆換鼻孔草繩穿衲如昨日慕
津居士率衆信士請山僧上堂山僧高聲
應云今日好大雪諸人作麼生薦取問金
車千古重覲面勢崔巍箭鋒相拄者誰不
犯鋒鉞師云千鈞之弩不爲縣鼠發機進
云恁麼則大地終成白業千谿萬派同源
師云請過一邊慕津居士問如何是諸佛
出身處師云天寒人事簡雪重鼓聲盈師
迺舉龐道玄居士至藥山山命十禪客相
送至門首士迺指空中雪曰好雪片片不
落別處有全禪客曰落在甚處士遂與一
掌全曰也不得草草士曰恁麼稱禪客閣

羅老子未放汝在全日居士作麼生士又掌曰眼見如盲口說如啞師云老大龐居士暴富欺貧全禪客當斷不斷反招其亂若是龐老向山僧道好雪片片不落別處便劈面與他一拳云俗氣不除當時龐居士若喫得者一拳管教安家樂業更不播弄唇皮下座

大雪設禹門幻有老和尚供師云師翁面目雪滿千山先師儀表春回大地先師春回大地也雪滿千山非當年久侍者不知師翁雪滿千山也春回大地三十年後有人共見今日某孫應時獻一杯茗罪過彌天何故不合當面觸犯

解制空明師同滌凡劉檀越請上堂問答畢師過云盡大地是解脫門把手牽不入

盡大地是涅槃路卷三倩人行不得入得解脫十二門行得涅槃路便運動若行雲止猶谷神既無心於彼此豈有象於去來南瞻部洲坐禪北鬱單越脚麻東弗于逮持鉢西瞿耶尼手酸大洋海底翻身打倒兜率天宮觸着閻羅老子鼻孔帶累四大天王齊聲噴嚏天人捧華無路神鬼窺覷何及如或不然出門便是草脚下好生看下座化士歸上堂問高高山頂住持深深海底行化者個是什麼人師云進前來向汝道僧佇思師便打師過云昔日金牛和尚每齋時自捧飯上堂云菩薩子喫飯來師召衆云人莫不飲食也後來雲峯悅禪師叅大愚芝和尚入室請益芝云法輪未轉食輪先轉後生趁色力健何不爲衆乞食我

忍饑不暇何暇爲汝說禪師召化主云觀
禪人且道大愚老漢是什麼心行橫按柱
杖云三通鼓罷大衆雲臻一堂風冷澹千
古意分明擲拄杖下座

結制上堂舉退庵重閣黎領衆問荅不錄

師拈拂子云今朝四月十五金輪峰笑細
谿舞草木土石盡翻身蚊蟲鴽蚤騎佛祖
更有一般奇特事欄中兩頭鹿吞却千山
萬山虎顧視左右云釋迦彌勒是汝之奴
朝謁毘盧南嶽遊暮挾舍那天台卧重閣
黎莫放過下座

乙酉季夏十有一日塔天隱老和尚全身
於報恩本寺之左上供拈香師云通秀事
師旬有四載無彼無此無近無遠無動無
靜無藏無顯豈云旬有四載實惟終身如

是雖云終身如是亦猶淺而論之嗚呼吾
師如虛空同壽通秀事師似日月長年惟
師永安大衆永安法屬永安檀護永安且
漏洩吾師末後一句萬峰深處一龕間
上堂上首白椎竟師拈拄杖云第一句中

薦得堪與佛祖爲師第二句中薦得堪與
人天爲師第三句中薦得自救不了臨濟
大師昔日被人進前一劄云如何是第一
句當下冰消瓦解直饒盡力道箇三要印
開朱點窄未容擬議主賓分未免欺秦瞞

幾二

士

漢顧視左右云衆中有不受人惑的麼洪
義問世尊陞座文殊白椎和尚陞座上首
白椎且道與黃面老子是同是別師云落
二落三進云忽有箇漢掀倒禪牀喝散大
衆又作麼生師云未有喫棒分在進云直

得禮拜去也師云亦然頽庵與問第一句
薦得堪與佛祖爲師如何是第一句師便
喝進云第二句薦得堪與人天爲師如何
是第二句師云重言不當喫進云第三句
薦得自救不了如何是第三句師云轉見

卷三

十三

不堪進云若無舉鼎拔山力千里烏騅不
易騎師云且放過你自謙問有言皆成謗
無言又落空即今法華經作麼生道師云
念汝維那辛苦進云恁麼則人人坐大白
牛車去也師云急走過學閒問不問新奇
特不打舊葛藤向上宗乘請師速道師云
外面兩大德笑你進云此猶是向下畢竟
如何是向上事師喝一喝閒良久師云向
上問將來進云學人則不然師便打閒喝
師連棒打退玄定問一不成一五不成五

師云洞山在你脚下進云一花五葉果熟
香飄師云你那裏學得來進云恁麼則西
天祖意元無意東土傳心豈有心師云自
領去海亮問如何是父母未生前面目師
云你曾喫朝飯麼進云一時頓覺日見世

尊師云餽酸氣性義問風行草偃葉落歸
根草偃葉落即不問水到渠成事若何師
云針劄不入去進云當今

御勅和尚退臨以何爲範師卓拄杖云知痛
癢好進云祇如總不恁麼來和尚又且如
何下手師云晴乾不肯走便打義禮拜起
云杖頭點破歸家路石聽西江水倒流師
云皮下無血如德問千劫難逢今朝幸遇
請師指示師豎拄杖云一句了然超百億
進云弟子不會師云伶俐衲僧寂慧問低

頭不見地仰面不知天踏着關楔子全身
忽獨露師舉拄杖云穿却你鼻孔刺着你
眼睛進云過現未來即不問監窮三際事
如何師云痴獸漢界成問百市千重關不
住縱橫遍界自昂然師云還喫棒麼成喝
云千里特來呈舊面慙慙末後請師宣師
云不知痛癢師過云你有拄杖子我與你
拄杖子你無拄杖子我奪你拄杖子召大
眾云一種是聲誰會得有堪聽有不堪聽
云白下座推

臘月旦上堂僧問今朝臘月一某甲得箇
消息欲向和尚吐露和尚還允否師云允
僧擬議師打退僧問人天瞻仰龍象開顏
萬善消息事如何師豎拄杖云天得一以
清僧競出問話師以拄杖揮退卓拄杖顧

卷二

十

眾云千鈞之弩不爲鼯鼠發機又二僧出
師各打退又一僧出師云千鈞之弩不爲
鼯鼠發機爲甚麼又打者二僧又一老僧
問父母未生前請和尚指示師云念汝年
老進云還有不老的師云再犯不容洪義

問臨濟三頓棒意旨如何師云多少人怕
喫棒進云黃檗未舉已前又作麼生師怒
目視之進云者老漢向者裏躲跟師便喝
進云好喝師便打進云賊過後張弓便走
師劈脊痛棒云如今打你還疼麼行咨問
棒下無生忍卷二行咨知恩報恩作麼生是臨
機不見師師便打咨掀香案師連棒打退
行與問昔日臨濟大師一日謂普化克符
云我欲於此建立黃檗宗旨汝且承褫我
二人珍重下去意旨如何師云兩眼對兩

十五

眼進云明眼人難瞞師云放汝三十棒師乃云昨夜老趙州與跛雲門打做一團分身無數遍一切處直令盡大地若縞若俗開眼也着合眼也着大衆會麼普大衆不會麼庭前栢樹子驀卓拄杖喝一喝下座歸方丈召行咨云汝喫棒不知痛癢進云復要掀翻在師更與三十棒

示衆

示衆舉法眼禪師指凳子云識得凳子周匝有餘雲門偃云識得凳子天地懸殊天衣懷云識得凳子榆楠木做大慧杲云識得凳子好鬚頭洗脚師云諸大老與麼各出好手放過則盡可居寶華王座仔細檢點將來合各與三十矮凳脚因課誦示衆師云邇來魔彊法弱亦以上

無嚴師故容邪謬之徒揅足宗門多是學宗旨論宗旨虛擬宗旨一味妄穿妄鑿妄卜妄度從上綱宗面目儼然何嘗夢見所以言言會旨步步迷宗即如一等無慚愧漢妄稱自己亦是臨濟兒孫開口便道垂慈必有法無法不垂慈臨濟宗有玄有要有權有實有照有用有主有賓而竟把叢林正務及兩堂課誦皆曰此只是應點故事可將就些必當少念佛方像祖師門下客吁嗟乎我不知此等人面皮厚多少若道是泛常故事有礙祖道則直當不念何得云少念及將就些若如此隨順俗套將就故事豈是大丈夫作人天眼目與佛祖爲師者之所爲耶我今誠實指示此輩暗短流俗阿師且莫誇是祖師門下客莫虛

稱會宗旨莫別求所以爲人既欲明宗旨
且莫當面蹉過莫拈一放一好教你知報
恩者裏即兩堂課誦便有玄有要有權有
實有照有用其上座有時一聲佛如金剛
王寶劍有時一聲佛如踞地獅子有時一
聲佛如探竿影草有時一聲佛不作一聲
佛用亦有殺亦有活亦有縱亦有奪亦有
主亦有賓亦如清涼池亦如大火聚背之
則受諸苦惱觸之則燒却面門饒人左之
右之時進時退或邪或正或是或非或行
解相應不相應或見地透脫不透脫不消
別施勘驗只者兩堂課誦都料簡詳悉也
凡在報恩者切莫以課誦出坡等爲虛應
故事須知無不是佛祖之祕密法無不是
佛祖之總持門無不是佛祖之不傳心要

卷二

十六

無不是佛祖之自利利人捷徑若道別有
宗旨別有佛法別有好知解更欲假借古
德念佛漱口之說以圖避懶妄擬議人則
先謗他古德爲不要人念佛又以報恩念
佛作念佛會則真可憐生你若果是箇人
能各出手眼別樣設施爲人去其上座自
識得你不要你類我若你等道必要怎麼
我又不怎麼也祇如我怎麼事無不具玄
要權實照用主賓縱奪你作麼生會敢妄
擬議耶凡爲魔所攝毒氣深入者一任你
別去學佛法學宗旨多生分別異樣揀擇
他日眼開自知負墮如我同志真實學道
者切須立定脚跟努力行持莫爲魔惑其
或獅子蟲定不輕縱以亂清規
羯磨夜示衆師云毀犯者墮諸苦趣執持

卷二

十七

者報在人天且道既不毀犯又不執持的當生何處良久云自是不歸歸便得故園風月有誰爭便歸方丈

示衆舉僧問慈明闌中取靜時如何明曰頭枕布袋師云山僧若在座下管教先南源不只恁麼休去何不進云和尚莫世諦流布且道先南源又且如何

示衆師云汝等諸人須信本來是佛各須識取本來面目踢著本地風光若識得本來面目黃金世界白玉爲身梅檀叢林梅檀圍繞不然草木叢林時時凋喪衆禮拜示衆舉佛眼禪師上堂云世人盡道路行難本分真金入火看煉去煉來金體淨一槌打作玉欄杆師云古德恁麼道應有聞之踴躍者應有聞之悚惕者

示衆舉淨覺本禪師僧問同聲相應時如何淨云鶻鳩樹上啼師云可惜者僧浪問不知落處見淨老云鶻鳩樹上啼何不遙空掌云打落枝頭時如何儻淨老再云作家禪客天然有在何不進云某甲點茶來請和尚儻淨老再云果然作家便禮拜而出豈不話不虛行雖然鶻鳩樹上啼汝諸大衆作麼生會

死關千丈巖回示衆云者一百二十日老僧日日在兩序諸公肚裏走三轉諸公知

幾二

太

麼衆進語畢師又云者一百二十日老僧日日在各堂寮苦行諸禪肚裏走三轉諸禪知麼衆進語畢師又云者一百二十日老僧日日在內外大衆肚裏走三轉大衆知麼衆久立師左右顧視下座

示衆師云透脫未後牢關雲菴所罵洞達
歷祖綱宗妙喜猶呵汝等諸人趣向者個
法門大須仔細前谿水急魚行涇後嶺風
高鳥泊難

示衆舉道吾禪師每執木劍作舞僧問手

卷二

十九

中劍甚處得來吾遂擲於地僧取置吾手
中吾云甚處得來僧無對吾云容汝三日
下取一轉語僧亦無對吾迺橫劍肩上作
舞云恁麼始得師拈云吠虛逐塊韓盧敵
著半醒半醉漢子終不免大家草裏覓道
吾若於者僧纔欲取劍便一脚踢翻儻其
知非不惟令彼頓易皮毛自亦頭正尾正
那堪不示本分草料木劍竟成戲具
示衆舉雲門道直得觸目無滯達得名身
句身一切法空山河大地是名名亦不可

得喚作三昧性海俱備猶是無風匝匝之
波直得亡知於覺覺即佛性矣喚作無事
人更須知有向上一竅在大慧禪師云潑
油救火渾閒事雪上加霜愁殺人師云智
者見之謂之智仁者見之謂之仁

住吳興報恩示衆舉密菴禪師上堂舉婆
子燒菴話云者個公案叢林中少有拈提
者傑上座裂破面皮不免納敗一上也要
諸方簡點迺召大衆云者婆子洞房穩密
水洩不通偏向枯木上糝華寒巖中發燄
個僧孤孤迥迥慣入洪波等閒坐斷發天
潮到底身無涓滴水仔細簡點將來敲枷
打鎖則不無二人若是佛法未夢見在烏
臼與麼提持意歸何處良久云一把柳絲
收不得和煙搭在玉闌干師云風流婆子

本分衲僧一個高高山頂立一個深深海底行被密菴禪師路見不平把來束作一團擲在糞掃堆頭一場狼藉雖然密禪師也該喫三十苕帚柄何故他家各有通霄路那可鼓是生非尊已慢人乃呵呵大笑云三足香爐一脚踢翻了還有扶起者麼設若有人出手但輕輕與他道死貓頭那許你正眼覷着

示衆舉陸亘大夫問南泉云肇法師也甚奇怪解道天地與我同根萬物與我一體泉指庭前牡丹花云大夫時人見此一株花如夢相似師云田地廓徹許他大夫觸事知歸須還王老然而也要招人簡點何故兩個老作家盡在座主網裏踣跳在若是出格錦鱗必不看窠守窟天但言天地

卷二

二十

但言地我但言我萬物但言萬物與時人逐色隨聲何容有異偏與麼譚根論體寐語轉深設有弗甘的云恁麼說話不見起羣但向他道有理不在高聲

示衆舉法眼禪師問僧甚處來曰泗州禮拜大聖來眼曰今年大聖出塔否曰出眼卻問旁僧曰汝道伊到泗州不到浮山遠云者僧到即到泗州只是不見大聖道場全云者僧見即見大聖不曾識法眼東禪觀云者僧到也到泗州見也見大聖識也識法眼祇是自討頭不見師云者一隊老秃奴病在膏肓只顧道那僧不見誰知卻是自不識那僧有人出來道和尚恁麼道也是扶弱不扶彊新報恩隨聲便打且道是肯他是不肯他

卷三

主

示衆舉金峯和尚云老僧二十年前有老婆心二十年後無老婆心僧問如何是二十年前有老婆心峯云問凡答凡問聖答聖曰如何是二十年後無老婆心峯云問凡不答凡問聖不答聖師云個老漢全提正令獨握綱宗左右逢源前後無睽可謂得向上鉗錘不落時人窠窟然簡點將來也是自起自倒

示衆舉翠巖真禪師上堂云臨陣抗敵不懼生死者將軍之勇也入山不懼虎兇者獵人之勇也入水不懼蛟龍者漁人之勇也作麼生是衲僧之勇拈拄杖曰者個是拄杖子拈得把得動得三千大千世界一時搖動若拈不得把不得動不得文殊自文殊解脫自解脫叅師云翠巖老人恁麼

舉揚雖然竭力提撕未免傷神費氣新報恩則不然坐致太平者仁主之大勇也道高虎遶德重龍馴者至人之大勇也袖手凭几云衲僧之大勇又作麼生竹戶松龕濃睡穩花開花落聽東風從他伎倆有時盡我此平懷何所窮若更有多才能思逞英豪的一任踴跳

示衆舉曹山行脚到烏石山靈觀禪師處問如何是毘盧師法身主觀曰我若向汝道即別有也曹山舉似洞山山曰好個話頭祇欠進語何義三不問爲什麼不道曹又去進前語觀曰若言我道即啞卻我口若言我不道即塞卻我舌曹山歸舉似洞山山深肯之師云觀老與麼答話好則好矣然而也是君子善知識若待曹山再來云爲

什麼不道便打落渠嘴非惟洞山聞之不敢正視亦使曹山脫落見聞不只個般傳言送語

示衆舉大慧杲禪師歲旦上堂去年今日也只是者個前年今日也只是者個先前年今日也只是者個外前年今日也只是者個明年今日也只是者個後年今日也只是者個外後年今日也只是者個更後年今日也只是者個且道者個是甚麼元旦啓祚萬物咸新應時納祐慶無不宜喝一喝云俗氣不除師云作賊心虛

示衆舉僧問睦州如何是展演之言州云量才補職如何是不展演之言州云伏惟尚饗大慧禪師云睦州古佛善應來機雖然如是只得八成或有人問徑山如何是

卷二

三三

龍藏

展演之言即向他道問十答百有甚麼難如何是不展演之言喝一喝云且莫矢窖沸師云大慧老人土上加泥直饒道得十成是猶五十步而笑百步也若有問新報恩如何是展演之言不說一字如何是不展演之言其聲如雷

起不卧七示衆師拈拄杖云古者道大事未明如喪考妣大事已明如喪考妣你看大事已明尚是如喪考妣况大事未明者乎所以云參須實參悟須實悟直須廢寢忘餐向一念未生前識取自己廣大心體豈容魔外家亂承當個昭昭靈靈識神爲主人公大事未明如喪考妣人共曉得你道大事已明爲甚亦如喪考妣若透過者關方見過佛祖可與佛祖爲師如或不然

直饒大徹大悟如雲開月朗夜暗燈明識
自本心見自本性未免見齊佛祖減他佛
祖半德悟境不忘礙正知見如雪巖高峯
等於白日空閒廓忘知見之處中夜睡着
泯無夢想之時依舊打作兩橛剗地又透
不過既透不過生死岸頭便是樣子所以
從上來目爲向上一路末後牢關到者裏
豈許魔外家謬扯虛空粉碎大地平沉初
悟境界來扭捏顧左右云山僧怎麼舉揚
合喫三十拄杖今日倒行此令去也以柱
杖旋風打散

解制示衆師云端居一室含裏十虛諸人
若向含裏十虛處會得不妨一室端居若
向端居一室處透脫本來十虛含裏怎麼
則何長期短期復何結制解制所以道住

卷二

二四

也如孤鶴冷翹松頂行也似片雲忽過人
間要行便行佛祖不能知要住便住鬼神
不能覩現前大衆百二十日聚首還曾夢
見山僧也未未論見山僧與否還各各識
得自己麼咄出頭天外看誰是個中人

住古杭良渚大雄山示衆舉世尊纔生下
一手指天一手指地周行七步目顧四方
云天上天下惟我獨尊雲門偃云我當時
若見一棒打殺與狗子喫貴圖天下太平
雪竇顯云便與掀倒禪牀瑯琊覺云雲門
可謂將此深心奉塵刹是則名爲報佛恩
天童華云雲門此話雖行未免落他陷穽
黃面老子末上賣俏正是依草附木二俱
不了以左手拍禪床云過者邊着汝諸人
還知明果落處麼珊瑚枕上兩行淚半是

愚君半恨君師云激揚齟唱須是其人高山流水老釋迦何期得知音於異世雲門如百轉靈丹若非雪竇瑯琊誰能著價然而一椎百當須還應菴好手古人評書云如華嶽三峯卓立參昴雖造化之爐錘不

自知其妙也此言雖俗可以喻道

卷二

三五

示衆舉唐朝因禪師運椎擊土次見一大塊猛擊之應椎而碎豁然大悟有老宿聞云盡山河大地被因禪師一擊百雜碎應菴菴禪師上堂舉云老宿恁麼道縱知因禪師落處銜鐵負鞍有日在者裏著得眼去也是徐六擔板師呵呵大笑云直是好笑笑須三十年若人云更有一個好笑的在也許是個知音欲重宣此義而說偈曰冰雪峯前吐白蓮胡僧作梵禮金仙德雲

別嶺慙慙和笑破百泉鼻半邊
示衆舉石室見僧來拈起拄杖云過去諸佛也恁麼現在諸佛也恁麼未來諸佛也恁麼長沙云放下拄杖子別通個消息來圓悟禪師云石室置個問端不妨孤峻若非長沙爭得投機雖然只知恁麼不知不恁麼遂舉拄杖云過去諸佛不恁麼現在諸佛不恁麼未來諸佛不恁麼或若總道放下拄杖子我也知你只是學語之流生機處道將一句來師云一個綿包特石一個鐵裹泥丸放行則在廟之珪璋把住乃處堂之燕雀拈拄杖云恁麼也不是不恁麼也不是放下也不是不放下也不是卓拄杖云倚天長劍逼人寒是山僧尋常用處有能向者裏如龍得水似虎逢山便乃

分付柱杖子

示衆舉傳大士云終日焚香擇火不知身
是道場玄沙和尚云終日焚香擇火不知
真個道場圓悟禪師云終日焚香擇火不
知焚香擇火龍池幻祖云老僧年來無事

卷二

二十六

一味焚香擇火師云昔人問客緣不如竹
竹不如肉客云漸近自然知言哉似則似
鄉人有言曰千語千當不如一點

示衆師云諸方說些佛法消施主茶謂之
茶話古時亦有家風冷澹的或說小叅作
供大雄者裏一總不然尋常喫了粥飯便
與諸人說些佛法迺云挑磚的挑磚盤瓦
的盤瓦

示衆師云古人親承記莛後或十年二十
年不離左右深恐離師太早未盡其妙即

索居別處者皆茅茨石室大忘人世天子
不得而臣君相不得而友或形影相弔或
混俗和光或八請不赴或終身死關非種
種成就及迫於萬不得已安肯輕爲人師
哉山僧因梁木其顏免以鷄肋之力支持

大厦之危深自愧悔凡吾付授諸子非托
主持本寺或克本院頭首不倦不厭自利
利人儻馳情利養注懷名位學短販自鬻
者聚集數十不如已人誑惑愚瞽南面自
尊妄稱長老小叅示衆如同兒戲甚至濫

卷二

三

交襲已惟圖門庭熱鬧種種不遵山僧常
住規約者定行追拂嚴擯遠近咸知

示衆舉先報恩老和尚示衆云今朝四月
半農家秧好看堪笑懶禪和一事無可斷
開了兩片皮只是粥飯罐道眼不能明閻

羅要打算師云先師與麼道堪與人天爲師若要與佛祖爲師須某上座共出隻手始得看看七月半田家稻好看笑我懶禪和一事無可斷開了兩片皮只是粥飯罐道眼不能明說甚閻羅漢

示衆舉有僧持鉢至長者家偶爲犬傷長者因問龍披一縷金翅不吞大師全披法服爲甚卻被狗咬禹門幻翁禪師代云如長者者問無差師拈拄杖云師翁此一轉語非荆棘林中橫身直度逆行順行天不能知神不能測鑊湯爐炭中成等正覺刀山劍樹上轉大法輪者未許如水合水似空合空在卓拄杖下座

示衆舉南泉至莊莊主預備迎奉師云法會因緣第一泉云老僧居常出入不與他

知何風排辦至於如是師云放過不可主云昨夜土地神報師云布袋盛錐泉云王老師修行無力被鬼神覷見師云無智人前莫說侍者便問既是大善知識爲甚却被鬼神覷見師云韓盧逐塊泉云土地前更下一分飯着師云獅子搏兒不露爪落堂示衆師云古人道立地搆去坐地搆去大衆叅究多日還搆得麼僧禮拜云搆個甚麼師便打僧擬議師云似即似是即不是問僧你爲甚不扛木子進云某甲今日扛的師云扛木子的站過一邊一僧笑師拈棒云你見甚道理笑僧禮拜師連打兩棒云一棒打你笑一棒打你拜問僧喫得棒未僧擬議師打云眼睛頭事也照管不來問僧向父母未生前道來僧擬議師

便打師卓柱杖云大家莫作等閒看擲杖
歸方丈

結夏晚落堂示衆師拈柱杖云千尺寒潭
拋直鉤清風白月炤絲浮有時得意歌聲
發笑見魚龍一網收顧左右云炎炎六月
一團冰今夏教衆兄弟一個個凍得骨出
卓柱杖云切忌動着動着則三十柱杖便
乃定單而出

示衆師云一椎便就時如何未是性燥漢
不假一椎時如何不快漆桶汝衆人還用
打三不用打三衆無對師良久云誰人知
此意令我憶南泉

先磬山八大誕影堂示衆師云昨夜夢
見先老翁作大力善知識輕輕一彈指直
教盡大地情與無情一時百雜碎汝等諸

卷二

三九

人作麼生禮拜供養岳都寺云應如是供
養一僧云恩大難酬師乃云何不道恁麼
則與先老翁一箇鼻孔出氣去也衆作禮
退

陸山示衆大衆跪求開示師云汝等既爾
慇懃啓請應當日日如見我時聽說偈言
惟石有玉惟泉有珠得之則智舍之則迷
潤山輝淵念茲在茲

示衆舉百丈野狐公案暨黃檗瀉山問答
機緣師自頌云畫虎成狸竹成柳龍睛點
出拏雲走舉一明三有好兒當場齊作師
子吼有智主人俱不受大冶精金誰解剖
嘗聞一喝三日聾盧公擊破唾壺口示畢
召衆云一一識得古人落處麼識得百丈
易要識黃檗難識得黃檗易要識瀉山難

若識得瀉山便識得黃檗識得黃檗便識得百丈祇如瀉山三撼其門大眾作麼生會良久師自代云識法者懼

師落堂坐香示衆云坐香不許叅禪叅禪者三十棒坐香畢大眾作禮師云適來虛

空撲落地諸人還聞得刮刺刺一聲響麼

僧作禮師云且道兩京十三省磕破多少禪和子額角衆佇立無語師云叅禪底也三十棒瞋睡底也三十棒以拄杖左右打散出堂

示衆師云汝等到者裏須踏着本地風光莫爲幻妄身心所惑還知各各身子祇得百年受用麼若不踏着本地風光百年後渾無着落

示衆舉雲門云盡十方世界乾坤大地以

幾三

三十

拄杖一畫百雜碎三乘十二分教達磨西來放過即不可若不放過不消一喝師云用許多氣力作麼

示衆師云諸賢同居天目不忘開山六問甚善甚善新天目當爲開山作主先透新天目闕方許過開山關第一問上座大徹未第二問上座于佛祖公案幾則明幾則不明第三問上座是大修行人否上座守毘尼否第四問片雲遮日不遮日第五問踏着影子踏不着第六問如何盡大地是火坑山川人物作麼生

晚叅罷示衆師云不負瀉山不說破打鳳屠龍羅網大若人拚得學癡力盡和衣橫寶座橫寶座風轉搏空八角磨叅時舉上樹話示衆師云時當晚末邪法難扶盲引衆盲

相牽淪墜實心學道久住叢林者應知好
惡師子數人韓盧逐塊南泉斬猫作麼生
會衆久立師云識法者懼

示衆舉真淨上堂摩尼珠人不識如來藏
裏親收得既收得不護惜也要衆人見驀

卷三

三

拈拄杖擲下云還識麼若識燒沉水香供
養諸禪德明月炤見夜行人良繇不是他
家事叅師云大小雲菴向小兒前拍喔喔
師又云透過百丈三句須是者尊宿

示衆舉天真上堂道火被火燒道水被水

溺會禪被禪縛以手指左右云却被者僧
勘破師云真老與麼施展天然作家雖然
如是未免手忙脚亂

示衆舉唐州大乘遵禪師上堂云上來又
不問下去又不疑不知是不是是即也大

奇師云其時無量大衆一時成道

冬節示衆師拈拄杖云祖師闕欲透難行
努力行吾今明指示冬至一陽生卓杖休
去

示衆舉灋華舉禪師示衆云夫第一義諦
非智辯所詮非心機所測教外別傳不立
文字既到者裏復且如何直須坐斷毘盧
不存凡聖還能如是麼若也未能山僧重
說偈言去也不結毘盧印那弘古佛心明
月照幽谷寒濤助夜砧諸人委悉麼各希
發問衆問話畢舉乃云夫叅學須具擇灋
眼不得顛頑若得正眼精明一切無滯不
見古人道一句語中須具三玄一玄中須
具三要古人恁麼道意在於何鶯王擇乳
素非鴨類師云此古德第二門頭垂手試

看何等意句俱到

大覺音濟能仁玉琳琇國師語錄卷第二

卷二

三十二

音釋

屬

吉岳切音屬草履也

翫

陟應切音翫飛舉也

竊

竊雞切音竊雞也

駢

朱惟切音駢追馬也

陷

上平聲切音陷疾正切音淨坑坎也

鸞

余六切音鸞嶺賣也

大覺普濟能仁王琳秀國師語錄卷第三 幾三

嗣法門人行岳編

小叅一

晚叅師拈拄杖云我此山中一物也無石頭大的大小的小內外諸人每日出坡三兩度驀有個漢出來道和尚前言不應後語但向他道非汝境界顧左右云若也會得許你不較一粒米大盃喫飯不挂一縷絲終日著衣若也不會不是逐色隨聲即落解脫深坑大眾到者裏切須仔細良久

卓拄杖云叅

晚叅師拈拄杖云當初龐居士到百尺竿頭將謂見過於人開口便道不與萬法爲侶者是什麼人幸而其時諸方有人若遇如今狐狼野干之屬盲引衆盲見有百尺

竿頭坐的便道你已死了須透祖師機緣方是死中得活便教人胡穿亂鑿今日透者一則明日透那一則若怎麼豈不見笑一時遺臭萬世討甚蓋天蓋地好龐老耶然而也是當人肯入作家爐鞴肯求大手眼人鍛鍊始得你看龐居士見石頭問不與萬法爲侶者是什麼人頭驀掩其口於此有個會處慚惶不少未到大休大歇田地到江西馬大師處仍舊問云不與萬法爲侶者是什麼人馬大師蹋向前一步云待汝一口吸盡西江水方與汝道龐居士到者裏方纔命根子卒地折爆地斷放開窮肚皮海納百川七縱八橫千通萬達高步大方發一言令人不敢正耳聽著立一行令人不敢正眼視著師召衆云馬大師

進那一步諸人還見到也未若也見到方可與山僧拄杖子相見若未見到豈可衲子不如他俗人有麼有麼驀豎拄杖云吸盡西江且止只如山僧拄杖子作麼生吞良久卓杖云劍爲不平離寶匣藥因救病

卷三

二

出金餅擲杖出堂

十五夜小叅舉僧問趙州如何是祖師西來意州云庭前栢樹子師云報恩則不然有人問如何是祖師西來意但向道今夜一輪滿清光何處無

小叅師云山僧不指路頭一任諸人瞎闖諸人若也瞎闖得勇猛不顧危亡得失盡力闖將去驀然撞著峭壁巉巖磕破腦殼則一回知痛癢也未可知問諸人瞎闖則不問磕破腦殼時如何師云又慚惶又好

笑問磕破腦殼則不問爲甚又慚惶又好笑師云非汝境界

小叅舉眉州黃龍禪師僧問如何是密室龍曰斫不開曰如何是密室中人龍曰非男女相師云古人恁麼道山僧則不然如何是密室七通八達如何是密室中人長的長矮的矮且道與古人是同是別喝喝卓拄杖一下

卷三

三

仲春晚叅師云古者道靈雲見處不在桃華上且道他見處作麼生衆無語師云正所謂如將名品果子殼也去了核也去了送人口邊人不解喫

舉峰西堂秉拂師云昔日趙州云我在南方火爐邊有個無賓主話至今無人舉著噫直饒道閉門打睡接上上機也未若如

斯提持今時人聞舉著向上一路末後牢
關未嘗不商量浩浩地如說藥人真藥現
前都不能識淵明云平疇交遠風良苗亦
懷新東坡云非古之耦耕植杖者不能道
非吾世農不知此語之妙吾於趙州亦云

少間煩峰西堂對衆拈出

晚叅問答不錄師云早間森首座領衆請
法山僧道鐘動喫齋召衆云木包方外細
徹毫端帆正晴湘衡開九面出家兒造次
顛沛不離衣鉢之側端能與露柱同披一
領袈裟與山僧同一鉢盂烹饗也未此間
一草一木同證圓明胡爲有人自疑自別
損法財滅功德莫不繇茲心意識誠哉是
言也台山南岱宗北殊天異域之賓咸與
山僧晨香暮燈共分寥寂胡爲有人咫尺

闕山只爲分明極翻令所得遲不大可哀
乎昔日少林面壁二祖趨風寒庭立雪沒
膝齊腰何等心骨鼻祖尚訶爲輕心慢心
徒勞無益斷臂安心出羣得髓瞻彼前修
豈同裨販打一拂云精金百鍊自光瑩藥
汞從教誇耀冶

晚叅問某甲閱楞嚴至七處徵心有箇會
處師云咄此非汝心作麼生會進云某甲
無心師云較人矢橛不是好狗問光陰如
箭日月如梭如何了生脫死師云莫厚顏
師乃云莫謂無心云是道無心猶隔一重
關又有道說甚一重直是千重萬重既然
如是畢竟如何明心見性良久云山僧昨
在報恩示衆云古之天地日月猶今之天
地日月天地日月無古今之異禪道佛法

亦不應有古今之分爲甚麼古之知識千
百世之下凜凜常在在目前後之知識當
世現在每淹淹如九泉下人古之學者一
面瞥地耀古輝今今之學者今日有些會
處明日有些會處及乎生死到來依舊手
忙脚亂蓋道無同異同異在人今之發心
未嘗不如古人參究未嘗不如古人刻苦
未嘗不如古人用心到無用心處亦未嘗
不如古人但古人到無用心處決不望崖
而退百尺竿頭更能進步所以道懸崖撒
手自肯承當絕後再甦欺君不得今人到
千峰絕頂不惟不進步反退轉身來云吾
已死而得活了以了不可得爲究竟以擎
拳豎指爲透祖師關盡是懸崖縮脚種種
自欺去他古人遠之遠矣卓拄杖云有志

卷三

五

之士自知好惡

晚叅師云明道者多行道者少大小祖師
話作兩橛明而不能行明的事向那裏去
也諸人十二時中行的事作麼生良久云
遠菴一水聲常住擁榻千峰勢欲翔

早叅師云古者道莫被天下老和尚舌頭
瞞山僧道莫被天下善知識行履瞞祖師
門下客須確實爲生死口不嚼一粒米身
不挂一縷絲方可隨意穿衣喫飯眼中不
見一畫一豎耳中不聞一語一言方可隨
時寫字看書否則大事未明如喪考妣大
事已明如喪考妣如或生死心不切慎勿
出家縱出家慎勿來宗門何以故目下雖
未爲生死儻不輕易出家不輕易來宗門
尚知有出家事在尚知有宗門事在有等

造次出家來此宗門隨羣逐隊發意做工
夫如撞采的一般做幾時撞不著便一日
悠忽一日一時怠惰一時自己既然將謂
他人亦是如此謗大般若苦報無量有志
之士務須確實

晚叅師云同居在此不論久叅初學須各
各退步到真實不欺之地

晚叅師云龍淵今冬與大眾約法三章第
一飲水不得打濕口第二喫飯不得敲著
米第三經行不得撞著露柱

元旦知浴領檀越請小叅師云大眾知麼
汝等成佛以來已經無量阿僧祇劫舉足
下足其地堅固金剛所成上妙寶輪以爲
嚴飭寶池瓊閣奇樹珍禽樂具充溢無有
苦緣壽命無量光明無量法親無量如或

未知則不矜久脩不薄初學一念回光即
同諸聖若也根思遲鈍便請一念不生去
如或多知解多愚癡便請淨念相繼去但
辦肯心決不相賺雖然如是且道善財入
樓閣門爲甚入已還閉所以道如來不出
世祖師不西來汝等成佛已經無量阿僧
祇劫

晚叅師云昨夜行者通大眾晚叅山僧傳
語云大好月你諸人作麼生會僧云砍却
月中桂清光應更多師云矢上加尖衆又

立師云山僧自領三十棒

知浴古淵領海寧衆居士請解制紹興范
居士求釋憊同請小叅問答畢師揮拂云
人人殊勝箇箇淨明似鳥行空而昧空如
魚在水而忘水無瑕翳中自生瑕翳無障

緣處自生障緣結空花於無明樹頭有何
實果撈水月於昏沉海上徒見勞心既能
物外逍遙必須真源頓達苟知空門皈向
定應覺性洞明覺性明真源達方知罪垢
本空而無罪不懺法道本超而無法不成
大衆我不輕於汝等汝等皆當作佛下座
小叅師云昨日大衆晚叅山僧道洗清昔
日擔泉處所出當年面壁巖汝諸大衆各
各領悟也否聞斯提舉若能正眼洞開則
忙閒動靜一語一默著著有出身之路用
得十二時不爲十二時用轉得一切物不
爲一切物轉攪長河爲酥酪變大地作黃
金供養大衆不爲分外如或不然二時粥
飯齧須彌山子唇齒之間太費支持七尺
形骸挂氷稜鐵甲俯仰之際大有不便卓

柱杖

結夏檀越請小叅師云圓陀陀光燦燦淨
裸裸赤灑灑三頭六臂千手千眼而本無
一物純真一如無臭無聲而萬象縱橫閉
門打坐遍界不藏鬧市橫身孤巍嚴密諸
作紛紜而非動一物不爲而非寂違之者
自暴求之者愈失千賢萬聖趨向無門千
佛萬祖退身有分師以拂子打一下云誰
叅勝熱婆羅門六月霜花凝枕席下座
晚叅師云去聖時遙言高志下欲明格外
旨須盡域中情顧左右云大衆看脚下
晚叅師云劫火洞然大千俱壞未審者箇
壞不壞壞恁麼則隨他去也隨他去大隨
恁麼答話有甚長處投子望山禮拜衆無
語師云古之學者爲己以竹篋拍香案便

歸寢室

晚叅師云祖師時時在水桶上出現剛見人挑水走入水桶裏去也祖師時時在火鉢上出現剛見人燒火走入火鉢裏去也祖師時時在木魚上出現剛見人打木魚走入木魚裏去也祖師時時在鐘鼓上出現剛見人打鐘鼓走入鐘鼓裏去也良久云有人出來道和尚何得壓良爲賤山僧只要你怎麼道

小叅師云理無事外之理事無理外之事理外之事則愚事外之理則狂狂則爲魔所攝愚則爲佛所悲寧爲佛悲莫爲魔攝大衆來此祖庭必須立深誓願正知正見正路修行庶幾同證圓滿菩提

晚叅師云昔年大慧禪師因一禪子叅公

幾二

案不透乞求方便慧云你是福建人我爲汝說箇譬喻如將名品荔枝皮也去了核也去了送在汝口邊只是汝不解喫師召衆云當初大慧爲此一人設個譬喻此人當下敲破舌頭山僧因衆叅上樹公案重重相爲云緊夾藩籬寬闊道如何衆中未見有腳頭點地的乃云但辦肯心必不相賺更與汝等一個安心九子三文大光錢買得個油糞喫向肚裏了當下便不饑晚叅師顧左右云今日晚叅不許問話不問話者三十棒衆擬議師云自從立雪人歸後幾片白雲護翠岑

幾三

九

結制古淵知浴領海寧衆檀越請小叅問爐鞴大開不留鈍鐵金鎚揮擲萬竅通明還許學人立地成佛也無師云進前來喫

棒進云與麼則滾入紅爐大冶中直得通
身無縫罅師云許汝胆大問得祖宗之髓
登祖宗之堂敢問和尚昔日僧問臨濟如
何是奪人不奪境濟云煦日發生鋪地錦
嬰兒垂髮白如絲爲甚本山中祖道錯師
云一對無孔鐵鎚進云與麼則二大老料
揀一齊蒙和尚指示去也師云與汝六十
棒問如何是法王正令師云千鈞之弩進
云與麼則人人沾恩個個得力師云已放
過居士問不侶萬法不取凡聖事如何師
云佛子受佛戒即入諸佛位師乃云天目
山下無寸土天目山頭無片雲脚跟跏趺著
寸土有寒暑今促君壽有鬼神兮妒君福
眼中見有片雲風力所轉終成敗壞且道
住此天目山如何行履即得虛空拍手呵

呵笑報汝人人淨法身聞斯告報直下承
當如來禪許汝會更須知有祖師禪始得
且道如何是祖師禪薦喝一喝隨聲以竹
篋撫案一下

晚叅師云祖師示現全身向汝諸人毛孔
中念普字真言汝等盡見盡聞麼一僧喝
師云胡喝亂喝乃云分明指出平川路却
奈忠言逆耳何

除夕晚叅師拈拄杖召衆云識得拄杖子
麼一日不爲少千載不成多小則蠅螟眼
裏橫眠大則乾坤西傾東闕出息不隨衆
緣入息不居陰界試看先宗是何標格你
有拄杖子與你拄杖子你無拄杖子奪你
拄杖子

晚叅師召大衆云莫瞌睡

石庭晚叅師以杖指一碎石云者石版如何沒一些縫良久又指一完石云者石版若爲有許多縫一僧云謝師指示師便打乃云今時學者有兩種錯路一種錯路的

問著便道喚什麼作燈籠一種錯路的問

著便道露柱沒一點縫是者兩般錯路便

掩蔽却人人本地風光若不躡著本地風

光終不能免此兩種錯路今日不惜眉毛

說似諸人豎拄杖云山僧拄杖子有九千

九百九十九隻眼顧眎左右云更有一隻

不與你們說盡何故若教容易得便作等

閒看

晚叅師云吾觀大衆盡與佛祖無二無別

但存人我自生間隔所以祖師示衆誦金剛般若經上根者一聞千悟後來祖師教

十二

十一

人叅死了燒了話父母未生前話便是將一卷般若經括作一句教人持念汝諸大衆須在佛祖路上行方到佛祖田地若四相未空徒勞無益各宜珍重

晚叅師云山僧說得一篇佛法懸在兩華

橋上大衆各去看取良久云伯樂會三顧

千金誰解增贈君君不納完璧倚枯藤

晚叅舉傳大士道空手把鋤頭步行騎水

牛人從橋上過橋流水不流師云天目則

不然生鐵打鋤頭披簑收水牛人從橋上

過水流橋不流且道傳大士的是山僧的

是良久云朝叅暮請緣何事應須立透祖

師關

早叅舉六祖云本來無一物長慶云萬象之中獨露身師云孫必類祖大衆會麼拈

柱杖旋風打散

晚叅師云汝諸大衆多有廣遊人間世徧禮諸名山的多有叅遍諸方又親知識的多有諸方許可記莧的我不問汝別樣佛法只有一句極平常最要緊的話問你且

道者一時香在什麼所在坐良久云衲僧在處如火消冰終不却成冰若道有香可坐有坐的人有坐的所在莫道你廣遊博禮叅方受記直饒你向世尊肚中轉一過來也只是箇能仁的矢橛各各自揣摩道箇驚人句看顧視左右震威一喝

小叅舉世尊九十日在忉利天爲母說法及辭天界下時四衆八部俱住空界迎有蓮華色比丘尼作念云我是尼身必居大僧後見佛不如用神力變作轉輪聖王千

子圍繞最初見佛果滿其願世尊纔見乃訶云蓮華色比丘尼汝何得越大僧見我汝雖見我色身且不見我法身須菩提巖中宴坐却見我法身師云大小世尊抑强爲劣山僧若見蓮華色比丘尼但云汝真能現大人相殷勤見我若須菩提巖中宴坐乃是閉門作活豈能見我全身薦拈拄杖云還有爲世尊作主的麼有則出來各出人一頭地卓拄杖云好手豈容無妙拍三臺須是大家推

卷三

上

小叅舉趙州問南泉知有的人向甚處去泉云山前檀越家作一頭水牯牛去師云長帶新婦拖泥走州云謝師答話師云帆隨湘轉望衡九面泉云昨夜三更月到牕師云向上一路千聖不傳

晚叅舉僧問趙州如何是佛州云殿裏的

師云古佛恁麼道可謂眼空四海

晚叅師云解制來走動的走動各執少人
久住者未免辛苦汝諸大衆如何得不爲
境轉一僧云心如木石師笑云說到行到

卷三

十三

吾爲汝保任此事終不虛也

早叅師云有一人日勤衆務一物不爲有
一人一物不爲日勤衆務且道那箇作家
一僧出師打退又一僧作禮師亦唱出師
通云有叟情相似日香夜夜燈

晚叅師云如淨琉璃內外明徹凡見道者
若身心世界果如淨琉璃內外明徹方是
真見本來面目的人不然徒自欺耳生死
到來悔將何及不見道吾心似燈籠點火
內外紅雖非依樣畫描却是一鼻出氣

晚叅師云秋來好坐禪賢衲莫亂走各得
坐具地他年大開口且得地一句作麼生
道父母所生口終不爲人說

燈節知浴同王檀越請小叅師云如淨琉
璃內外明徹光逾日月量裏太虛探之不
見其初避之莫究其極山河大地即之靡
不消鎔明暗色空捨之無以建立神鬼不
能觀賢聖不能知潔之不新垢之不故蟬
動不滅佛祖不增謂之爲微普天而地謂
之爲顯朕蹟不留指爲智珠闡然日著目
爲福嶽坦然日尊召大衆云我見燈明佛
本光瑞如此

戒私看文書晚叅師云上三畫長下二畫
短天左旋地右轉日月照臨乎其上的龍象
奔走乎其下高出無頂天深逾香水海無

論智愚賢不肖識得者個字宣聖孟子拱拱手讚歎釋迦不在前彌勒不在後奔軼絕塵今之古之誰敢與偶好大哥直截根源尚迂曲尋枝摘葉復何如

小叅問話畢師云一片清涼地安閒絕比倫往來及住衆舉步莫迷津衆久立師震威一喝下座

小叅師云有一無事人終日忙鹿鹿有一精進漢長年訥且木如是二人中有一人堪與人爲師汝諸大衆出入好看良久云寂光真境何嘗遠同在琉璃國土行下座立春因事小叅師云春風吹春雨潤忽地園林秀且媚無根樹子也開華試問禪家會不會顧左右云若也會得佛法叢林時時茂盛若也未會禪林秋晚卒風暴雨頗

幾三

十四

多衆兄弟善自護持莫被風力所轉卓柱杖出堂

元宵小叅師拈拄杖云衆兄弟一年又過了半個月矣流光易度幻質非堅生死到來如何抵敵聞恁麼道拽下地去痛打一

頓方拂著某癢處然而實具個般手眼始得若有一毫虛妄則其上座緩緩地走起來向你道個因見你眼目定動連棒打折你驢腰也未肯放在苟不自欺簡點眼光落地時未親見不變不遷無晦無明的真

幾三

十五

面目生不知來處真個生大死不知去處真個死大把此生死大事切切在念叅究一個無意味話頭孜孜不捨叅而不透生死未了當入室中喫其上座痛棒叅而透生死已了當入室中喫其上座痛棒爲甚

如此高擎拄杖云棒頭有眼明如日要識真金火裏看拽杖出堂

小叅舉僧問睦州如何是急州云通你一問進云如何是急中急州云朝向西瞿耶尼暮向北鬱單越師云者老漢恁麼答話非但頂門具金剛正眼抑且脚下有通天活路然而說佛法各有時節因緣新報恩則不然若有人問如何是急但向道近日厨中少油沒醬更問如何是急中急但向道錢糧既難處戶役更難何且道新報恩恁麼答話與古人是同是別有知得落處的出來道看顧左右云若知落處則便知得大法的人無時無處不可扶豎佛祖綱宗叢林富足也好叢林澹薄也好住現成叢林有遺米遺銀也好住苦難叢林有遺

債遺累也好初復叢林要墾土掘地搬石運木也好叢林完備安閒樂道也好若未知落處便迺汨沒塵勞擾攘中住富足叢林色色週全前人有遺米遺銀也苦住苦難叢林事事虧欠前人有遺債遺累也苦衆兄弟大家在者裏撐老漢難撐之門行老漢難行之事切須甘澹薄忘勞苦必要究明大法一朝力竭工圓便見無油菜裏也走出老漢來亂石堆裏也走出老漢來土木堆裏也走出老漢來便見老漢說誠實言向衆兄弟道正月廿二早某上座把如來正法眼藏分明揭示大衆了也且道如何是今早分明揭示的正法眼藏卓拄杖云心不負人面無慚色

衆禮千佛懺小叅師云昨晚丈室坐久展

手剔燈忽見三千諸佛在指甲中揚聲大
叫小長老謂之曰你者等不情漢大衆連
夜在殿禮你何得隱在者裏亂叫喚諸佛
復高聲曰阿哪阿哪你還不知大衆道禮
我等懺罪誰知止增益罪過小長老驚視

卷三

十六

之曰因甚如此諸佛曰你莫驚異試問禮
佛大衆還見我等是怎樣面孔是那樣身
相若總未見而云禮佛豈不造大妄語應
墮地獄佛語未竟護法韋馱尊神擎山持
杵從牕眼走入白諸佛曰諸佛世尊莫作
是說近有一等狂禪和開口便道無佛無
祖撥無因果招殃惹禍今佛更道禮佛者
增益罪過未免爲豁達空者張本永造無
間業去也諸佛曰咄我等各分身萬億在
一切人八萬四千毛孔中橫入豎出又豈

卷三

十七

可道無佛若作是解更入地獄如箭射兩
相理論不已小長老夜深欲睡鳴指一下
一齊逐退今日不可不對衆決斷召衆云
若道禮佛還會見佛也未若道無佛可禮
如何說無佛的道理於此透去一任你道
有佛可禮也得無佛可禮也得小長老敢
保你禮佛諸佛不敢正眼視著說無佛諸
佛不敢正耳聽著不然盡是造大妄語當
墮地獄的漢子莫言無人說過驀拈杖云
者兩種人喫得痛棒皆可因邪打正更有
一等知有佛而甘心不見佛懶惰不禮佛
正如焦芽敗種那有喫棒分擲下拄杖
小叅師拈拄杖云千日竝炤那有一毫隱
晦處虛空通達那有一毫隔礙處某上座
在母腹中便轉大法輪出頭斯世阿誰謾

得到磬山見先師和尚亦有甚奇特處敢
誑謔人諸方珍重傳受辛苦叅討的五家
宗旨一齊勘破縱顛縱狂輕佛慢祖自號
無師子不意先師肯我是狂竟付生平不
輕付之拂子拜違荆谷掩室江干因磬城

請先和尚先師不赴請寄書某上座言有
未後付囑某上座呵呵大笑因破關來見
先師叉手問云狂兒國土父不容過者個
峯頭還是老漢住處麼先師云且站下脚
與你道某便掀倒香案而出先師高聲云
將拄杖來某遙聽得笑云劍去久矣室中
復理論多端一日先師上堂維那擬白椎
某便喝住云待我問了話白椎問云昔日
黃檗道大唐國裏無禪師如今大明國裏
還有麼先師拈拄杖作打勢云看棒某便

喝先師亦喝某復喝一喝轉身云不是狂
兒多意氣祇因曾透上頭關便出先師又
喝某亦喝遙聞維那重白椎某迺高聲云
歎死氣吁嗟乎仰山道的誰是知音先師
示寂便欲縛屋萬峯誰意有此不了公案
衆居士等堅請爲先師了卻某上座既到
者裏必欲衆兄弟洞明大法不向他人行
處行若不奮大人志氣不知道出常情向
瞎老禿口角邊覓涕唾喫聽他說黃道黑
只管記憶思惟日久月深多成異解或認
穿衣喫飯舉足動步的爲自性或以暫歇
塵勞爲究竟直饒得見法身竿頭進步那
邊會得者邊行履見與師齊減師半德要
透末後牢關未_{幾三}在_{十八}未_{十八}在且道知有末後一
著如兜率悅張無盡時如何吐雲菴老人

在你脚下且置是事昔日白雲端禪師已肯五祖演悟處迺未幾時忽語之曰有數禪客自廬山來皆有悟入處教伊說亦說得有來繇舉因緣問伊亦明得教伊下語亦下得祇是未大疑私自計曰

卷三

十九

既悟了說亦說得明亦明得如何卻未大疑遂叅究累日忽然省悟從前寶惜一時放下走見白雲雲爲手舞足蹈祖亦一笑而已如今妄爲師範的老禿奴還有個般手眼鍛鍊人麼奔南走北漫稱叅學的無慚

愧漢還受得明眼作家如是鉗錘麼若不識古人者個作畧則馬祖喝黃檗棒興化罰擯一槩意思閒放過爲師者見人畧有些見處便與他一個冬瓜印子學者無大人志氣要人許可便入邪師圈續豈不大

可哀哉盲引衆盲解說五家宗旨分而不分不分而分面皮厚多少本子上念將去口傳耳受去欲扶持從上綱宗真可憐生還曾夢見古人汗臭氣麼一僧出衆云和尚又作麼生道師云若有所道何異邪解僧禮拜師連棒打云切忌謗我迺顧左右云纔見某上座欲提持此事便推翻香案拗折拄杖令某上座無開口處猶較些子若如此總受人謾了也更討甚麼盃棬杖歸方丈

小叅師拈拄杖云于鈞之弩不爲鼯鼠發機萬丈之絲縵爲鯨鯢設釣有麼良久云大丈夫莫自遲疑莫自間隔似鳥飛空何東何西而不空如魚在水何順何逆而非水其上座者裏並無實法與人亦無定法

限人不起期結制畫地爲牢不做樣粧模
誑謔愚瞽行的一任行坐的一任坐其上
座敢保諸人坐也釋迦彌勒左右侍立行
也飲光達磨前後追隨無人無時不向毘
盧頂上行有甚禪可參有甚道可學祇是
諸人亦有自己放不過的還知病根在甚
處麼豎拄杖云人既自放不過拄杖子亦
不放過看取打草驚蛇舉僧問乾峯十方
薄伽梵一路涅槃門未審路頭在甚麼處
峯以拄杖畫一畫云在者裏僧又問雲門
門迺拈起扇子云扇子跨跳上三十三天
染著帝釋鼻孔東海鯉魚打一棒兩似盆
傾師云者則因緣議論的類牛毛判斷的
同兔角其上座不怕諸方簡點分明判斷
去也者僧終日長安更向旁人問路所謂

幾三

二十

道在通而求諸遠事在易而求諸難忒殺
癡狂那堪乾峯雲門不與本分草料雖各
是一等爲人未免轉轉鈍置若報恩門下
有人出來問十方薄伽梵一路涅槃門未
審路頭在甚麼處便劈脊打出或其忽爾
瞥地自合知羞焉喝一喝以拄杖拍香案
一下歸方丈

懸板小叅師云虛空雖久此板彌堅天地
雖弘此板彌大徧法界無內無外亘古今
不變不遷晝夜六時出微妙音成殊勝事

幾三

主

聾者聆之耳根圓聞瞽者睹之目根圓見
病者繇之得瘥苦者繇之停酸一切縛著
者莫不繇之解脫然而全憑有福慧人一
念信心一念肯心彰著如是不思議事當
知錢居士鑄此報恩禪寺香積堂大板頭

令十方世界齊成大板恒沙佛土舉凡香
積堂大板一時成就新報恩擊此大板而
此板無刻無地不鳴如斯見徹方顯我宗
檀越迴異尋常我宗真個道出常情不同
流俗見解不是粥飯師僧且道既是十方
世界都成大板喚甚作十方世界既是十
方世界又如何說個都成大板的道理到
者裏須是舉一明三目機銖兩所以道事
是過量事人須過量人但得過量人自明
過量事鳴板云知音不用頻頻舉識者應
知暗點頭

懸鐘板小叅師指鐘板云倩二上座爲大
衆早晚發機普願若遠若近見者聞者同
露柱知音共舉盤唱和喝一喝休去
早叅師云臨濟大師道有時奪人不奪境

有時奪境不奪人有時人境兩俱奪有時
人境俱不奪今時學者大法不明開眼作
夢一味依樣畫貓何異韓盧逐塊召衆云
切莫見說奪人不奪境但向境上粧點兩
句見說奪境不奪人但向人上粧點兩句
要明濟上綱宗須識取有時二字始得有
時奪人不奪境你作麼生領覽有時奪境
不奪人你作麼生擔承有時人境兩俱奪
你作麼生當抵有時人境俱不奪你作麼
生步趨山僧不惜眉毛更爲諸人領出奪
人不奪境滿栽華柳風醉遊人疎影橫斜
逋客獨醒奪境不奪人脫帽忘鋤羅敷有
夫五馬踟躕使君何愚人境俱奪破楚鞭
屍逆行倒施我必復之秦爲出師人境俱
不奪桃華夾岸雞黍延賓洞口逕窄人誰

問津顧左右云久立珍重

晚叅師云僧問趙州如何是不蹉路州云識心見性是不蹉路師左右顧視云心作麼生識性作麼生見良久拈拄杖云敢來者裏瞌睡旋風打散

幾三

主三

小叅師云昔日香嚴禪師垂語云若論此事如人上樹口銜樹枝脚不蹋枝手不攀枝樹下忽有人問如何是祖師西來意不對他又違他所問若對他又喪身失命當恁麼時作麼生即得如今人盡道達磨大師無當門齒殊不知香嚴老子倍甚有人識得先聖赤心片片山僧當將山河大地捏作一個大饅頭以爲供養高聲召大衆驚歸方丈

晚叅師云昔日達磨大師到東土來指示

幾三

主三

人云心如牆壁可以入道如今許多大衆在者裏有幾個心如牆壁的如何得入道若有透得過的出來與拄杖子相見我也不敢鈍置你若透不過也不得孤負達磨大師來者一番良久師云久立珍重

長至日舉勇首座立僧小叅師過云如何是正法眼破砂盆只者一轉語三玄五位縱橫父子體用殊特目前包裹天長地久日月齊明一鏃破三關雲從龍風從虎恁麼會得可與建法幢立宗旨然而未明向上竅在且道如何是向上竅問取堂中首座勇

小叅師拍香案云山僧等閒一拍山河大地明暗色空情與無情一時百雜碎祇有一個頑禪和打不死無如之何衆中有高

明的出來爲我設個方便拈拄杖云木上座出來道某甲有個方便罰他向飯籬邊餓死大海裏渴死師呵呵大笑云上座你者樣說話慈悲耶惡毒耶擲拄杖云從教彼禪和自己簡點

元旦小叅問證得虛空時無是無非法請問虛空作麼生證師云梅清滿谷問新年頭佛法古人道有道無和尚者裏又如何師云前谿水急後嶺風高師迺云昨日法座已爲諸人說法了也諸人還信得及麼若信得及則普天同慶若信不及未免堆華錦上起身云新春兩序頭首合寺大衆起居萬福

晦日晚叅師顧左右云三冬一月去水牯尚顛頑坐香人瞋睡露柱腿生酸諸上座

好生觀青山踣跳谿聲住柴牀木枕語喃喃

望日早叅師云禪林秋晚學道之士貴乎一切真實顯爲生死不爭人我是發心真實切問近思不學虛頭是叅問真實一一

從胸襟流出蓋天蓋地是禪唱真實好賢樂善成人道業是領衆真實省虛文務誠敬是禮貌真實誠浮華崇節儉是日用真實遠奸佞近仁厚是交接真實明因果識罪福去害除弊是任事真實甘澹泊恥謀

幾三

二十四

求是家風真實更有一處真實一發與諸人道破大抵還他肌骨好不搽紅粉也風流

舉森首座立僧小叅師拈拄杖云山僧有時一句子在諸人日用中諸人若向日用

處會未免觸途成滯山僧有時一句子無
你諸人用心處諸人若向無用心處會未
免當面蹉卻山僧有時一句子八角磨盤
空裏走諸人若作八角磨盤空裏走會轉
見白雲萬里所以道一句中具三玄一玄

卷三

三

中具三要有權有實有炤有用千日竝炤
不足喻其明千雷竝吼不足喻其威第一
句中薦得方可與佛祖爲師且道如何是
第一句卓柱杖云問取堂中森首座

晚叅師云今時學者每易自足少有久長
親師擇友的即親近人亦少朝來暮究日
臻玄奧的自足之患最爲法門大禍山僧
午夜時零風穴之淚惟恐穿鑿顛頑順朱
填墨三種弊病復見於將來佛祖大法真
有絲懸九鼎之危此間兄弟深造極詣者

亦豈能多得然耐長忍苦未嘗無人祇如
臨濟大師道大凡演唱宗乘一句須具三
玄門一玄門須具三要有權有實有炤有
用汝等作麼生會還有人看破臨濟大師
也未聽取山僧頌出舉尾知頭南泉趙州
月來昨夜去矣君候敲空作響還哉瀉仰
不負耽源燒卻圓相回互不互石頭滑路
弗會佛法東西密付人來面壁手眼通身
高山流水別有知音輟出木球爍破髑髏
收來舊處把櫓看鉤吸盡西江全生全殺
奔逸絕塵鞭影一踟躕直饒山僧恁麼道要
夢見臨濟大師汗臭氣也未在薦卓柱杖
喝一喝

晚叅問世尊拈華迦葉微笑笑個甚麼師
云敲人矢橛不是好狗師迺云盡十虛渾

成一塊頑鐵多少人自生穿鑿自生契跌
屈千里卻同風對面不相識

解冬小叅問答不錄師迺云盡大地撮來
粟米大不會打入普請看古人恁麼道如
將百二十斤擔子加在諸人肩上若是承
當得的各各安家樂業如或未然一任東
觸西觸

檀越請小叅問共聞無量壽佛名未審無
量壽佛在何處安身立命師云塔下五湖
源師拈拄杖云濶濶秋空遠海山崑崙青
裏糧明祖意拈出萬年藤卓拄杖喝一喝
下座

冬至晚叅師云學道者學至無可學說法
者說至無可說何故聲學道者求了生死
殊不知本無生死了甚生死若言有道可

幾三

二十六

學有生死可了斯人未在這說法者因人迷
妄執有生死爲說悟法示了生死殊不知
本無迷悟何法可說若言有法可說有生
可利斯人未在這雖然如是直饒山僧恁麼
道合契三十拄杖汝等諸人上來下去好
不丈夫以拄杖旋風打散

晚叅師云拈華微笑肇祖開宗數千年來
源深流遠青出於藍代不乏人或拈或頌
或抑或揚日月光天德山河著地靈殊不
知清光萬古穿鑿浮雲讚歎也讚歎不及

幾三

王

評論也評論不及抑之如打水平江揚之
如負土足嶽師迺監拂召衆云大衆道看
良久云一絲寒撒千江外漠漠魚龍動地
雷

元旦小叅師云雲鋤雪築氷卧風餐忙忙

百十僧個個無一事壬辰正月一山僧普
爲大眾一切授記長者長法身短者短法
身佛子住此地則是佛受用經行及坐卧
常在於其中

結制小叅師云十方無壁四面無門一念
萬年古今不異有甚堂內堂外說甚結制
解制諸禪客丘壑人須自有一盂靜撥煙
霞

晚叅舉趙州勘婆話師云僧問臺山路如
何云驀直去僧便去如何云好個師僧又
恁麼去也前來師僧也恁麼後來趙州也
恁麼那裏是看破處一僧作禮云打鼓普
請看師云罷侗禪和如麻似粟一僧云昨
日晴今日雨師云三十棒且待別時一僧
云車不橫推理無曲斷師云多少人恁麼

道打出去也師迺云聽取山僧重說頌言
十五日前用錐便十五日後用鉤捷正當
十五日鉤錐一齊歇一個失錢遭罪一個
弄巧成拙是他過量人荒草深深入

晚叅衆問話畢師良久顧左右云南閻浮
提石頭大的大成佛小的小成佛汝等諸
人爲甚在此粧村以拄杖旋風打散

解制小叅知浴問今日小叅事如何師云
念汝辛勤進云某甲一口吞盡山河大地
諸佛還有站身處也無師云恁麼施主得

幾三

二六

安樂師迺云道人降世無非與人作同事
攝羸衣蔽體糲食充饑此外復有何事毫
釐繫念三塗業因瞥爾情生萬劫羈鎖如
人飲水冷煖自知前日同衆坐三因僧舉
鷲飛戾天魚躍於淵山僧徵云作麼生說

察的道理如今有人下得語麼衆答話畢

師云山僧自道取黑

住細谿扣水小叅師拈拄杖云百草頭釋

迦努目開市裏彌勒攢眉三家邨裏廖胡

子惡發衝破三十三天琉璃殿角壓碎南

海波斯大姆指且道什麼人解救得良久

卓拄杖云叅

晚叅師云昨日齋主請小叅山僧云端坐

受供養施主常安樂大衆還會麼若也會

得十方薄伽梵一路涅槃門釋迦不在前

彌勒不在後如或未然喫水防噎喫醬防

渴

草菴晚叅師高聲召大衆衆無語師乃云

點即不到衆僧競出問話師左右顧視云

入戶已知來見解何須更舉轆中泥拈杖

打散

江上敲山菴小叅師云今時人學道如在

洪波大海中中有吞舟之魚旁有羅刹鬼

國岸有罔人修羅天際真人遺下鐵葉方

寸許有智之士穩坐飛渡始得如或捕影

撈空難免羅刹鬼國等難古德云禪乃無

文字之教教乃有文字之禪端能明教定

許會禪若不會禪焉能明教何以言之教

乃佛語禪乃佛心不明佛心而會佛語有

是理乎祇如圓覺經云居一切時不起妄

念於諸妄心亦不息滅住妄想境不加了

知於無了知不辯真實如今人於此等言

句容易看得過殊不知醍醐毒藥毫釐有

差天地懸隔未入道者居一切時如何不

起妄念既不起妄念如何於諸妄心亦不

息滅此如茫茫大海中渾無著落者是也
有等一知半解得少爲足者便道逢飯喫
飯要困便困淫坊酒肆不礙菩提逆行順
行一切不管所謂豁達空撥因果莽莽蕩
蕩招殃禍此如不莖吞舟之腹即墮羅刹
修羅之手山僧不惜眉毛爲人頌出竹露
團光漾碧湍幽人琴罷倚闌干隔溪風轉
茗花白對對青蟲撲水寒

晚叅師云天氣漸寒與大眾每人一箇大
火爐還各各受用得著麼良久云莫將閒
意解埋沒祖師心

晚叅師云汝等諸人莫好高務奇莫趨難
行險但把身心世界一齊放却正恁麼時
看是甚麼境界驚喝一喝云道明上座騎
大庾嶺向諸人八萬四千毛孔中橫入豎

卷三

三十

出見有多人不薦却向曹谿禮拜六祖大
師全身去也

晚叅師云看看山僧一口吞却諸上座了
也諸上座還聞得山僧矢臭氣麼良久驚
掩卻室門

丙申佛誕小叅師拈拄杖云三年不事事
強起答羣賢未了先師案塔根卧冷煙衆
問話畢師云告汝大眾同此荒寒岑寂叅
禪莫作叅禪會行行莫作行行會行行若
作行行會未免隨邪逐惡觸途成滯叅禪
若作叅禪會未免眼中著釘面門塗炭直
饒雲門道釋迦老子初生一手指天一手指地
週行七步目顧四方云天上天下唯
吾獨尊山僧若見一棒打殺與狗子喫貴
圖天下太平切忌承虛接響何故我王庫

內無如是刀高聲召云大眾驀卓拄杖一時打散

結制夜小叅師云告汝內外大眾普請無動無靜絕情絕解各各圓證自己本來面目從上佛祖是汝兒孫三乘十二分教是

幾三

三

甚拭不淨紙自是不歸歸便得故園風月有誰爭

晚叅師云古德見人入門便棒我者裏爲甚麼容許多人住衆無語師驀喝一喝云把住直教龍象畏放行且與鳥禽閒

晚叅師拈拄杖云汝諸大眾各住不思議之地爲甚自討許多生受不能得大解脫衆擬議師震威一喝云散去

晚叅師云一日三食把施主好茶飯盡成渣滓一月六叅把先宗標格盡成世諦流

布蒼天蒼天

晚叅師云趙州老漢面目現在且道作麼生與他相見驀喝一喝乃云聽取重說頌言道有道無心甜口苦告汝諸人莫莽鹵仔細隄防大雄山下虎

歸報恩晚叅師云有人走到拄杖子下來不與他拄杖子喫有人迴避拄杖子卻與他拄杖喫且道喫拄杖子的是不喫拄杖子的是後堂云知音不必頻頻舉達者須知暗點頭師休去

檀越請小叅問答畢師卓拄杖云大眾會麼若會則靈山一會儼然未散如或未然則金剛圈栗棘蓬作麼生吞作麼生透舉拄杖云看看汾陽祖師來也一句明明該萬衆重陽九日菊花新擲拄杖喝一喝下

座

檀越請小叅問答畢師拈拄杖云學般若菩薩須識取真子真孫識得真子孫便識得真父母識得真父母便識得真自己識得真自己方知無死無生無聚無散無苦

無樂方知本無自己本無父母本無子孫本無天地本無萬物本無佛祖本無衆生不妨於此中示有佛祖示有衆生示有天地示有萬物示有自己示有父母示有子孫示有生死示有聚散示有苦樂方知示有苦樂本無苦樂示有聚散本無聚散示有生死本無生死示有自己本無自己示有父母本無父母示有子孫本無子孫示有萬物本無萬物示有天地本無天地示有衆生本無衆生示有佛祖本無佛祖夫

幾三

三十二

是之謂真佛祖夫是之謂真自己夫是之謂真父母夫是之謂真子孫豎拄杖云以此舉揚般若之力回向法界有情齊圓種智卓拄杖喝一喝下座

開山老和尚忌日早叅師云清淨法身本無出沒大悲願力示有去來古人恁麼道山僧則不然大悲願力本無去來清淨法身示有出沒

初八晚請小叅師云彌勒真彌勒分身千百億時時示時人時人自不識現前諸賢

幾三

三十三

還識得大肚皮老漢麼若識得布施一句子與大衆結緣如無人道山僧自道去也中旭上座到處作齋不曾供養一人山中大衆兩度喫饅頭不曾咬著一些麪師復云結制在邇更有一事白汝大衆本山半

月半月誓神務在清衆同居各須戒行清
楚因果分明若或未然未結制前速自起
單羯磨證戒非同兒戲

丙申冬過大雄晚叅師驀喝一喝衆禮拜
師云半得半失

師歸報恩檀越請小叅師云祖師西來別
無奇特祇要當人信得自己是佛見自本
來面目祖師門下客若不離心意識絕聖
凡路如何得見本來面目所以祖師又示
人向未生前薦取堪笑堪嗟十箇五雙口

說未生前祇向生後着倒上等外道以了
不可得爲究竟無面目爲真面目此在生
後着倒了也下等外道以運轉施爲爲本
來面目此在生後着倒了也中等外道以
覓時則無用時則有爲本來面目此在生

後着倒了也不見臺山婆子他雖是箇婦
人宛有丈夫之作僧問臺山路向甚處去
婆云驀直去僧便去婆云好箇師僧又恁
麼去也趙州老漢不肯孤負他謂衆云臺
山婆子我與汝勘破了也此如千年古鏡
經磨而愈見光明百鍊精金遇煅而彌呈
光彩多少隨邪逐惡依語生解者胡拈妄
舉還知錯下一轉語墮五百生野狐身麼
所以道識法者懼

卷三

三十四

晚叅師云僧問雲門一念不生還有過也
無門云須彌山大衆還知好惡麼後來雪
竇顯禪師問智門云一念不生爲甚麼有
過門召近前竇近前門便打竇擬開口門
又打大衆還知棒頭落處麼良久云龍躍
桃花浪癡人半夜塘

晚叅師顧視左右云大家在者裏各各不
得自暴自棄良久云看脚下

大覺普濟能仁玉琳琇國師語錄卷第三

音釋

闖丑禁切 永胡孔切 莽洪 鹵上母黨切
探去聲 上聲 水銀 茫茫上聲下
郎古切 音魯莽 庫荒故切 呼去
由輕脫苟且也 聲杆水器

大覺普濟能仁玉琳琇國師語錄卷第四 幾四

嗣法門 人行 岳編

小叅二

檀越請小叅田單問如何是出身句師云
堂外禪坐堂內坐禪值性問生死到來如

幾四

何抵敵師云三世諸佛不知有進云目前
一着子不得縱橫過在甚處師云狸奴白
牯卻知有問以大圓覺爲我伽藍如何是
大圓覺師云近前來與汝道僧擬開口師
便喝僧又申問師便打問凡所有相皆是
虛妄爲甚有山河大地聲未絕師便打又
僧出師亦打僧退師乃云山僧未出方丈
早已知歸猶是不唧溜灤更待向前喫棒
得與麼不知痛癢然而既到者裏且聽山
僧說夢山僧閉門打睡夢坐一道場彷彿

浴佛前後薰風天氣遠近緇素設供甚盛
山僧因齋慶讚訖聞行殿際歸坐法堂走
出一巍巍堂堂副寺來禮拜起出廣長舌
相吐舌覆面次滿十方高至梵天漸漸收
轉摺作七十二疊還復納口舌相纔隱眉
間放白毫淨光中出大音聲云啟白和
尚太子殿殿主偷供佛菓子山僧云如何
偷供佛菓子進云早間取去五碗晚間送
來五碗山僧不覺驚起蓋此上人實難酬
對若道殿主偷菓子取去五碗送還五碗
如何是偷菓子若道副寺妄語安有如是
廣長舌相人而肯誑言不實不惟山僧不
能對徧問各寮頭首皆不肯對山僧次日
坐睡乃見前來副寺重理前話露柱中忽
然走箇一般巍巍堂堂的殿主出來高聲

喝住云副寺莫謗人他云如何謗人乃云
早來未嘗取菓子晚來何從還菓子於是
空王佛歡喜踴躍通身毛孔皆笑直得六
種震動山河大地明暗色空情與無情齊
入如來大寂滅海召衆云會麼若也會得
管教夢覺俱空若也不會須知一回喫水
一回噎鷲卓拄杖喝一喝下座

五日雲禪薦親請小叅僧問請師直道妙
玄機師豎拄杖云烏藤七尺進云恁麼大
悲千手眼原來只箇身師云千鈞之弩不
爲鼯鼠發機進云龍承點眼歸東海虎得
抽牙出杏林師云急走過問寂寂惺惺時
了無巴鼻未審者着子作麼生定當師云
毒蛇橫脚下進云正與麼時主人公在甚
麼處師云站過一邊進云恁麼則知音總

在閒忙裏不待安居結制期師云直要頭
破腦裂問舍利弗入城月上女出城是甚
麼人分中事師云進前來與汝道進云和
尚現大人相師打云捉兔亦全其力進云
有時恁麼便恁麼有時恁麼即不恁麼師
復打云還要第二杓進云不知三世諸佛
有此病麼師云得恁皮下無血師乃云人
如楚大夫國無叛臣家無逆子忠屈一時
義申千古此是千佛會中一數出家兒莫
莽鹵精白一心視乃祖身世遠且大何近
欺幾四聾人稱大覺璉誰見狐生虎鷲卓拄
杖喝一喝復舉西天九祖密多尊者生提
伽國年五十口未曾言足未曾履八祖遊
化見其含有白光乞侍者於其父尊者遽
起禮拜而說偈曰父母非我親誰是最親

者諸佛非我道誰是最道者八祖曰汝言
與心親父母非可比汝行與道合諸佛心
即是外求有相佛與汝不相似欲識汝本
心非合亦非離且道如何是非合亦非離
不見道虛空無內外心法亦如此若了虛
空故是達真如理聽取山僧報以木桃父
母爲我親誰非最親者諸佛爲我道誰非
最道者若有耳食者出來云和尚前言不
應後語適來辨魔揀異而今又作甚麼話
驀喝一喝云癡人面前莫說打你頭破腦
裂不知坐斷十方剛見逢人即揖下座
晚叅師問維那云千鈞之弩不爲鼯鼠發
機爲甚古德見僧入門便喝進云車不橫
推理無曲斷師云我爲甚麼客人在者裏
立進云大家有分師云還是與你棒喫不

與你棒喫進云一任和尚師云自領去進
云知恩有地僧問如何是學人本來面目
師云三箇眼睛四箇鼻孔問那吒太子析
骨還父析肉還母現本來身爲父母說法
如何是本來身師云露進云萬古碧潭空
界月再三撈捥始應知師以扇子東西畫
數畫云前三三後三三是甚麼字進云禮
拜和尚師便喝柴頭問撥草瞻風祇圖見
性如何是性師云兩捆柴一担挑進云蒙
師指出金剛眼照見父母未生前師云日
日三担莫躰懶進云如人飲水冷煖自知
師云好生著力問馬祖一喝百丈三日耳
聾意旨如何師云非汝所言進云黃檗吐
舌又作麼生師云兩重公案問不慕諸聖
不重已靈還有向上事也無師云有進云

如何是向上事師云東司頭去撒進云恁麼則直截去也師云莫惹人掩鼻問大智文殊因甚出女子定不得師云那裏學得來進云即今問和尚師云一人傳虛千人傳實進云因甚罔明出得師云一處不通兩處失功進云春色無高下花枝有短長師云學語之流師乃顧視左右云諸大衆大有生滅不停底在努力今生須了却莫教累劫受餘殃衆擬議師以拄杖一時打散

晚叅師云石礫斫破你諸人腦殼露柱走入你諸人鼻孔裏僧出作禮云連朝天雨不扇自涼師云急走過師良久顧左右云禍不入慎家之門各請歸寮衆作禮一僧云如水乳合師云將謂停囚長智

唐

五

晚叅僧問不慕諸聖不重已靈時如何師云利刃有蜜不須舐蟲毒之家水莫嘗問脫體無依倚猶自立邊疆請問和尚過在甚麼處師云急走過進云撒手千峰外渠儂得自繇又作麼生師云近前來喫棒進

云與麼則分明一點乾坤露誰識其中有活龍師云須是皮下有血問天地未分日月未明本來面目在甚麼處師云荷葉團團團似鏡菱角尖尖尖似錐師乃云世尊四十九年說法祇接得箇飲光山僧二十年來無法可說一味痛呵毒棒若是知好惡的管教一箇箇超佛越祖去情義盡從貧處斷世人偏向有錢家驀喝一喝卓拄杖下座

戊戌上巳荆溪衆檀越請師入主磬山小

叅師堅拂云龜毛拂子利如錐舉出離情
作者知生平不輕全許可拈香須將虎鬚
兒拈香云此一瓣香供養即此磬山堂上
得度得法本師開山老和尚用報無恩之
恩斂衣就座云阿呵呵自具一雙瘦冷脚

未曾輕踐等閒山乃指香案云先師建立
者箇公案經十餘載佛祖不改正眼觀著
昔年却被某上座徹底翻轉先師直得吼
聲如雷數十年來要人代他雪屈今日剛
得衆檀護出手扶起所謂佛法付與王臣
于今見之某上座于此座上顯現先師全
身去也驀拈拄杖卓一卓喝一喝下座

晚叅師云汝諸大衆未出母胎已與山僧
相見了也已受山僧究竟了也還信得及
麼一僧禮拜而出師云似則似是則不是

師乃云各各信得及則堂上先老人刻刻
與汝諸人耳提面命若信不及則三八晚
叅盡須腦門着地一僧出禮拜大衆久立
師云大衆等你答話進云與和尚同鼻孔
出氣師云急走過

晚叅師云如何是無寒暑處寒時寒殺闍
黎熱時熱殺闍黎大衆還會麼衆無語師
云同是山中人應識山中語

結制早叅師云開山老和尚甲戌冬此日
開爐茆茨草榻築雪烹雲指點磚頭土塊
爲諸人發上上機直教寒谷春回花開石

筍接待三十年來今戊戌冬亦于此日開
爐殿堂寮舍具體而微知浴盡誠檀護一
德香齋次第燈燭輝煌法法頭頭點發一
切人四楞著地直教紅爐涌雪月冷風高

獨露磬山面目且道開山老人乍住爲人心切久住爲人心切喝一喝云粉骨碎身未足酬到此了然超百億

晚叅師舉扇子云扇子踣跳上三十三天築著帝釋鼻孔東海鯉魚打一棒兩似盆

幾回

頃有一上座雲門大師踏在脚底進堂出寮撞著露柱且道是那一箇衆久立師呵呵大笑歸寢室

晚叅僧問月白風清未是衲僧極則未審如何即是師云巡照鳴椎催坐香進云恁麼則頂門有眼還同瞽句裏無私用最親師云何不向下薦取進云祇如下載清風者拽耙牽犁說向誰師云依稀似曲進云謝師答話師云且過一邊僧禮拜師良久舉如意顧衆云看看大千世界總被如意

吞却了也會得的近前來喫棒會不得的歸堂坐香

晚叅僧問敗子成家不許東拋西擲者箇公案還是和尚建立麼師微笑進云草賊大敗師云已放過進云轉見不堪師呵呵大笑云却使山僧笑轉新問出頭天外誰能委任運無私作者知祇如不涉程途如何接待師云近前來與汝棒喫僧便喝師云好一喝遲了八刻進云和尚領取一半師云再犯不容又僧出纔伸問師云踏步已知來見解何勞更舉轆中泥僧復進語師不顧悅衆鳴引磬大衆仍久立師云大衆三十棒悅衆三十棒
早叅衆問話畢師云向上一路千聖不傳過去佛祖如是說現在佛祖如是說未來

佛祖如是說有者又道千聖不然又道熱
盤鳴聲競欲接竹點天未免影響之徒視
同兒戲不見大梅道惑亂人未有了日在
任他非心非佛我只管即心即佛鳳毛麟
趾好生取則薦休去

卷四

八

晚叅僧問承師示誨露柱成佛覺性難酬
重乞證據師云放汝三十棒進云還丹一
粒須加點木石同源鐵謂金師云識痛癢
好問踢翻滄海大地塵飛喝散白雲虛空
粉碎語未竟師云放汝三十棒進云棒頭
有眼明如日要識真金火裏看師云更要
第二杓僧喝師云急走過問法無上下高
低因甚天上一輪滿月人間盡稱月半師
云放汝三十棒進云徧界寒光即不問月
輪落後又如何師便喝良久顧視左右云

雲月是同溪山各異

早叅僧問馬大師道即心即佛南泉道不
是心不是佛不是物未審和尚作麼生道
師云即心即佛不是心不是佛不是物僧
擬議師便喝問今日深秋寒入骨庭前霜

履菊花新且道明甚麼邊事師便喝進云
恁麼則露柱成佛已竟請和尚爲衆說法
師云三十棒待別時進云和尚說法已竟
爭奈知恩者少師云且過一邊問如何是
空手把鋤頭師便喝如何是步行騎水牛

卷四

九

師云急走過如何是人從橋上過師云傳
大士在汝脚底如何是橋流水不流師云
更要第二杓惡水問水無筋骨因甚長流
不斷師便喝進云恁麼則四面青山擎日
月一湖碧水浴乾坤師連喝兩喝良久乃

顧左右云清寒久立大衆珍重

結制小叅僧問天得一以清地得一以寧
聖人得一而天下和平法王無上超出一
切其有所得而然耶其無所得而然耶師
云近前來與汝道進云有水皆含月無山
不帶雲師云放汝三十棒進云拂拂清風
生法座定教海晏與河清師云過閭釋迦
過去彌勒未來正當此日請師舉唱師云
倚天長劍逼人寒進云如何是第一玄師
云知音不用頻頻舉進云如何是第二玄
師云漚和爭負截流機進云如何是第三
玄師云一條拄杖兩人昇問結夏安居即
不問請轉法輪事如何師云薰風自南來
殿閣生微涼師乃云山僧積勞久病窶空
先親志惟廬墓因編集先錄暫稽舊山居

此報恩西序頭首當專治佛法凡自利利
他常住事與堂中無涉者不必干預閒住
執事當專究本分不可閒議閒管別事東
序頭首及一切執事事事處處當以助衆
成道爲心不可舉用好事喜功之人有悞
修行研究佛法如登山須到頂入海須到
底登山不到頂不知宇宙之寬廣入海不
到底不知滄溟之淵深顧左右云今日結
制之辰何不舉揚大法提掇宗乘乃作如
斯尋常語話驚喝一喝云不見道大凡演
唱宗乘一句語須具三玄門一玄門須具
三要路有權有實有照有用又不聞曹洞
五位面互雲門一字三關瀉仰父子投機
法眼三界唯心若能洞明大法了悟宗乘
山僧恁麼告報端不尋常驚卓拄杖喝一

喝下座

晚叅師云盡十方虛空是箇火爐四生九有盡向冷地裏坐不知以何法遮掩衆競出答話師云師子較人韓盧逐塊

庚子夏過大雄端陽日檀越請小叅師乃橫按拄杖云身心水月世界鏡花十方寂寂萬法閒閒說甚海寬地厚有何鳬短鶴長舉手攀南斗回身倚北辰出頭天外看盡是我般人卓拄杖下座

晚叅師拈拄杖云山僧拄杖子吞却山河大地汝諸大衆向何處安身立命衆無語師云不是冤家不聚頭

晚叅師拈拄杖僧問如何是一切聖賢如電拂師云棒打石人頭曝曝論實事進云見性成佛事如何師云兩重公案進云一

卷

上

亘晴空淨寒光絕是非師云再犯不容師乃云清虛之理畢竟無身如理如事官不容針觸瞎千聖頂額眼曹山潦倒強惺惺驀卓拄杖喝一喝

禮塔歸晚叅師云若人識得心大地無寸土天目代出明心見性祖師因甚卻有許多奇松怪石衆良久師以禪板拍案云人歸大國方知貴水到瀟湘一樣清

晚叅師云敲空作響擊石無聲大衆默坐時成得什麼章句課誦時能有幾人不動口衆無語師云放下衲僧鐵面皮切莫隨羣與逐隊

即事晚叅師云適來坐睡作得一夢夢見露柱害病請醫診脈却請著箇良醫把他從頭至足診了一徧告他道你本無病却

是自生顛倒自討苦喫露柱恍然大悟通身踊躍從無始至盡未來際覓病起處了不可得頓入塵塵三昧與盡虛空徧法界情與無情一時同證大安樂法門直教山河大地明暗色空異口同音一唱三歎慶

幸希有剛被門邊立著箇夾岸禪和子掉頭不信摩訶露柱云你分明是箇立地死漢惹得碌盤開口喝云你恁麼正是撞著露柱的瞎漢山僧聞他者喝不覺歡喜便迺驚醒問汝大衆露柱害病醫他好不醫他好若道醫他則无妄之藥不可試也若道不醫豈可覺時佛法與夢時一般到者裏如何決擇良久顧左右云夜深歇去晚叅師云昨夜有僧問無夢無想主人公在什麼處聲未絕山僧以手掩其口有透

得透的代進一語庶不孤負山僧良久云兩華亭騎案山入佛殿去也入夜堂中坐叅復令透此話夜深師云却得露柱透過了告山僧云兩華亭騎案山入佛殿是真語者實語者直令闔天目山內外大衆一

箇箇毛孔中著得幾座佛殿既有此木上座道了蓋覆得大衆過向下文長付在來日

月庭小叅師云古人道石頭大的大小的小明什麼邊事又云翫月還是陰處好明

幾四

士三

處好衆競進語師迺云昔日有書生來叅山僧問他道鳶飛戾天魚躍於淵言其上下察也如何是察的道理士答不契山僧自代云黑諸人會得者一語要透適來兩問也不難

七月朔日早叅師云三秋今日始一夏事
如何萬里無寸草淨地奈先局好大哥還
他肌骨好不用著衣多

晚叅師握竹篋作撫琴勢僧出問作麼生
得四稜蹋地師云擬釣鯨鯢師過云昨晚

十一

十三

香嚴禪師入室告報山僧道堂中大人
會得老僧上樹話且道是那箇衆無語
師連聲咄云盤山會裏翻筋斗到此方知
普化顛

中元小叅師拈拄杖僧問如何是奪人不
奪境師豎起拄杖進云如何是奪境不奪
人師云禮拜著進云如何是人境兩俱奪
師云今日且放過進云如何是人境俱不
奪師云謝汝齋進云料揀已蒙師指示即
今臨濟大師是何面目師便打僧云嘆師

又打幾擊著琉璃又僧問西來大意則不
問如何是正法眼藏師云琉璃代汝喫棒
了也進云與麼則當頭炤耀師云得恁知
痛癢問一子出家九族升天目連神通爲
甚救母不得師云汝是大不孝人進云父
子上山各自努力玄沙悟道爲甚其父生
天師云汝是大修行人進云只如和尚權
衡祖令師範人天未審尊人居何地位師
震威一喝進云如是則幽顯普利萬彙沾
恩師云前谿水急後嶺風高師過云祖庭
乍住頗荒涼準擬秋來絕稻糧每日雲堂
共危坐晚叅人道似汾陽召大衆云西河
有當門師子來者即便敲殺若爲入得汾
陽門見得汾陽人驀喝一喝和聲卓拄杖
云我不可作汾陽兒孫不得然雖如是事

無一向今日却值佛歡喜僧自恣之辰十方雲集香飯飽餐且道西峰師子與西河師子同聲相應耶超宗異目耶直立拄杖云看取汾陽祖師在山僧拄杖頭上坐寶蓮華之座出廣長舌相徧覆三千大千世界地搖六震草木瓦礫悉演法音琅琅說頌云三玄三要事難分得意忘言道易親一句明明該萬象寶盆珍饌供三尊下座晚叅師握拄杖坐良久迺云我觀坐禪瞋睡者大都是不善用心我今不要你們用心一箇箇令汝等見性去願麼一僧作禮云和尚慈悲師指云大家禮取露柱卓拄杖云待磬盤教住來向山僧手中喫棒晚叅師云僧問古德學人乍入叢林乞師指箇入處古德云還聞偃谿水聲麼僧云

黃四

十

聞德云向者裏入汝等諸人作麼生會一僧云仰止巖前師子吼雨華橋上牧童歸師云三級浪高魚化龍癡人猶尋夜塘水一僧云從門入者不是家珍師云自領三十棒迺顧左右云歸堂喫茶

晚叅師云堂中四箇露柱一時成佛去也召衆云且道成佛的事作麼生迺云直得現大人相爍破山河大地令古之今之瞻仰他不及迴避他不及汝輩何得堆堆守故轍以竹篋旋風打散

幾四

十五

晚叅師舉竹篋子云大衆喚者箇作什麼良久師迺云夜來虛空落地大衆眉毛無恙逢人覲面提持未免觸途成滯所謂百千澄清大海棄之而惟認一浮漚以竹篋向地一畫

賢前殿桐鄉公李護法送齋僧大鍋等進
山同遜予鉉上座體淨常禪人請小叅師
云我有一間殿無外亦無內廣蔭幾多人
問著難理會我有供衆鍋不少亦不多到
來盡飽餐飯罷任摩挲我有二三子非勤
亦非惰語默絕思惟動靜無虛過下座
燈節晚叅師云龍池石磬報恩大雄天目
每年新正半月禮祖正當禮拜時且道祖
師對大衆說什麼法衆答話畢師左右顧
視云各各頂門著地始得

晚叅師拈拄杖云汝詣大衆各各會得大
地無寸土麼一僧喝師云昨日有人胡喝
亂喝三十棒趁出去也師迺云主山高案
山低

佛涅槃日晚叅師召大衆云今日是什麼

日子衆答話畢師迺云三春今已半箇事
合如何全身示現日睡眠細摩挲
大悲誕晚叅師杖空一下召大衆云敲空
作響擊木無聲會麼

晚叅師云若人識得心大地無寸土釋迦
文佛睹明星時天目山大轉法輪阿誰得
聞衆各進語師云若不藍田射石虎如何
識得李將軍

小叅師云今日是開山高祖誕辰舉則公
案供養大衆昔日高祖住此西峰上堂云
盡十方世界是箇盞盞汝等諸人喫粥喫
飯也在裏許倚矢放溺也在裏許行住坐
臥迺至一動一靜總在裏許若也識得達
磨大師只與你作箇洗脚奴子若也不識
二時粥飯將什麼喫叅師云高祖恁麼告

報却似俯憐幼子提獎嬰兒新天目却要
問取久叅衲子盡大地是箇盞盂喚什麼
作穿衣喫飯喚什麼作局矢放溺喚什麼
作行住坐臥語默動靜若也識得更有什么
麼達磨大師若也不識便見有穿衣喫飯

義四

十六

便見有局矢放溺便見有行住坐臥語默
動靜二時過堂喚他作飯袋子豈爲分外
召大眾云且道高祖說得是新天目說得
是若高祖說得是佛法豈有兩般若新天
目說得是山僧却是高祖兒孫大凡叅學
須是透頂透底明細素識好惡始得若也
半青半黃顛頑穿鑿未免觸途成滯薰喝
一喝云劍爲不平離寶匣藥因救病出金
餅

結夏小叅師云天目今年結制以盡虛空

義四

十七

徧法界爲禪堂來者一任來去者一任去
若還偷心不死情知門外立地

早叅師示衆云同居此西峯祖庭務須福
慧兩嚴事理出就方堪與開山祖師同益
孟喫飯

晚叅師握拄杖云不思善不思惡如何是
本來面目垂絲千尺意在深潭不與萬法
爲侶的是什麼人躡足龍門清風徧界今
時人聞舉著本來面目不侶萬法的人便
道蓋天蓋地惟我獨尊殊不知正是客作
漢馬大師云待汝一口吸盡西江水與汝
道也須是箇人始得切莫輕接嘴
晚叅師舉扇子云雲門大師忍俊不禁在
扇子頭上揚聲大叫云大眾莫瞋睡衆作
禮師云各與三十棒

晚叅師云經行及坐卧常在於其中且道是什麼人分上事良久云莫道天目說如來禪好

天雨早叅師示衆云諸人專爲生死入山辨道晴天須動中用心天陰須靜中加工靜中加工方知動中打失不打失顧左右云三祖時時在汝諸人毛孔出入知麼各卸却皮囊子相見

堂中晚叅師示衆云來此深山祖庭須叅了生死的禪欲了生死須空四相不見金剛經說令一切衆生入無餘涅槃而實無一衆生得滅度者如是無人我衆生壽者之相方到父母未生前到得父母未生前目然證取本來面目所以五祖每令人誦金剛般若不知者以般若爲空宗殊不知

佛說之空未有空而不圓者若空而不圓即是外道空臨濟大師道一句中具三玄一玄中具三要法林秋晚有志之士須共努力

晚叅師云天目今年過分辛苦有箇不動尊古如來衆本願輪作不請友時時爲大衆說法大衆共見共聞麼衆擬議師便唱晚叅師云白雲不動青山走

堂中小叅是晚免巡香開小靜一老衲大展九禮師云年多識廣師迺云饑則飽餐

幾四

大

香飯倦便垂頭黑甜好大哥樂也麼要睡的各與箇枕头鐵磬大良久拈拄杖旋風打衆伏地師驀擲拄杖出堂

晚叅問話畢師迺云我祖昭覺老人有箇瞌睡歌歌中有云睡著更綿密山僧是他

兒孫衆中有解睡者各與一箇鐵磬大的
枕子昨晚散與堂中大衆衆見枕子太大
承當不得盡嚇倒了今晚散與各堂寮大
衆承當得的各請領取薦拈拄杖衆皆走
散師以杖拍案云鍊得通紅打一鏈周遭
無數火星飛十成好箇金剛鑽幾四攤向門前
賣與誰九

坐七完晚叅問話畢師過云衲子不叅禪
山僧不答話此衆無枝葉惟有一真實
檀越請小叅師拈香云者一炷香從遜予
鉉上座等領淮海道祖檀越信心中拈出
將來炆向爐中成如意寶輪滿足殊勝雲
供養盡虛空徧法界常住三寶靈山會上
本師釋迦牟尼尊佛尊法賢聖衆西天東
土歷代祖師南嶽直下諸祖臨濟本宗歷

代諸祖本寺開山諸祖荆谿石磬山先老
和尚伏願檀越福慧兩嚴上座輩自他俱
利現前大衆同成正覺同利衆生師就座
過云不思善不思惡正恁麼時本來面目
蓋天蓋地露柱頓開十萬八千金剛正眼
千峯萬峯奇松怪石化作金毛師子王踔
跳上三十三天虛空片片爲瑞爲祥滿落
人間呵呵呵好大哥風流不在着衣多
早叅舉僧問趙州栢樹子幾時成佛州云
虛空落地時成佛僧云虛空幾時落地州
云栢樹子成佛時落地師云古佛與麼老
婆心切大衆知麼良久云趙州與諸人隔
江
佛成道日小叅問答不錄師召大衆云世
尊於數千年前與天下古今人同證智慧

德相奈何數千年後尚有開眼瞋睡的五
祖示人念取金剛般若便把人人驀頭一
杓冷水迺僅聞老盧一人知非顧視左右
云庭栢蕭疎日卓午莫覓寒棲鼓翅聲
草堂得月峯晚叅師云盡大地是沙門一
隻眼千松萬竹向甚處著一僧出師便喝
除夕晚叅師云古德烹露地白牛分歲老
僧與人人一面古鏡良久云受用得的各
希鑒納如或不然未免完璧

元旦小叅師云先天地而生後天地而不
老又有道惟有拄杖子無舊亦無新此皆
陳年曆日東而置之高閣可也老僧與大
衆說此應時及節的佛法迺云苟日新日
日新又日新
春朝報恩堂小叅師云新春無可供諸大

集四

三十

衆指諸大衆叅取箇真善知識迺以如意
西指云者林竹得恁清復以如意東指云
者林松得恁古

起期晚叅師云與大衆約法三章一不許
坐禪二不許經行三不許喫粥喫飯衆擬
議師震威一喝

晚叅衆集師趁令退衆立不散師云大衆
既堅立不去豈可空過有生平不輕說的
佛法今日說與大衆驀休去

晚叅師云有箇絕勝境界爲甚人不肯到
良久云都緣太近

善

主

解制小叅僧問羅籠不住呼喚不回成付
麼邊事師打云打出你頂門眼進云如是
則信步躡翻華藏海堂堂徧界任縱橫師
以拄杖擲云刺瞎你眼中睛師迺橫按拄

杖云千人萬人中得一人半人得一人半

人方知一切衆生皆具如來智慧德相但以妄想執著不能證得一冬來有不空過的麼有則須向人前吐露莫只背地裏半吞半吐胃次中不青不黃爲山九仞功虧一簣逗到結角羅紋處噬臍何及驀喝一喝卓拄杖云把住也黃金失色放行也瓦礫生光黃金失色必藥永非真精金百鍊愈見光輝瓦礫生光豈燕石爲寶魚目作珠彌增怪笑今日正當解制之日有最親切的末後句分付大衆雪後始知松栢操事難方見丈夫心

晚叅師云不將境示人庭前栢樹子堆堆老趙州石橋滑如水大衆作麼生與祖師相見衆久立師云長帶新婦拖泥走端的

知恩解報恩

晚叅舉世尊示隨色摩尼珠問五方天王云此珠作何色時五方天王互說異色世尊藏珠入袖却擡手云此珠作何色時五方天王云佛手中無珠何處有色世尊歎云汝何迷倒之甚吾將世珠示之便各強說有青黃赤白色吾將真珠示之便總不知時五方天王皆悉悟去先磬山云世尊奇特俾天王一一悟道千古之下令人樂聞磬山不肖遠孫也要效顰不識大衆信得及未驀伸出拳云是什麼色若云是拳非珠老僧喚他近前來你怎麼道天王不如且道是實伊是罰伊師云山僧聞此直得帆隨湘轉望衡九面還有與新天目同叅的麼良久云法如大海須將大海來傾

取大海去

晚叅師示衆云凡看公案須研窮佛祖落處不可在語脈裏轉嫖母效顰邯鄲學步見笑大方取譏識者今將晚叅所舉隨色摩尼因緣逐一徵示且道天王悟去在擡

衆

王

手處不在擡手處是拳非珠是超宗異目語是觸途成滯語若道超宗異目爲甚先磬山云是賞伊是罰伊若道觸途成滯爲甚云你恁麼道天王不如承言者喪滯句者迷言無展事語不投機

晚叅師云晚來山行問僧百骸潰散時如何進云徧界不曾藏山僧指面前石云喚者箇作甚麼僧無語有人代他進得一語麼良久云從緣薦得相應疾就體消停得力遲

衆

王

結夏知浴同武林檀越請小叅師拈拄杖僧問千年祖席重興萬古宗風再振除却語默棒喝請師別通消息師云進前來與汝道進云如是則銜月白牛露地走追風天馬帶雲飛師云急走過問九旬禁足即不問不涉功勲事若何師云放汝三十棒僧禮拜師云得恁知痛癢師廼云山僧出世三十餘年所有佛法盡皆說却了也今來天目住箇破院子領衆作務時作務坐禪時坐禪卓拄杖云切忌動著動著則三十棒靠拄杖云同入此門來熏風好著力塔院晚叅師左右顧視云汝諸大衆各須使得一切時莫爲一切時使轉得一切境莫爲一切境轉良久震威一喝

普請栽秧晚叅師云古者道大衆爲老僧

開田老僧爲大衆說大義天目則不然大衆未嘗裁田老僧却爲說大義衆作禮師云維那何不道與麼則大衆一箇箇閒閒地去也

盛暑晚叅師云鑊湯爐炭裏迴避無寒暑處迴避且道那箇眼青那箇眼白衆荅話畢師云謹白叅玄人寒暑莫虛度

晚叅師舉扇云有見得雲門大師的麼維那進云今晚定雨師云大衆幾人打溼袈裟角那率衆作禮師云雷聲甚大

謝雨晚叅師云雲門大師本擬向扇子裏長伸兩脚安穩打眠剛被維那鳴椎竭力驚他出定直得雨似盆傾澤被萬物大衆有賴如今若爲復請雲門大師向扇子裏入定去良久云轉扇子歸雲門大師復云

既易轉扇子歸雲門轉大師歸扇子何難祖堂晚叅師云大衆在祖師毛孔中作禮祖師在大衆眉毛上趺坐

早叅師云夜來露柱子入室報道到處走一遭審知今時叅學人一箇箇銅頭鐵額

老大虛空整片掉將下來墻壁瓦礫悉百雜碎惟有叅學人依舊眉端目正全沒星子事山僧向他道臘月三十日快到各自打掃門前管甚東家杓柄長西家杓柄短露柱子聞即冲舉山僧一夜半疑半信適

幾四

二十四

來侍者云大衆早叅山僧不覺踊躍者件疑事有箇雪處問諸大衆各各有甚護身符子衆荅不契師拈拄杖旋風打散衆作禮師擲拄杖云一日復一日年從頭上增除夕晚叅師云今日未悟道者不合睡凡

未悟道者如爲客未到家一般不見古人云旅館寒燈獨不眠客心何事轉悽然故鄉今夜思千里霜髻明朝又一年已悟道者亦不合睡凡悟道者如生西方一般所謂如蓮華開似大夢覺從此應無寒暑無

暑

主

晝夜久悟道者亦不合睡凡久悟道者應般若清楚如所謂夢中說六波羅蜜與醒時說六波羅蜜是同是別此等葛藤應趁幾年討箇倒斷何俟當來問取彌勒是爲天目三不睡昔人家風澹泊每說小叅以爲供養天目今日報恩堂佛事完遲說此三不睡以爲晚叅

早叅問話畢師云天目有三訣一訣一鐵板若人吹得通佛祖下風列會得的對衆激揚如或未能山僧自爲頌出第一訣虛

空著地擲壓倒萬萬人阿哪阿哪泣第二訣龍女解成佛大海徹底乾紅爐片片雪第三訣門有當行客各自買與賣不費主人力衆作禮師左右顧視云將此深心奉塵刹是則名爲報佛恩

早叅師云向上向下熱盥鳴聲別有生機鏤冰琢玉不是龍門客切忌遭點額驀拈拄杖大衆一齊趨退師擲下拄杖

早叅師云一則公案不透即是本叅不透古人叅學片語未通廢寢忘餐決定討箇分曉豈肯此間一期那間一期寄離因熱舐指拈拄窮年積歲半飽半饑眼光落地恍惚憶惶前路渺茫噬臍無及汝諸大衆會得夜來三訣頌便許會濟上三玄更有三要語在切莫造次然而者件事一了百

了一處通千處萬處通一節了千節萬節
了果能契悟本來舉一明三自然明逾杲
日威迅雷霆直教人藏身無地掩耳不及
所以道三玄三要事難分得意忘言道易
親一句明明該萬象驚喝一喝和聲將竹
篋子拍案一下

上開山祖塔供師拈香云虛空粉碎地平
沉真參實悟眼中金枕子落地安邦國管
見狂奴害底評師繞塔畢復作禮云透脫
重關代有聞死關終世更何人沐猴畫錦
氣蓋世姬馬噬臍懊惱深

上中祖塔供師拈香云透脫重關句法雲
拈出新生平不曾悟霹靂鳴能聞師繞塔
畢復作禮云有道惟頻退身世如浮雲叅
禪無秘訣承言生怒癭

幾四

二十六

結秋小叅師云皮膚脱落盡惟有一真實
大衆會麼迺云汾陽化紙馬門普柳天目
者裏前谿水急後嶺風高且道那箇在前
那箇在後良久云歸堂喫茶

友石靜主領率國衆檀越請小叅衆問話

畢師云昔有政禪師每騎牛出入人呼之
爲政黃牛住錦里功臣寺數十餘年未嘗
說法有問之者曰吾倩萬象開演我說有
盡此之開演無窮今日友石上座同諸檀
越啟請說法又作麼生須知萬象開演我

幾四

五七

說無窮無言頂其聲如雷玉柱峯通身是
眼兩華橋流水峙旭日翠微和合高歌
諸上善人來時好道去時亦如來時一香
一果充塞寰區一米一豆十方普供且道
佛法極則一句是如何衝開碧落松千尺

截斷紅塵水一谿

東山祖忌拈香師云透白雲重關行少室
正令有昭覺如龍得水似虎生翼唐虞之
際於斯爲盛靠者著子如須彌山至簡至
要至易至直萬般存此道一味信前緣言
而世爲天下法行而世爲天下則天目拈
一片香直是仰望不及

小叅舉黃檗接臨濟公案師示頌云生成
鐵壁銅牆能禁兩傾風撼平地壁倒牆坍
受敵驚羣八面寒光百鍊千鎚真金色變
不變要識師子搏兒不露爪牙難辨

小叅舉趙州十二時歌師示頌云識心見
性不蹉路廓然太虛露露露平常心道擬
即乖知與不知二俱墮南泉終日口吧吧
問著無言忙下座超宗異目克家兒勘偏

諸方闢門戶向北天空日月寬石橋平滑
人難度砒霜鴆毒滿把攬虎狼蛇蝎供坐
卧不下繩牀接趙王敲扉排戶鳴饑餓步
行騎馬亦騎羊眼青無佛亦無祖教會婆
婆轉藏經臺山有路親勘破嘻笑怒罵震
如雷倒雪高聲墮雲霧知音緘口靜焚香
等閒寄取鋏子去

九月朔檀越請小叅師云天得一以清地
得一以寧君得一以明父得一以慈子得
一以孝友得一以恒且道道者得一又作
麼生師拈拂子云釋迦文佛以至孝成無
上正等正覺達磨大師以至孝鼻祖支那
六祖大師以至孝傳法開宗先磬山老和
尚以至孝得龍池正印今日武林魏檀越
母難之辰同諸善友得得入山設齋請法

是爲大孝之大孝且華果同時自利利親
一句作麼生道火裏金蓮高十丈披風拂
月長精神下座

四月八日晚叅師云凡在天目住者辛苦

真辛苦澹薄真澹薄然須各各檢點爲甚

集四

天

來受此澹薄爲甚來受此辛苦果能究竟
則著衣不挂一縷絲喫飯不嚼一粒米走
路不動步作務不動手澹薄不澹薄辛苦
不辛苦有入處的如此行持愈退愈進愈
晦愈明未有入處的如此行持自然工夫
成片管教定有入處大衆作禮師復云肯
信者幾句老實告報便見釋迦老子時時
出生在在成道

結冬請小叅師拈拄杖云真叅實悟人多
是名佛出世真叅實悟人少是名佛涅槃

法

无

今日正當結制之始却值三祖尊者涅槃
之辰有識得祖師面目現在者出衆相見
一僧云徧界不曾藏一僧喝師云各與三
十棒師乃云江之南江之北六六三十六
淵之深天之遠兩眼對兩眼春花秋月夏
雲冬雪東涌西沒西涌東沒顧視左右云
從上來不可按牛頭喫草如世良馬見鞭
影而高飛驀喝一喝和聲卓拄杖下座
除夕晚叅師云汝諸大衆同此天目度歲
還知有奇特事麼良久云日日香煙夜夜
燈

千丈巖早叅師示衆云祖師鼻孔長大衆
鼻孔長知客進云將謂和尚忘却師云腦
後惺惺

早叅問話畢師乃云叅禪無秘訣只要生

死切絕思惟處道將來吸盡西江口門濶
若還熟處不能忘追逐波旬遠彌勒棄諸
所重學無生記取夜行莫履白鷺喝一喝
云鷺王擇乳龍象蹴蹋下座

佛成道日早參副寺問一句當天永絕八
萬門生死未審是那一句師云細磨豆麵
供午爨旋挑脫粟接朝炊師乃云本師釋
迦文佛云一切衆生皆具如來智慧德相
但以妄想執著不能證得汝諸大衆還知
智慧德相麼內不見有身心外不見有世
界發真歸源十虛消殞妄想寂滅執著淨
盡情與無情同成正覺且道塵塵三昧一
句作麼生道良久云盞裏粥碟裏菜下座
晦日晚參師云本山大衆固是精勤苦行
但解制以來不無減舊增新更爲申示自

通四

三

後久居大衆須以尋常家範說與初進諸
賢第一須敦尚戒德已圓大戒者貴乎身
心俱淨方受具戒十戒者即須嚴束身口
初出家者須精持五戒五戒爲衆戒根本
爲一切法之根本也凡半月半月誦戒證
戒各須依時齊集執事者尋常見人持戒
不嚴即行舉退不可留一敗羣者於中儻
有證戒誦戒違約不到即行舉罰助衆精
嚴不可失舉致滋懈怠如是方爲清衆同
居第二要福慧兩嚴來此祖庭須求入祖
師閭奧出生死絕輪迴忙動靜須似木
人坐卧木人行動時時觀看此身如死屍
一般如何解飲食解作爲切切看破念頭
起處則一切處是你成正覺處一切時是
你成正覺時所以十方世界無鍼鋒許非

佛菩薩捨身命辦道證道處不相信者母
勞共住第三自利利他須發願迴向仰三
尊之力懺其已往悔其將來二時課誦務
用精勤時至執事者尤當以領衆爲心散
衆不到盡執舉罰各執不到互相舉察自
然人人精進善至於饕餮稍繼須念世之饑
寒困苦凡過普請念誦務須勇往直前四
思總報三有齊資顧視左右云前三約終
身可行後勸勉及時濟物所以行之者一
也是故君子誠之爲貴召大衆云久立珍
重

檀越請小叅師云一切有爲法如夢幻泡
影如露亦如電應作如是觀者釋迦文佛
普利有情將安養世界瓊樓寶閣化食化
衣八功德池七重行樹微風衆樂異鳥同

音種種殊勝掇在人人目前直令過現未
來學般若菩薩空男女等老稚忘縉素同
一眼見同一耳聞同一身證光明無量壽
命無量眷屬無量與諸上善人俱會一處
飯食之頃盛衆妙華徧供十方無量諸佛
如是自利是爲大利如是益人是爲大益
且離幻大覺一句作麼生道虛空撲落地
栢樹子成佛震威一喝和聲擊如意下座
解制小叅師云壬子年閏七月結夏一百
二十日天目亦隨例留得諸禪多澹泊一
月多辛苦一月今年田稻熟去住飽禪悅
古路鐵蛇橫拄杖笑不輟衆中有一天人
獻花無路鬼神窺覷無門的與大衆同坐
眠同作息且道是誰識得咄咄截路谿
谿水潔明標雲樹樹松奇出下座

科司馬祈嗣請小叅師云邊界洪寬聖凡
靡間道源深密智巧何施得意忘言盡塵
沙國土是當人一隻眼返聞識性總十二
類生爲如來千億身高不可踰卑而彌厚
爭之無我讓之匪他放行白鶴鸚鵡生輝
把住照乘連城失色承先則本端而流遠
開後則根固而葉蕃其入世也百花林裏
坐一葉不沾身其超世也古佛殿前行千
燈競發燄且道是什麼人能行恁麼事眼
中著得須彌山指端傾出滄溟水下座

晚叅師左右顧視云結制來一月也金剛
圈作麼生栗棘蓬作麼生衆競答話師云
道得的也三十棒道不得的也三十棒衆
作禮師云識法者懼

晚叅師云盡大地是箇火坑得何三昧不

卷四

三十二

被燒却因甚道玩人喪德一僧云三十年
後大有人恁麼問師云何不道驚人之句
千古罕聞師顧視左右云山僧爲甚昨日
不肯今日却肯衆聳然拱默師云我不輕
於汝等汝等本來是佛

佛成道日知浴領檀越請小叅僧問如何
是趙州闍師云五九四十五窮漢街頭舞
問古人道盡大地無纖毫過患猶爲轉句
不見一法始是半提更須知有向上全提
時節如何是向上全提的時節師云許你

卷四

三

膽大進云恁麼則雪滿長安衆盈兜座師
云知痛癢好進云末後一言更望布施師
云識法者懼問度盡衆生方成佛道如何
度衆生師云世尊成道日檀越送衣來進
云如何成道師云庭無立雪人焉明覩星

事師乃云有一道真言病者得瘥貧者得寶苦者得樂夭者得壽富者愈富貴者愈貴長年者長年中尊安樂者安樂中尊是大神咒是大明咒是無上咒是無等等咒能除一切苦真實不虛且道是那一道真言一切衆生具有如來智慧德相但以妄想執著不能證得師震威一喝云若也直下透得何須六年苦行夜半明星如或未然試看先宗是何標格下座

晚叅僧出問現前即不問聲未絕師便打又僧出纔作禮師亦打師乃云老僧數十年來與人婆婆和和今日索性婆和到底隨聲以拄杖旋風打散

解夏結秋清澗檀越請小叅侍者報衆集久立師云向道老和尚與大衆說法竟衆

聞踴躍作禮而退

癸丑九月朔小叅僧問如何是實相義師云進前來與汝道僧擬議師便喝師乃云水懸山立雲外高標雙塔峻風恬月滿林中古刹一川平坦坦夷夷處突兀兀突突兀兀處坦坦夷夷有時重關深掩有時徧界分身欲從重關深掩處相見却也徧界分身欲從徧界分身處相見却也重關深掩得意忘言千里同風迷封滯殼覩面萬里傾蓋如故白首如新十室忠信一賢好學把住驚龍象放行馴鹿鷗師視左右云久立珍重下座

小叅問話畢師云空花千朵目翳自欺些子金剛穢軀裂出出門問道好惡須知發步研宗邪正莫混形端影直響順聲和煮

砂終不成糜種豆焉能得穀久叅上士揀
魔辨異明析是非庶可自利利他若也菽
麥不分奴郎不辨四恩難報枉厠僧倫不
是與人難共合大都緇素要分明下座

小叅師云山僧日來端居丈室許久不與

卷四

三

大衆相見汝諸大衆各成枯木之侶頗不
犯人苗稼拄杖子蹕跳上三十三天揚聲
大叫云東西南北四維上下普皆吹大法
螺擊大法鼓建大法幢如日普照如雷普
震驚得閻羅大帝眉毛火發燒得東海龍
王手忙脚亂波騰浪涌奔走赴訴剛遇前
三門老巡照在枇杷樹下曝背坐睡嬾牛
耕作師子吼驚得拄杖子退身三步潛身
歸來依舊靠在山僧繩床角頭穿却内外
大衆一切人鼻孔汝諸大衆十二時中語

卷四

三

默動靜好生隄防木蛇橫古路切忌觸著
觸著則禍生衆久立師震威一喝下座
小叅侍者報衆集師云向道老和尚在大
衆鼻孔裏

大覺普濟能仁王琳琇國師語錄卷第四

音釋

噎

於歌切音謁食
室氣不通也

窀

上朱倫切音肫
下祥亦切音席

窀

窀
窀
窀

效

下皮賓切音貧
又強學人曰效

莫

胡切音
莫

莫

胡切音
莫

大覺普濟能仁玉琳瑯國師語錄卷第五 幾五

嗣法門人行岳編

法語

示全菴進上座

進上座事我十年不動竿頭每爲敲破拊

幾五

指夏初入大雄室聞舉一歸何處話直下

透脫須念自利易利人難深心大心終身

誓居學地所謂證無量聖身猶未是泊頭

處也

示嶺侍司

衲僧家不爲小毀小譽所動方是具正見

行正行的一切去其計功謀利之心方許

一切真實無時無事不快樂

示嶺侍司

在堂中不要學佛學法辯古明今當毒眼

孤撐無佛無祖無人無已放出蓋天蓋地
志氣來東弗于逮橫身西瞿耶尼展脚南
瞻部洲啜飯北鬱單越撒溺語默超越常
情動止迴殊舊習天神捧華無路人鬼覷
捕無門果能如是不變不雜等閒舉起鈍
刀子也能殺也能活也能照人肝膽也能
稱人伎倆把從上千七百老古錐遺下一
言半句或是作家相見或是出格提持或
嚴密或危險或泥中有刺或沙裏無油或
人目爲諠訛或人目爲奇特千岐萬別駭
狀奇音逢著箇鈍刀子自然如庖丁之解
牛由基之繞樹豈他穿窬擔板亂統支離
者可同年而語哉然猶未也并知山僧與
麼庭訓亦是憐兒不覺醜方是有氣性衲
子祖師云行解相應名之曰祖又曰明道

者多行道者少如斯料簡豈是等閒今時
有等無忌憚者擬爲佛祖苗裔得些見地
全不修省難免道力不勝業力又安望其
透末後句向上關哉戒之勉之

示岳書狀

幾五

二

余生平無甚長處祇不記古今隻言片字
生平亦有自負處不學他諸方佛法噫安
得不記人言句者聆我斯言乎書付行岳
以示千百年知音者

示嶺侍司

禪和家善用心難善用心的得正悟難得
正悟的打脫見地難打脫見地的不走作
難翻此四難爲四易則自利利他一切了
辦

古人道數十年尚有走作或云我數十年

方打成一片成片者無論矣未成片者但
把曹谿云什麼物恁麼來隨時覺察管教
衲僧行處如火消冰

示峰首座

長沙岑禪師因秀才看千佛名經問曰百
千諸佛但見其名未審居何國土還化物
也無岑曰黃鶴樓崔顥題後秀才還曾題
也未曰未曾曰得閒題取一篇好如斯答
話非大有福慧人不能

示慰我望維那

幾五

三

有意味處切忌貪戀絕依倚時努力進步
能如是行必慰我之所望也

示祈遠唐居士

工夫做到疑情發不起則已到門頭此時
不用性急不得回顧不得貪戀須連那得

知疑情發不起的念頭亦不起只恁麼去
冷眼忽開入得門轉得身根性果利便會
開大口吸盡五湖水從前透不過的諸訛
公案管教七通八達到者田地切須時刻
親近正知正見大人受得他惡辣鉗鏹透
過末後牢關方得大受用大自在大解脫
大如意超古超今越佛越祖見過於師端
可傳受爲法門大樹蔭覆一切人去不然
總無實用

示不妄是知山

三家邨裏走出來別無長處 身呆剃髮
未經八十日祇合鋤山與斫柴何事隨堂
學坐究驀然撞采笑開口此事本來太易
易打七得來未啣重喫烏藤動萬千最
難學是報恩禪要令山僧滿口許須教佛

祖無住處超宗異目亦非難好把身心同
鐵鑄

示松水禪人

凡有所重即成窠臼此學者萬古之龜鑑
汝今痛念生死須猛著精彩親見含裹十
方廣大心體不可在一念不生時執方便
爲究竟專宿指示人叅父母未生前話迺
真屈曲垂慈耳核實而論直饒借未生前
爲入路即見本來面目正好朝打三千暮
打八百况佇思停機乎戒之勉之

示寂菴洽徒

須會古人無背面句一而不一異而不異
穿鑿顛頂時流大弊
言須可行行須可言見說兩到行解相應
無愧屋漏皦皦古人

衲僧家行事當直遂已志如此自利如此
利人難忍能忍難爲能爲應緣接物不隨
波上下有愧獨知是非毀譽付之何有

示誠先沈居士

四大各歸妄身本空前境不來妄心本無
且道居士面目何在吐莫謂無心云是道
無心正隔萬重關若向者裏見得透吐得
氣便可與雲門老子把臂同行將三門來
燈籠上是甚熱盃鳴聲如或不然跛脚阿
師跳在居士眼皮上呈十八變還見麼

示超默

後生可畏既信向法門須先識因果明罪
福視世味若嚼蠟觀身相等空華諸惡不
作衆善奉行然後遇明眼人一指一撥自
然情盡光圓多見世人通身墮在五欲坑

幾五

五

內人天路上尚是站脚不穩妄欲插入佛
祖位中可發一笑信筆書此惟自重自勉

示茆谿森上座

茆谿森上座一見投機結制後十日偶閱
宗門統要出公案十則令上座拈頌端能
不負先聖有益後賢因說偈證之偈曰青
竿一擲碧潭渾再擲千峰雷雨腥寄語南
山白額虎我欲推蓬最上層

示韞荊壁上座

壁上座多年參學真切爲已不肯輕發躁
露迨叅我大雄一見得之累呼入室因命
尅期取證不一日捉敗趙州驚人之句皆
從實地中流出舉古人公案驗之悉能不
爲語縛且志願遠大惟視人如已豁達太
度當爲佛祖出氣可耳

示健禪人

古德削骨還父削肉還母方現全身爲親
說法此間學者須是削骨還父削肉還母
克現全身方能聞我說法

爲行燭剗草

寸絲墨墨隱全形兩眼清清水浪行今日
一刀齊斷取本來空廓好分明薦喝一喝

示求摩頂

檀越求摩頂授記師云你見本來面目麼
檀越應諾師展手摩空云我與你摩頂竟

示起源荃菜

信爲道元功德母篤信好學超佛祖看取
千絲頓斷時大丈夫兒我真我名汝曰超
源字汝曰洞悟

示復行者

清淨三業讀誦大乘讀而無讀誦而無誦
見思路絕言語道斷盡十方世界是沙門
一隻眼雪峰多口不得趙州插足不入祇
愁活不得死不怕死不得活

示西塢古樵謹塔主

住在塔院當時時見祖師一草一木皆演
法音一動一靜無非佛事轉一切境勿爲
一切境轉用一切時勿爲一切時用斯真
大丈夫不忝爲佛祖兒孫也

自勵四誓

一誓不與本分間隔作一佛事乃至一稱
一禮一誓不與本分間隔爲一人乃至交
一言一誓不與本分間隔閱一書作一字
一誓不與本分間隔一坐立一譚笑

丙申三誓

重佛祖慧命故立此三誓一非透向上關者即精明教理誓不獎借一非透向上關者即精通文學誓不獎借一非透向上關者即富有福德誓不獎借

客問

卷五

七

客問學道如何不蹉路曰善哉問世之不參涅槃堂裏禪者難乎其不蹉路矣雖然當今傳法者徧界方行等慈不擇淨穢開闡無遮度諸疑謗先進者以廣接爲心後進者以易入爲事知名盛而實衰辯名似而實非者難道全無敢謂罕有吾言之安足爲人重而可與子深言之也哉客固請曰如子之不以人廢言吾姑與子漫言之學道欲無首越之燕之數第一須發心諦當或志小見近圖作世間善人只消讀治

世聖賢之書行治世聖賢之事或遵行如來權教法門助其修省亦有益無損若欲究竟出世無上妙道當顯爲生死始得顯爲生死則博聞強記如慶喜一問十答如香嚴百鳥銜華如牛頭千指遶座如夾山尚須捨已從人況降斯而下者乎不爲生死必尚知見此道不屬知見不爲生死必務功能此道不屬功能不爲生死必慕豪放此道不屬豪放一尚知見務功能慕豪放則非愚即狂成魔落外善因而招惡果多自不顯爲生死學道者而成豈不一蹉永蹉哉第二須工夫諦當既爲生死發心學道可不返躬自省果能具大根器一聞千悟也未若也未能須叅一句話頭一日不透一日叅一月不透一月叅一年不透

一年參一生不透一生參今生不透來生
參永無退失永無改變方謂之諦當工夫
參定一句話頭便是斬知見稠林之利刃
度生死苦海之慈航解雜毒入心之聖藥
指萬古迷津之導師不集善而自集不斷
惡而自斷不持戒而自戒不習定而自定
不修慧而自慧不課佛而自課不誦經而
即誦不求生勝處而自生勝處不求多善
友而自多善友本不求譽亦莫可毀如是
顯一如是精進如是久遠縱未發明亦現
在可爲後學規模將來必得佛祖心髓倘
名色爲生死學道而起傍疑求別助生異
見多外驚憚艱辛喜快便管教百妄交集
其蹉可勝言哉第三須悟處諦當既顯爲
生死純一參究必待工夫窮力極時至理彰

命根斷本來面目現不疑生死不疑古今
不墮坑落塹不彊作主宰不認識神不陷
空豁不涉矯亂不入邪師圈續不犯明眼
料簡儻魚目爲珠瞋睡當死以鹵莽承當
爲有力量以硬差排爲不疑以麤放狂亂
爲大機大用以顛頂爲透脫無餘竿頭宜
進而不進言句應參而不參不煩穿鑿而
穿鑿不可抹殺而抹殺入門一蹉異解雜
陳所謂可痛哭流涕長太息者非此類乎
第四須師承諦當非但無真傳杜撰阿師
不可承虛接響即沿流不斷者亦須察其
行實不擔條斷貫索謬自主張蹉過師家
相爲處否不孤負師家腦後深錐否洞明
從上網宗否不施爲偏重瞎人眼目否若
無真正作家宗師爲之打瞎頂門眼奪却

肘後符則雖有實悟白了則可爲人則禍
生儻若已見既偏投人又謬自方空豁復
向瞎棒瞎喝下似水冷水如空合空謬執
金剛寶劍斬盡一切爲實不知我王庫內
無如是刀盲引衆盲江河日下或自入處
廉纖沾著邪知惡解家滋味邪毒入心如
油入麪更或不知錯認漫云自肯不受人
究竟謂之不被他轉却又或云我見處是
的只要行履了此等何足挂之齒頰第五
須末後諦當末後一句始到牢關靈龜負
圖自取喪身之兆不透末後牢關而言得
大機大用不透末後牢關而言具本分草
料其不爲麤惡狂徒者鮮矣不透此關有
正悟者猶可爲一時唱導之師如無正悟
不知有此關者其於古人參悟與悟後重

疑不移前作後指悟爲迷者鮮矣謗先聖
誤後人皆繇不知向上一關可不畏懼乎
自利不全利人不足皆繇不透向上一關
可不惕厲乎第六須修道諦當雖發心諦
當工夫諦當悟處諦當師承諦當末後透
脫諦當更須自己覺察是頓悟頓修根器
否是果地善知識否打成一片速於香林
否不走作過涌泉否現業流識淨盡否事
事無礙否行解相應名之爲祖試看先宗
是何標格第七須爲人諦當不可有實法
幾五
與人不可騙人云有方便助汝易入不可
教人不參死話頭決要人真參決要人實
悟決要人悟後達向上關候決以見性謂
之悟不可輕意牢籠人於人認識之謬哄
云有省於人向念未生時認妄爲真印云

有入圖一時門庭熱鬧不顧展轉誤賺邪法縱橫病發於此寧絕嗣不亂傳方謂之爲人諦當前六種不諦當則自錯後一種不諦當則錯人良藥苦口忠言逆耳憐子請之誠而示之甚弗輕以語人

客問士大夫可學道乎曰噫難言之矣士大夫不可學道乎曰噫是何言歟客曰師半肯半不肯何也曰吾明語子世之言道者不一教子問道於我豈非以了生脫死見性成佛之道乎此道不可以有心得不可以無心求離婁無以用其明師曠無以用其聰公輸子無以用其巧甯武子無以用其愚不能忘身不可以學道不能忘心不可以學道不能忘世不可以學道名不能忘不可以學道利不能忘不可以學道

卷五

士

妻孥眷屬不忘不可以學道家園事業不忘不可以學道知見不忘不可以學道記習不忘不可以學道喜有靠傍不可以學道貪易畏難不可以學道而士大夫果能如是乎儻把智慧不向他處唐喪猛看破此身虛幻一息不來即便敗壞此身尚爾無可把握身外更有何可留戀努力向天地未成人未立自己身心亦無之前一回證自廣大性體方知自性本自清淨本自具足本自不生滅自天子以至於庶人無一不宜爲無一不可到豈士大夫而云不可學道耶

機緣一

僧問如何是函蓋乾坤句師鼓腹云我容得你者些人萬萬千進云如何是截斷衆

流句師云趕得你無腳跑進云如何是隨波逐浪句師云容你在者裏立片時

師問僧玄沙是汝虎話你如何會僧舒五指云牙爪齊露師便打復示偈云生平不出嶺一語古今傳明眼人難會君須向上看

師問僧云向父母未生前道將一句來進云八角磨盤空裏走師指香盒云者是什麼僧擬議師便打僧無語師云真誠莫作小兒嬉

問行堂云飯桶裏多少遠磨眼睛堂罔措問火頭三世諸佛向火燄裏說法還端的也未頭亦罔措師指傍立一僧云惟有者箇師僧解答話便歸方丈

圓頭問和尚病好了麼師云我從來不病

有何好不好進云某甲不能親近得和尚師云我日日在你園中

退菴呈世尊拈花頌云倚天長劍露鋒鋦拈出何人敢近傍潦倒飲光輕觸著面門血濺太郎當師云只見錐頭利不見鑿頭方進云却被和尚看破師面壁云誰人知此意令我憶龐公

僧問如何是有拄杖子與拄杖子師云長安風月貫今昔那箇兒童摸壁行進云如何是無拄杖子奪却拄杖子師云多少人

飯籬邊餓死

卷五

十二

師還江上度親張靜涵老居士過訪十方菴話次伸問塵勞中如何得本師云居士者一問從那裏來士無語師云昔雲棲大師雖不主持宗門指示人參究却甚諦當

嘗盛稱人著述之妙末後提撕有云須看者段光明從何處流出於此著眼便是得本之捷徑士云如何用力師云者箇代居士不得

師一日入庫房指團子問庫頭吸盡西江

卷五

三

即不問你試吞却者兩籬團子看進云吞却了也師云大衆喫箇什麼頭答不契師自代云樂則同歡

僧問不與萬法爲侶的是誰師云桌子板凳

韞荆壁入精進三次日上方丈云某有箇見處師云狗子爲甚無佛性韞拳師肋下云一向在趙州處落節今日在和尚處拔本師便推出次日復入師云盡大地火發得何三昧不被燒却進云特來度夏師便

喝壁呈頌云圓似滿月圓寬同大虛寬歷劫無姓氏從來絕躋攀聖凡由此出剎海在伊安始終無變異觸處善隨緣師云還會適來一喝麼壁使出

師從龍淵歸問侍司云你十二時中還見念頭起處麼進云念頭了不可得更覓什麼起處師云我適來見一塊石有九十九條縫

修殿公務作禮師云釋迦老子向灰瓦上轉大法輪什麼人得聞衆無語師云好生看取壁侍司作禮云請和尚答一轉語師云問將來進云聞的事作麼生師云逼塞虛空無縫殿東西南北月輪紅江上歸師問衆云大地無寸土是什麼人境界一僧進云和尚家風師云如何大地

無寸土是山僧家風僧不能答師代云常州湖州杭州

僧問大地山河即不問一毛頭上事如何師云吞取七箇八箇進云不會師云吐却兩箇三箇

僧問如何是萬法歸一師云天圓地方進云一歸何處師云地方天圓

僧問百千法門無量妙義如何是第一義師云橫七豎八

問如何是本來面目師舉扇示云不得喚作扇僧禮拜師云伶俐衲僧

問前不得後不得時如何是出身處師云前去佛殿後去東司爲甚不得

問僧父母未生前道來僧以手外拱云遍界不曾藏師云遍界不曾藏因甚偏向那

卷五

十四

邊僧無語師云何不道某甲指東畫西僧參師云承你遠來無可供養將五間禪堂與你一口吞却進云大地無寸土吞箇什麼師云多少人恁麼道荅第柄各打三十了也

僧問一塵透脫千界光輝爲甚十聖三賢不明斯旨師云你莫管他十聖三賢且道虛空作麼生證進云覓虛空了不可得師云恰是進云和尚是大善知識師云正要你檢點僧擬議師云直透萬重關莫住青霄裏

卷五

十五

師問圓證堂寮主云香爐幾時成佛進云成佛久矣師云昨夜被虛空壓碎你還知麼僧擬議師云脫空妄語漢師雲覆菴歸侍司中路接師云你來得遲

將前面遠山與你作點心侍擬議師以拄杖驀面劃一劃云再加一分賤錢進云也不得將別人家物作人情師云不但賤錢點心也消受不起

師在磬山爲侍者夜則隨堂坐香一杓未開靜即進方丈老和尚見云今日香完何早師云自是我不去坐也尚云見甚道理不去坐師云即今亦無不坐尚驀拈案上石屋錄問云者個是甚麼師云却請和尚道尚云你不道教老僧道師云情知和尚不敢道尚云石屋錄我爲甚不敢道師云隨他去也尚云賊誣老僧師者裏透不過直得大淚如雨一晚目不交睫立尚單側竟忘入寮至五鼓尚呼云不用急我爲你舉則古話昔日龐居士初見人時也似你

一般孤孤迴迴開口便問人不與萬法爲侶者是誰馬祖當時爲甚蹋向前一步云待汝一口吸盡西江水即與汝道師云某有一頌尚云汝頌云何師呈頌云不侶萬法的爲誰誰亦不立始親渠有意馳求轉瞬隔無心識得不相違尚云不問你不侶萬法要你會一口吸盡西江水師於言下大悟迺拂袖而出尚後凡有徵詰師皆當機不讓尚迺深肯有再來之稱

師歸報恩衆叅師拈拄杖云先師和尚今日在山僧拄杖頭上示現全身舉揚大法還有共見共聞的麼出來互相激揚僧出師便打又僧請益臨濟照用師卓拄杖云喚作拄杖子又是先師和尚喚作先師和尚又是拄杖子汝作麼生分析僧喝師便

打僧又喝師直打出法堂

茶頭作禮師舉杖問云趙州茶報恩棒你試敲嚼看孰苦孰甜頭擬議師以杖趁出僧述從前工夫師隱几而卧僧述畢師云我適來困你說甚麼僧無語師趁出

卷五

十六

師在古山禪院因侍者還山自持裹脚布往洗一僧迎拜求開示師云洗裹脚去僧接得喜躍而去師大笑僧洗淨持來師接云會麼僧云是教學人淨除垢污師云恁麼汝只會洗裹脚

俗士跪求開示師云起來了與你道士起師便出

僧胡跪云求和尚慈悲師云我無慈悲進云和尚不慈悲教某甲如何師云教你橫又橫不得豎又豎不得

卷五

十七

僧號無字師問旁僧云如何號無字進云因叅無字故以爲號師笑云叅乾矢橛時如何

僧甫出家即掩關寄偈求開示師批遠云汝病甚拙速來猶可救僧破關來求教師云我救汝已竟

問因地一聲時如何師云慚惶殺人

師問慧遠進堂幾日了成得什麼事遠舉脚云草屨破也師云昨日有人與麼道三十棒趁去也遠作掩耳勢師喝出

問如何是學人安身立命處師云者裏無你安身處進云教某甲畢竟作麼生師云教你進又進不得退又退不得

普慧問某甲得箇惡夢師低頭休去慧在方丈前叫喚師喚入云是你叫喚麼進云

是師便打

師問僧多少年紀了進云三十二師云那裏人進云長興師展兩指云者個指頭爲甚短者個指頭爲甚長僧無語師云適來一一荅得問你兩個指頭便荅不得拈杖便打

僧問某甲生死不明求和尚開示師云青頭白臉禪和子對人說鬼話進云不會師云得與麼沒廉恥

僧問學人大事不明求和尚開示師云十

二時中如死人作活去

無塵問如何是定師云顛顛倒倒進云如何是慧師云愚愚癡癡進云如何是定慧總持師云又顛倒又愚癡

僧參師問云那裏來進云淮安師豎拳云

淮安有者個麼進云某甲初出門師云家裏事也不知

僧問如何是本來面目師云兩眼一鼻僧問如何是奪人不奪境師云洪武門前紅檣中進云如何是奪境不奪人師云踢破鴻門樊噲怒進云如何是人境兩俱奪師云推倒須彌山捏殺恒沙佛進云如何是人境俱不奪師云一華一國土一葉一釋迦進云四句已蒙師指示末後一句事如何師便喝

法五

十八

打七次師徵僧云如何是本來面目進云拄天拄地師舉杖云者個是什麼進云識破不值半文錢師便喝翌日呈頌云本來面目真奇特古今千聖難捉得血氣丈夫看破了含容沙界無得失師示之云本來

面目無奇特驚奴白牯何得失衲僧漫言
看破了青藜拄杖打一百知痛癢羞不輟
二祖當年依位立

師指庭梅問僧云古人若爲道時人見此

一株華如夢相似進云某甲不見師云不

題五

九

得在者裏妝盲作聾便趁出又僧請益師

云會得同根兼一體方好前來喫蒺藜僧

擬議師便打

師洗手次僧問某數千里來特求開示師

云却值山僧洗手

守塔次僧叅師云還見先和尚麼進云

何得當面諱却師云作家禪客僧作禮云

謝和尚慈悲師云得個驢兒便喜歡又僧

叅師云如何是沙門眼進云不會師云挑

土去

師問白車黑豆未生芽時如何進云葉徧
十方師云已生後如何進云寂寂地師云
生與未生相去幾何進云一串穿却師便
喝車禮拜

僧請益臨濟三玄三要話師云臨濟無此

語莫謗臨濟好

僧問如何是終日焚香擇火不知身是道

場師云近進云如何是終日焚香擇火不

知真個道場師云普進云如何是終日焚

香擇火不知焚香擇火師云別進云如何

是老僧年來無事一味焚香擇火師云收

進云如何是千語千當不如一默師云毒

師問雲居百文有省如何是他省處進云

十字街頭遇父親師云你何不道打失鼻

頭張大口進云有理不在高聲師云捲却

拜單呢進云俊鷄撲天飛師云又道有理
不在高聲師又問百丈云即此用離此用
馬祖挂拂舊處馬祖云即此用離此用百
丈亦挂拂舊處爲甚却與他一喝進云虎
頭虎尾一時收師云百丈已有省解捲席
解挂拂如何又道於此三日耳聾進云不
是個中人不知師云雪竇云大冶精金應
無變色呢進云千峰勢倒嶽邊止萬派聲
歸海上消師云張無盡如何不肯他進云
情知他是個俗人師云大慧爲甚却肯無
盡進云偶爾成文師云你若作大慧時如
何進云居士更須喫棒始得師云我道許
他各具一隻眼居禮拜師云你作無盡時
如何進云某甲今日耳聾師云何不道下
官造次

卷五

二十

衆僧新進堂衆師云此間禪堂如百沸鑊
湯諸上座於中須自知冷暖衆無語師云
久立珍重

茆谿森入室師令頌本來面目茆進頌云
乍晴雲散合滿天風月到人間師云與汝
三十棒

森知客入室師云古人道悟則不無怎奈
落第二頭既是悟了因甚落第二頭進云
爲有悟在師便喝

卷五

主

緯書記作禮師指庭前石云他衆得禪麼
進云衆得師云你衆得麼緯擬議師云分
明無彼此擬議便請訛
僧衆問兩度大雄門庭高峻聲未絕師便
云爲什麼當面蹉過

師指露柱問僧者柱有九千九百九十九隻眼睛你曾數過麼進云不會師云你進堂幾時了進云半月師云念汝未久

師問僧蟯螟蟲吞却南山白額盡大地人寒毛卓朔阿誰解得者場開僧擬議師云

幾人於此茫然

僧經行次師一拳打倒云髑髏粉碎時如何僧擬議師復與一拳

收飯僧乞開示師云三年後爲汝劈破髑髏僧作禮師云十字路口莫蹉過周顛僊

迺說偈云大好周顛僊宛有大人作打破一桶糴一桶報太平

師問僧山僧手中香板穿却常住七個禪和子鼻孔透四天下三匝爲甚一個不知進云和尚得恁老婆心師休去

師問僧庭前梅樹穿却兩個禪和子鼻孔透四天下七匝爲什麼沒有人知進云謝和尚指示師云山僧罪過

僧問見性成佛如何是性師云江上祥雲滿

師問京書記昔日那吒太子析骨還父析肉還母然後現全身爲父母說法大雄今日開爐上座入爐全身鍛過荅得一語我便肯你進云今日好雨師云衆生顛倒迷已逐物進云者是什麼所在說已說物師云天帝與東海龍王同時設供上座赴阿誰請進云一口吞却師云饒嘴禪和又云天供龍供許你一齊吞禪堂許多大衆向那裏撒溺京良久師喝云者鈍漢師問僧證得虛空時無是無非法你作麼

生會進云全體獨露師喝云墮坑落塹小
閣黎笑倒山僧麤竹篋

師問僧錢塘江火發燒得東嶽齊天大帝

額頭汗出北海龍王替他打醮直令西嶽

華山觀裏一百二十個道士手忙脚亂且

道甚人解得者場熱鬧進云大家在者裏

師云放汝三十棒

大覺普濟能仁玉琳琇國師語錄卷第五

音釋

驚

無暮切
音務

續

胡對切
音會

睫

卽涉切
音接

賺

牀陷切

幾五

二五

大覺普濟能仁王琳瑯國師語錄卷第六 幾六

嗣法門 人行 岳 編

機緣二

衆僧參師顧左立大衆云春雨連綿炊煙欲斷行脚須具行脚眼來此苦寒所在作

幾六

甚麼一僧進云久仰和尚得得而來伏望

大開甘露門慈悲攝受師云恁麼則饑時饑殺閻黎渴時渴殺閻黎師復顧右立大衆云不惟柴米艱辛而且出坡辛苦你們又來作麼衆無語師云既到者裏大家挑

幾擔石頭

師與一秀才話次謂云你合會得天地同根萬物一體進云某甲何嘗不會師云爲甚殺生食肉

二僧參師豎拄杖云是什麼一僧仰視師

打云蠻大拄杖也不識一僧云茶毒鼓師打云皮下有血麼

師洗手次問侍司云瓦盆走入你鼻孔你鼻孔在我手巾裏打坐答云思大難騎師云只恐不是玉是玉也大奇進云和尚也須著眼始得師笑云山僧如千里之駒未免一蹶

師指露柱問僧云兩個露柱三千三百九十九個眼睛且道那邊多一隻那邊少一隻僧無語師云水寒魚不食滿船空月明師在報恩客寮問僧你道我者裏將甚麼請客僧答不契師自代云盞盞烈火知屋間如何是佛師云枋是匾的柱是圓的進云如何是法師云總是亮的門是暗的進云如何是僧師云頭是光的脚是赤

的

師拈扇示侍者云古人道青絹扇子足風涼你作麼會進云以實供通師云如何是以實供通的事進云青絹扇子足風涼師云是你以實供通進云和尚又作麼生師袖扇云會麼

徑山僧叅師云在徑山多少時進云若干時師云山上有鯉魚麼進云初學不會師云國一禪師在汝脚底

七僧入室久立師云難難難七石油蔴樹上攤衆無語一僧問如何是西來大意師云橄欖兩頭尖問萬里無雲時如何師云青天也須喫棒進云朗月當空又作麼生師云階下漢問如何是須彌山師云腰纏日月頂住諸天問狗子還有佛性也無師

卷二

二

云有進云趙州爲甚道無師云趙州道無山僧道有問一念未生前如何是本來面目師云描也描不成畫也畫不就衆擬退師云且住良久云難難難七石油蔴樹上攤薦歸寢室

丙申夏過大雄師落藥師堂柴頭問生死不明求和尚開示師云你走路不要動脚砍柴不要動手說話不要動口

茶頭問生死不明乞和尚開示師云三口茶鍋兩口破頭擬議師掌云打濕眉毛也

卷六

三

不知

僧問叅話頭直下空豁豁地爲甚麼不識本來面目師云我近日牙疼鈍置許多人問某甲昨夜得一夢凡聖都在者裏師云開眼夢語僧無語又僧出作禮師云適纔

那僧道凡聖都在者裏你道者裏是甚麼所在進云莫不是方丈師云你也開眼作夢僧無語師云與那僧一耽埋却

山西僧問祖師西來直指人心如何是學人自心師云五臺山頂浪滔天

問已事未明如何用心得徹悟去師舉扇云扇子十六根骨進云離心意識作麼生叅師指墜云此是奇南香墜進云向上還有事也無師云穿却你鼻孔刺瞎你眼睛衆叅師云諸人從實道看是有眉毛的是沒眉毛的一僧云有眉毛的師云快須拈却一僧云眉毛穿却鼻孔師云矢上加尖衆擬議師旋風打散

衆僧叅師豎拄杖一僧跪求細開示師云舉不顧即差互一僧云是拄杖子師云點

汙了也一僧云謝和尚證明師云順朱填墨一僧云不會師云刺破汝眼睛一僧佇立師云幾人於此茫然一僧禮拜師云一箭射一羣

師問僧十二時中如何用心進云學人不會師云我正要箇不會的與露柱作伴僧禮拜立師云一對木頭

道信江居士求開示師云你還信得自己是佛麼進云信得師云信得無眼耳鼻舌身意麼進云信得師豎拳云喚者箇作什麼士無語師云了得一切信得自己

火頭問柴盡燄絕時如何師云直歲打普請榔進云大地無寸土向什麼處斫師云摸摸眉毛看頭擬議師便喝
僧呈香巖上樹頌末云枝頭盡是忠腸血

莫認楊花當蕊。戒師徵云：你那見他忠腸血進云：看破了也。師云：又認楊花當蕊。戒師至圓證堂問東單是甚執事。進云：起造公務。又問西單呢。進云：日用公務。師指中云：三尊佛呢。衆無語。

幾六

師至大義堂問田寮今日作什麼。進云：岸水問柴寮上山麼。進云：上山。又問園寮今日作什麼。進云：鋤地。師指中云：觀音菩薩呢。衆無語。師良久云：我道田寮也不曾岸水柴寮也不曾上山園寮也不曾鋤地。惟有觀音菩薩忙碌碌地。

師謂僧云：我有一方濟世大黃八兩水二碗濃煎頓服。你肯喫麼。進云：某甲無病。師云：再加四兩一居士作禮云：且喜醫王出世。師云：服後如何。進云：作風作顛。師良久。

幾六

五

云：我不答是肯。你不肯。你進云：待肯堪作甚麼。師云：渣再煎。進云：請師珍重。師大笑。師到大雄問觀堂僧那裏人。進云：溫州人。師云：你認得永嘉大師麼。僧無語。師云：永嘉大師在你脚底。又問一僧那裏人。進云：溫州人。師云：你道永嘉大師爲甚在你鄉里脚底。僧亦無語。師云：又是一箇瞎漢。又問衆僧云：昔有人問雲門樹凋葉落時如何。門云：體露金風。汝等作麼。生會衆無語。師云：樵柴時鋤山時種園時打飯時不要蹉過。雲門老子衆作禮起。師云：將謂吾辜負汝。便出堂。

師一晚落堂云：古者道上上等人閉門打睡。接中等的人要開了門。接下等人要下階去接我。却道上上等人落堂來接衆。

無語師顧侍者云你何不道請和尚閉門打睡去

僧叅師問那裏人進云宜興人師云銅棺山高多少進云不曉得師云你不是宜興人

僧叅師問潑面春風還有吹不著者麼進云謝師垂問師云面皮厚多少僧拂袖出師云恰是

檀越問如何是本來面目師云喫茶不濕口

癸卯秋舟次荆溪梁溪間見一菴門聯云有水皆含月無山不帶雲師顧船頭煎茶行者云此妄言綺語行者曰何也師指茶具云鉢中有月否行者揭開鉢蓋師云太費力生一北來行者從旁作禮云無水有

月否師以手作月勢云涼生生爍汝面門者作禮師云汝只知箇作禮進云禮拜無不是道師云熱饅頭不喫却想冷饅饅藏堂大衆叅師云箇藏若見有一字即墮地獄如箭射衆作禮師云金輪峰下不是人間

師舉破塵出經卷乃豎起扇子問僧云者箇是塵作麼生破一僧云正是學人疑處師云何不道某甲祇見經卷不見扇子又喫茶次舉起茶鍾問僧云者箇是塵作麼

卷六

六

生破僧無語師云何不道某甲終不敢向四威儀中見和尚又有僧進云虛空粉碎大地平沉師云你祖翁墳墓呢

僧作禮師云祖師在你眉毛上僧無語師云却在你腳底下

關中僧叅師云佛法長安有

僧問大通智勝佛十劫坐道場爲甚佛法
不現前師云瞋睡進云祇如現前大衆安
禪打坐與古人是同是別師云大開兩眼
進云如是則千古意分明去也師云自領
去

幾六

七

問僧昨者有居士請益曾向他道請與露
柱同叅汝代進語看進云小出大遇師云
何不道直透萬重關不住青霄內

問菜頭菜藍裏多少祖師頭無語師云鈍
置祖師

問僧如何道鐵蛇鑽入海撞倒須彌山進
云棒打石人頭曝曝論實事師云怎見得
是實僧作禮師云何不道開山祖師面目
現在

千丈巖僧叅師問如何是祖師西來意僧
無語師云石頭古怪松奇特

衆僧叅師云鐵蛇橫古路僧無語師云識
法者懼

僧問和尚云切虛空爲細末攝大地入一
毫學人向何處安身立命師云一莖兩莖
斜僧無語師云何爲竹拍不響

大智察僧問看未生前逼拶到身心不可
得如何行持師云露柱前觸目菩提進云
和尚工夫說中道妄認四大爲自身相見
聞覺知爲自心相除此二途向何處著落
師云山牆後圓光萬丈

全知藏收米回師指紗燈上牧牛圖問云
燈上爲甚麼有許多牛藏禮拜云總不出
者一頭師笑云者樣辛苦又喫此一鞭

師喫茶次顧侍僧云兩箇圓眼核誰賓誰
主侍云賓則總賓主則總主師云如何總
賓侍荅不契師代云明似鏡又問如何總
主荅亦不契師代云黑似漆

僧叅師云欲識永明旨門前一湖水日照
光明生風吹波浪起明甚麼邊事進云永
明大師一時方便師云何不道面目現在
問火頭火燄上誰轉法輪頭禮拜師云三
世諸佛在汝脚底

僧呈偈有踢翻須彌語師云只如旭日峰
作麼生翻轉進云拋却旭日峰請和尚鑑
師云何不道喚什麼作旭日峰僧禮拜師
云佛法世法一齊放却去眼空四海去并
眼亦擲瞎去

四僧叅師問一僧云如何是道僧禮拜師

卷六

云何不道步步蹋著實地來問第二僧你
試道看僧云初叅師云何不道同行不同
步又問僧如何是禪二僧同作禮師云何
不道此去禹航一百二

僧問古人爲何立雪齊腰進云不入虎穴
焉得虎子師云笑倒嵩山數十峰

頌古

舉趙州問南泉知有的人向甚處去泉云
山前檀越家作一頭水牯牛去州作禮云
謝師指示泉云昨夜三更月到牕

幾

九

雪中春色梅梢見黃鳥聲聞意氣新意氣
新誰知黃鳥笑聲頻說與風流明敏者眼
從今日碧華自去年馨

舉歸宗常禪師素與南泉同行忽一日相
別煎茶次南泉問曰從來與師兄商量語

句彼此已知或後有人問畢竟事作麼生
宗曰者一片地大好築菴泉曰築菴且置
畢竟事作麼生宗打翻茶鉢便起泉曰師
兄喫茶了普願未喫宗曰作者箇說話滴
水也難消

賓則始終賓主則始終主金鎚各逞藏鋒
技父子不傳兄弟同氣和烟搭在玉欄干
上苑垂楊鳥深處

舉陸亘大夫向南泉云肇法師也甚奇怪
解道天地與我同根萬物與我一體泉指
牡丹華云大夫時人見此一株華如夢相
似

一枝華發十分春觀徹根源把玩新堪美
大夫打失鼻共來笑傲古今人

舉僧問疎山禪師如何是法身山云枯椿

如何是法身向上事山云非枯椿

一拳拳倒黃鶴樓一踢踢翻鸚鵡洲有意
氣時添意氣不風流處也風流

舉慈明祖師僧問閻中取靜時如何云頭
枕布袋

悟入汾陽鞋穿足裂塞却口門出廣長舌
如鐘在簷小大徐疾有扣斯應渾身金石
三玄彈指四看語默易知難會易見難識
運棹洛伽雲開兜率

舉瀉山有句無句公案

二八嬌姝閨閣中錦帳珠簾隱玉容凝郎
把玩簾和帳祇堪一笑動悲風至今逐塊
韓盧隊怎識高居赤眼龍

舉本來面目話

者個本來面光明處處徧却之無可却薦

之無可薦如月麗中天光照滿林澗漢來
漢來形胡來胡來現知即不能知見即不
能見放下便相親趣奏轉成間千七百葛
藤總是個方便

舉僧問乾峰十方薄伽梵一路涅槃門未

幾六

十

審路頭在什麼處峰拈拄杖畫一畫云在
者裏僧又問雲門門拈扇子云扇子踳跳
上三十三天築著帝釋鼻孔東海鯉魚打
一棒兩似盆傾

桃源住在避秦先覓個漁郎問渡船雞犬

桑麻爭笑舞笑人撈撻水中天

舉趙州至一菴主處云有麼有麼主豎起

拳州曰水淺不是泊船處便去又至一菴

主處曰有麼有麼主亦豎起拳州曰有殺

有活有縱有奪便作禮

幾六

十

短棹輕帆狎怒濤東行西止任逍遙去留
不出蘆華岸陸地追尋人自勞

舉玄沙禪師普請斫柴次見一虎天龍曰
和尚虎沙云是汝虎

青天白日遇個怪好心告人成自壞從來

賊不入貧家玄沙獨步千峰外

舉鄧隱峰禪師推車次馬祖展脚在路上

坐峰云請師收足祖云已展不縮峰云已

進不退迺推車碾損祖脚祖歸法堂執斧

子曰適來碾損老僧脚的出來峰便出於

祖前引頸祖迺置斧

清風拂白月白月照清風千古徹人吟嗟

人春夢濃

舉芭蕉山慧清禪師上堂拈拄杖云你有

拄杖子我與你拄杖子你無拄杖子我奪

却你拄杖子靠拄杖下座

蕩蕩一條官驛路晨昏曾不禁人行渾家
不是不進步無奈當門荆棘生

舉馬祖令人馳書併醬三甕送與百丈丈
令排向法堂前廼上堂衆纔集百丈以拄
杖指醬甕云道得即不打破道不得即打
破衆無語百丈便打破歸方丈磬山先老
和尚云老僧當時若在衆中管取大衆沾
恩亦不使百丈失利待他道道得即不打
破道不得即打破但出衆抗聲云喚典座
來快擡將去雖然也作死馬醫也老僧更
爲諸人頌出堪嗟一衆是疑團打破從教
仔細看若得磬山當座下林間怙怙地相
安

粥飯禪和萬萬千費人鹽醬若爲言馬祖

幾六

十二

寄來只三甕百丈傾厨倒庫添倒庫添也
徒然一言九鼎能扶起疎鐘高擊冷雲邊
和普明禪師牧牛頌

未牧

湘之南潭之北頭角分明東觸西觸

初調

少獲頭多捕尾月下風前盛弱掃矢

受制

面月白蹄墨黑有索有鉤忍饑受渴

回首

遠邪蹊趣正道步步登高山長路杳

馴伏

戴寒鴉履芳草毛骨馨香見者道好

無礙

寒暑安忙閒得故鄉寬廓任出任入

任運

朝隴畝暮茅簷隨時水草明月同閒

相忘

刀砍水珠斷貫澹泊寧靜明志致遠

獨照

卷六

失却牛撞破壁一箇閒身赤灑灑立

十一

雙泯

拋靈符瞎正目函乾蓋坤火寒雪毒

書問

復帖瞻戴廷丞

在在是居士菩提場物物是居士正法眼
事事是居士菩薩行步步是居士那伽定
使十二時不爲十二時使轉一切境不爲
一切境轉斯爲道人若一處光不透脫一
時光不透脫即本分不透脫須刻刻向父

母未生前絕思惟無依倚既恒且密時至
道成冷眼圓明方知在在是菩提場物物
是正法眼事事是菩薩行步步是那伽定
使十二時不爲十二時使轉一切境不爲
一切境轉此言不欺人也居士心光時注
天目居士慧性不昧古今居士至行大建
法幢奉復不覺纒纒

荅王泰卿居士三問

問爲人容易做人難敢問爲人之道師云
已所不欲勿施於人問何爲知生何爲知
死師云知所從來爲知生知所從去爲知
死問臨去時心不顛倒意不散亂在何處
捉摸師云驗在目前師復云居士真爲生
死須知制心一處無事不辦但勤持藥師
如來萬德洪名持到持而無持微見念未

生前本來面目則率性而行頭頭是道所謂發而皆中節天下之達道也如是方能了生脫死方可出死入生何謂了生脫死如太虛空先天地而生後天地而不老何謂出死入生譬如大海日照光明生風來

表六

十四

波浪起到此則去來自在天壽不二又臨去時作得主有二種徹見本來面目則了知生死不相干如上所云若未見本來面目勤持藥師如來則臨命終時八大菩薩接引上生極樂世界入不退地見佛明心因切問處請不覺纒纒

與胡彥遠居士

尋常在稠人廣衆中人人自以爲見山僧山僧直云猶隔千山在日來干戈徧界百里之間如隔千山山僧却云與居士刻刻

相睹居士以爲然否雖然刻刻相睹恐蹤迹愈疎居士其何以自處夢幻空華更莫把捉須向一念未生前證取自己廣大心體與太虛空同量包裹一切而非一切生滅一切而非生滅方是居士放身命處不盡

荆山旅堂寄上大慈老人

師太年高當一切莫管惟向父母未生前看取如何是自己本來面目見得本來面目便見得佛祖面目便見得一切真子真

表六

十五

孫面目無生無死無苦無樂方是個大自在老人名之曰佛名之曰祖名之曰圓通大士名之曰清淨法身名之曰本源自性自利也足利人也足不虛來閻浮世界作一番佛事如不見本來面目則莫道子孫

眷屬冤親好惡便是自己一個身子縱保養到百二十歲一息不來便要敗壞四大各分還看得經歷還念得佛麼還顧得子孫麼還簡點得冤親麼越簡點越顛倒越顧念越誑訛便謂之流浪生死輪迴苦海豈不虛來世上喫一番苦豈不虛出家虛辨道有至性老人決不肯如此果能向未生前看得身心世界一切不可得不可得亦不可得本來面目當自見工夫得力或白松豐或不退勇或退菴重或骨巖峰皆可召而示之此四子當能體我意助師太入道也丁亥十月辛卯比丘男某百拜上師太老人慈目

荅鑑融上人

玄沙白紙周遮上座毛錐頴露雄情舒展

各吐胸襟山僧則云一別忽經歲望中雲海賒且道與雪峰是一是二他日覲面當別有以報我

與洽西堂

刻刻自爲廼真爲人切弗忙披樊垢向第二門頭與人婆和但整肅堂規俾人光陰不虛度多隨衆坐幾枝香則利已利他兩得之矣莊周云觀德人之容使人意消不其然乎寮中倍宜嚴靜古人見有入房即起立焚香不以絕物爲嫌有志之士直須具如是體裁方不同今時圖熱鬧裨販之客餘想深知不贅

荅木如上人

向從天行叔侄略聞道槩眉衲歸并得手書知公真不自欺人也既知生死寤寐不

能一如須把生死岸頭用不得的知見盡
情放下嘗令熟睡無夢無想死了燒了身
心俱空境界時刻現前亦不立無夢無想
身心俱空見解不住不退無動無靜打成
一片時節若至其理自彰參須真參悟須
實悟端不虛也學道不悟斷不能斷命根
工夫不成一片斷不能悟公能悟去方可
喫過量人痛棒且道既悟爲甚又要喫棒
今時稱長者十個有五雙分疏不下公
能始終不自欺當不以此言爲過也

與豐首座

每日夜可將四炷香面壁簡點本分端能
至虛至靈至寂至妙無絲毫間斷隔礙執
著虧損等否次可以四炷香領衆直教無
人無已無動無靜所謂衲僧行處如火消

卷六

七

冰許誰近傍容誰違背再以四炷香博覽
簡點於古人正說反說遠說近說死說活
說麤說細說一一不受瞞一一舉一明三
不死人句下一一祇用遮眼否餘時方可
放參否則大事未明如喪考妣大事已明
如喪考妣當自立志若悠悠忽忽焉能爲
有焉能爲無真與草木同腐人也孟子曰
恥之於人大矣念之

與夾山六解恒長老

吾徒既擔荷此事須時時臨深履薄獨居
則閒閒地應機則似火消冰無動無靜靡
不常光現前壁立千仞自利利人庶可無
悔日來閉關啜雪羹不多及

復許叔度

所謂了生死者正了徹之了參透生從何

來死從何往則親見本來面目方爲了生死
死所謂明德新民止至善位天地育萬
物費而隱隱而費尚何偏空偏有種種邪
僻之擬哉若不親見本來了生脫死則妄
認七尺之軀爲身見聞覺知爲心譬如百
千澄清大海棄之而惟認一浮漚目爲全
潮窮盡瀛渤則有生有死無苦不生無苦
不死安而不安堪忍而已是可忍也孰不
可忍也奉寄楞嚴一部熟讀此經方知身
心真妄了生死者生而無生死而無死否
則認識爲心認妄爲真則不惟錯會釋家
本來面目常住真心等語于儒門明德中
和皆正說亦邪耳深望一生死齊壽天下
問不敢不詳答幸下學上達近思力行他
日天地同根萬物一體今日從放生護生

卷六

六

始

復戴崱瞻廷丞

全力提持如桶子脫甚爲希有方念別來
動靜不二寤寐如一否得書知不自放過
慰慰所謂如箭離弦無返迴勢正公今日
事也老龐不侶萬法深入遠詣故經人一
掩口即撒手承當一進步即西江吸盡人
徒見其收功大而左右逢源不知其入處
深而用工遠耳別諭感刻荷法護法厚望
有在不盡

復友蘭陶居士

向從先磬山得聞吼山主人石簣老檀越
潛城密證向往有年幾欲一過其里今日
何幸得公下交每逢姓陶人使我心依然
况篤信真參實爲生死如公者乎但公信

道雖篤叅究雖切而研窮未有其方凡叅
一念未生話須從有念時叅去動靜不可
打作兩橛蓋未見本來面目時則動靜皆
不離念也時應醅酢不妨醅酢時欲靜坐
不妨靜坐乃至喜怒哀樂人所不免亦不
必免須有感時即叅我有感時諸念紛紜
念未生前是何境界到一念不生即看今
知無念此亦念也縱無無念亦無無無念
前念猶淺後念愈深須如剥笋層層剥盡
如木如石木石知見亦不立行住坐卧悉
皆如是方是工夫成片工夫到得成片則
時節若至其理自彰尋常示人到一念不
生時定見本來面目見本來面目方一念
不生不是說食可止饑也病從身生身從
妄念生念未生前身尚不可得何病之有

幾六

九

如是則向一念未生前去縱未見本來面
目亦身病頓空豈能爲話頭作難知公叅
究未省力叅究未省力則與一念未生前
話不相應所謂研窮未有其方也退步向
念未生前去自然省力何如何如餘問條
復于左

所言靜坐久忽一日心大開朗無物我無
古今無一切種種差別惟見一片虛明曠
無涯際惜不久遂失之此乃靜功所現暨
歇塵勞正屬人爲並非天德勿作聖解礙
正知見若向一念未生前去因地一聲微
悟本來面目則位天地育萬物所謂峻極
發育優優大哉禮儀三伯威儀三千山野
每示人儒者不從聖經入則應從顏曾思
孟入否則認識爲心爲入世矜持善人速

成小利則可去達道大成內聖外王之學
大有徑庭此後若到一切俱無境界須如
前示將知無的亦無却如木如石木石知
見亦不立行亦然坐亦然自然悟去

荅顏賡先居士問

幾六

于

塵勞中知有大事因緣足徵般若因深誠
持十念法門當先萬緣放下執持名號一
心不亂若有念起須看念從何來看徹念
頭起處則親見自己真面目一口吸盡西
江水龐公去人豈遠哉見得自己真面目
則見得阿彌陀佛真面目攜西方來東土
也得撥東土入西方也得禪淨一致宗教
俱圓豈不真大丈夫所爲哉祝望祝望

像讚

磬山先老和尚

潛磬谷并汾苦寒遷報恩楊岐冰雪生平
不肯人慣用白雲入磨房之機印證小廝
兒誰是普化震臺山之鐸沿流不止問如
何見過於斯許嗣他

又

山僧事先師未久即獲入室自後愈近愈
遠如天之不可階愈入愈深如海之不可
汲惟此不能自己者先師嘗掀髯曰類已
後代兒孫切莫造次

自讚

幾六

于

未出芙蓉城通身佛法既入磬山室滿面
慚惶十餘年前拈條白棒欲人人得知好
惡十餘年後目睹雲霄一任人七顛八倒
龜毛拂子欲流傳未入門前分付了咄離
婁公輸難分白皂

又

者漢浙東浙西有湖南湖北有三台五臺
有四海八荒有有處共見共聞祇有一處
人不聞見他日好爲人點眼

又

若道是潛子未曾著此色衣若道不是潛
子他人無此麤眉更有些子相似等閒兀
坐無爲

阿彌陀佛像讚

我識阿彌陀塵塵刹刹現藕華如車輪頂
門豁眼看

觀音大士像讚

虛空昨夜呵呵笑笑我分身萬象中欲識
虛空真面目看取寒趺楊柳風

又

一根圓通萬德炳著欲圓種智惟稱大士

又

未展楮揮墨前觀世音大士彌滿虛空出
入一切人眉毛眼睛鼻孔唇舌乃至八萬
四千毛孔中東涌西沒及乎展楮揮墨却
走入一楮一墨中去了也求見大士者切
忌觸途成滯向文彩未彰以前薦取方有
契棒分景日一輪當午現無勞鐘鼓報新
晴

達磨祖師像讚

幾六

三

萬里來一葦別五番毒九年壁有此體裁
不愁無人立雪

大覺普濟能仁玉琳琇國師語錄卷第六
音釋

鉢蒲沒切盆入 神蒲靡切 誠思留切
聲麤鉢也 神音皮 誠音修

大覺普濟能仁玉琳琇國師語錄卷第七 幾七

嗣法門人行岳編

詩偈

贈履坦禪人兼報天一居士

鼎立三峰勢插天嶺門雖闢白雲連飛鴻

幾七

傳得人間信石壁難依過別川

入磬山

隱居風範依然在說法堂前任草生莫謂

門庭能闕寂從來此道少人行

示退菴重子住致山

澄江有山孰多僻敵山兩灣蒼翠積澄江

有水孰多情敵山前後敵水平當年一身

澹如水夜隨明月過深林化山擬作推蓬

室扁舟乘興堪深入汝今爲我先去住菴

傍閒地多栽芋忘世情懷爾我同茅鑪鐵

鏤振先風得人不在門如市猶憶當年面

壁翁

贈禪人

見道誰修道忘山好住山雪深巖屋老百

衲一身閒

又

重巖之下茅屋耽耽有幽人兮雪立冰餐

又

好山如畫畫如山紅葉村村杖笠閒看到

桃華成一笑再來雲外訪柴關

守塔懷古

多年黃葉類形骸此日徘徊誰偶諧麻衣

草履食接氣象骨崖前呼再來

咏懷

千峰絕頂尖頭屋草薦柴牀火一爐三十

年中無一事諸方何處覓潛夫

靜夜思

枝枝葉葉月疎疎密密風誰共
蹋流水倚杖石橋東

題壁

幾七

星高月曉松雨滿衣西岡危坐
嗒然忘歸

偶題

月浸千山冷風鳴萬木清一聲
村外犬客路有人行

山居

荒涼苔壁寺孤冷草堂人雨後
舒長望庭泥虎迹新

烹泉

廣修供養事如何百沸清泉上
佛陀早色爭妍排闥入鶯啼古
木梵音多

對鏡 華山蘭若

對鏡吾非昔捫懷忘自新何林
一枝別蔭我雪霜身

冬日有懷 荆山旅堂

空階栢子落饑鳥入門來千尺
危巖下梅花幾樹開

望臺山

荒濶三千路高閒一萬人當年
冰畔石遲我未歸身

舟居 三却竹林

幾七

澹蕩寒煙古木孤懸雪浪輕帆
只在尋常行處杳然萬壑千岳

又

一葉千谿水三盃六月霜逢人
不舞棹高卧對斜陽

冬歸草堂

潛形餐栢實放目看梅花何處忘機客同
來灌古畚

濟寧道中

臨溪茅屋臨簷樹雞犬依依水國村虞夏
平成風化永江南江北共林園

讀白樂天詩懷扣冰

舟次東昌

池上有小舟舟中虛胡牀我心久忘世愧
未使世忘

甲馬營夜泊

水上舟如識人間事若蕉無爲與無欲誰
共我逍遙

節食

寄形天地間飲食唯接氣翛然等個人明
此澹泊意

龍淵南塢坐月

松樹三長四短石臺七高八低坐來夕陽
在樹歸去月落峰西

晝寢

譬如木偶人鼓歇索亦住山僧動與靜請
問諸露柱

荆溪道中招友

正是千山紅葉時摩挲石壁好題詩百年
嚼蠟能多味分取松根帶露葵

高祖寢堂題壁

集七

牀頭懸瀑布塔頂長苔衣一住不復入高
寒到乃知

示衆

萬里晴空誰共三春花柳爭遊王孫醉眠
芳草何似漱石枕流

我有蓮舟一葉沙城芥劫全收高歌唾壺
擊破童稚出沒洪流

山居

胸中無一事終日坐閒閒睡起摩挲腹山
間與水間

高步

登山造極步自此始有懷君子行遠本通

促都監立還山

山中有佳月宜人終夜看山中有好風解
衣可盤桓泉鳴千嶂寂松靜一濤寒永日
鳥相喚清秋蟲自紉解聽紫芝曲喬木在
層巒活埋與斷壁千古仰金蘭時哉石梁
雉雪飲且霞餐

普請口占

年來漸覺精神復老去偏知日月閒飽飯

五

安眠無一事椎鳴隨衆看秋山

枕流臺題石

山中流水寂無聲枯木生花別有春若箇
到來知解絕紅爐分取萬年冰

庚戌二月磬山題壁

面目分明徧界親徧於此地受恩深三更
月下低徊立恍是當年侍拂巾

磬山揮麈臺

先錄法濟十咏
之一有此名

松根時獨坐花雨不從栽憶昔別峰侍無
言聲似雷

庚戌題壁 三首

本是矜矜自了僧飽餐安寢別無能酬恩
報祖雄明哲斗室焚香懷古人
一盞霜華半榻雲無求無喜亦無嗔三更
對月開扉坐慚愧焚香侍立人

卧倚青山飯白雲
谿聲鳥語共晨昏
空庭有隙栽蘭蕙
緘戶無溪入怨恩

捲簾

尋常入望驚殊絕
何意全身住此中
傳語巖棲木石侶
時時放眼識雲松

獨樂園雨後

二首

一谿銀鳳玉龍騰
想見霜華此得名
步到上方忘藥石
勞他從者請頻頻
枕流石上枕流臺
到者教君悔晚來
白鷺羣飛千澗雪
洪鐘大扣萬山雷

巡察至大義閣

癸丑燈前

花滿寒庭月滿林
巡察未半欲三更
到門且莫掀簾入
愛此樓前布水聲

邦江贈虎公至契

交道江河下於公
見古人素心千里青

目一山晴

楚州題壁

澹黃微綠拂疏風
到處垂楊適我慵
覓得小舠瓜子大一帆
漂渺水雲中

旅堂

愛柳無如我摩挲
玩歲年旅堂忘岑寂
一樹適垂軒

開窓

風聲雨聲聲聲入
耳花色草色色色幽妍

山居

卷七

六

竹戶風清江入筵
道吾一到至今傳逢場
竿木時思曳戀此華亭
雪滿船

卷名船子

示淳徒病中

接氣三盂帶消閒
一縷香石牀黃葉視何處
得嚴霜

天目雙清莊

兩峰清拍肩雙谿寒共語中有一徑清昔
人此退舉

金沙顧龍山留題宿處絕句

不問江南與江北枯藜爲友笠爲菴龍山
半日登臨足又躡春風去去慙

言志

客夢秋山遠閒情黃葉深脚麻松下石過
嶺覓禽音

題壁

栢庭霜夜月辭屋夕陽風岑寂非人境犬
聲東舍東

廣武題壁

松崖罷聽得梅而樂孤立月庭旅影落落
藕塘題壁

躡徧秋林步步霜麻衣草履自清狂逢人
樹側低徊立惆悵千峰華政黃

大雄山居

臨海渾無地潛谿却有邨蘿菴在空碧鐘
動月爲門

懷靜涵老居士

落落松根石蒼苔沒欲平江風吹木葉寒
月漾波清

懷五五弟

江流清日夜今古葉聲乾高卧石牕下一
燈相對寒

絕糧

山空水碧千指壁立摩挲布毛縫衣炊食
壬辰歸報恩

本是金峰苦行身芒屨短拄舞還新漫教

杞棘藩吾室指點泥丸光印人水滿蒲谿
流夜月風生菊徑靜芳辰好來和我紫芝
曲大小石頭正法輪

高齋對月

嗒焉忘言徙倚夜半皎皎毛髮月明九面

禪者請書

有一僊兮睡布被裏入被尋伊滿頭尿矢

又

扶起法堂拆却佛殿昔許爾聞今便眼見

又

方寸之樹生石柱底放華一葉覆徧大地

荅老母

若欲我度親別無法可度死盡世間心當
下同佛祖

江上十方菴慈氏莫染

七

修行在行不在說萬事應須猛割截者回
似斬一握絲一斬一切俱了畢頂上圓光
含十虛從今更不重埋沒非是山僧輕度
親十載先師曾記剎剎那具足丈夫儀法
名通光號悟徹不向他人行處行管教步

步蓮華國

通光先啓山
親題法名

和示峰子

山月滿檐諸子侍立面黃者黃面黑者黑
或撥爐灰或研墨汁眼明手快善知時節
擬索枯腸青藜三十

卷七

九

題壁

此偈贈一切人不能收取須還山僧
萬年冰上久安居却向紅爐放雪飛到處
逢人不相識瘦拳高枕自忘機

對鏡

有引

向侍先磬山聞瀉山荒寂有願四旬體
胖曳杖往往二十年於茲矣適浴室臨
鏡因有此偈

不是瀉山舊住僧年來四十骨稜稜金峰
峰下堪鋤石待個英靈剔祖燈

自擬

有芝東巖東風雨石爲屋高壁平莫攀龍
山高可逐

江上法願菴

到處耕荒翻石笋今來坐月友寒烟半間
老屋安親膝五合香粳努力煎

草堂月

喬林花滿地晴瀨月當天題石貽來哲應
同徹曉禪

代草堂老人示徒

雲開山突突霜重栢蒼蒼倚徙閒庭寂寒
籬菊晚香

圍爐得月峯

三長兩短此坐彼立當年有叟盆池款客
西樓題壁

架月峰前獨坐時寶峰塔在翠烟西有言
枕筆吟難就山水蒼茫客自知

中臺書竹

翠幢之下或坐或立惟有一閒長年眼碧
杖底松風

疑立海上峰春潮夜來急笑聲落層崖誰
人和月拾

寄羽明居士

信宿金峰頂喜分半芋香荆溪一葦便拂
袖意蒼茫

草堂晝眠

飯罷松根一榻清
波濤萬頃屋頭聲
年來滄海扁舟志
起立千巖鳥碎鳴

夏夜露坐

星隨夕梵湧月爲殘經
留寒暑不到處松

幾七

+

根六月秋

掃徑

掃出綠雲徑送來銜日山
黃花紅葉際杖

笠道人閒

早參罷

明月入窻三尺雪
松風拂簾一天濤
夜來有客中庭立
不負高山折葦勞

大雄面壁巖夜坐將赴磬山請

愛此一牀月長年卧掩關
先師案欲了破

雪問家山

幾七

士

梅軒題柱

此君澹似我我冷此君知
風雨應嫌癖落花坐不移

贈豫章齊居士

解學死心禪世居山谷里
春風歸去來湘

江流不已

松濤

松濤堆裏來松濤堆裏住
北山松濤濶南山松濤聚
聚境濶勞亦濶境聚閒亦聚
不緣恩未酬誰肯舍此去

示衆

大士誕舟次下相

萬頃清風透碧紗
西來一筏濟人賒
同舟莫自拖泥水
放下空拳指指斜

歸草堂

幻影歸草堂如臨秋水碧
慈幃吾所依松

竹吾所宅蕉葉入欄櫳濃翠濕床席

芟松

愛山尤愛月芟竹亦芟松此夜西窓坐清
光到曉風

旅堂雜咏

老松一萬樹新竹百千竿題遍琅玕碧寒
濤枕上看

山居

無念常趺坐多閒時手書海棠開爛熳曳
履步庭除

雪齋歌

懷徐羣玉

世間少得休心客我學休心休未能何意
賢親有吾子雪齋遙對兩閒人

溪上吟

望見青山眼便開前生疑此坐禪來千巖

絕壁知題石拂蘚披雲榻取回

乙巳五月十有七日

未敢登山侍祖燈傍溪縛屋欲安僧大忘
身世人來此看取懸崖千丈冰

丙午題壁

情忘若草木志定素冰霜客悟芭蕉法叅
同絕較量

秉燭踏雪

愛雪尋廊步臨軒坐擁爐萬年冰畔客習
氣未全除

洗澗

庚七

十二

洗澗水深石出栽溪月冷風高兩堂聊蔽
風雨看取種竹栽桃

夜坐

山影界天碧燈光在竹末誰來千仞巖伴

我坐晨夕

千丈巖西窓即事

枕間懸瀑布凡上疊千山絕學忘機客耳
流齒石閒

對百合花懷延陵公

幾七

獨許空生親見聞滿前香色任縱橫人人
不昧翁真面父子依依亘古今

西方菴題壁

寤寐泉聲三十年今來到處聽潺湲居山
我不嫌風雨張蓋看雲布水懸

樵谿

樵出溪溪水坐平石石峰芒鞋徧四海應
念此山中

龍鬚禮祖

禮取龍鬚大徹堂祖翁面目絕遮藏人來

何處尋蹤跡庭滿六年枕上霜

既望夜叅後

滿堂明月光誰蹋太白霜坐客亦輕擲題
詩破夜香

有懷

淡紅淺碧八九樹江村茆屋兩三間草履
麻衣食接氣客到平分一味閑

新秋

新秋設藥石橄欖款羣賢苦澁眸雙烟坐
深月滿筵

仰止閣題壁

卧聽松風起啜茗粥短歌鼓腹庶幾知足
辛亥重九後一日示相隨諸子兼懷

下常住是年山邑饑

登高三日雨夜來誰有詩兩堂木石侶東

篋歌紫芝

荒園

翠竹兩竿梅一樹
梅開竹孕鳥懷春
荒園曳杖日無事
揀點生生此性情

雄峰有懷

千峰深處三間屋
石壁誰人先養松
半竿平分慰饑渴
十年雪卧放疎慵

無能

我是無能者人知
我不能海天容浩蕩
離落任紛更莊笑蠻
和觸諧稱鯤化鵬綱
宗絲九鼎若箇振家聲

藝粥

肺腸久與君相洽
一旦相逢似故人
正脉危微識法懼
他年帶篋與君親

佛事

卷七

十四

在明禪人火

生也不道死也不道咄哉古人未明向上
一竅報恩則不然在明老衲昨日死今日
擡來對衆燒

亡僧起龕

昔日七賢女游屍臨林一女指屍曰屍在
者裏人向甚麼處去一女曰作麼作麼諸
姊諦觀各各契悟師倚杖云者一隊死了
孃好與一爐燒却靈利衲僧別有轉身一
路舉杖指云髑髏蹣跚跳上三十三天東海
鯉魚打一棒兩似盆傾

卷七

十五

悼八十三默真老衲

汝年頗不少汝死頗安好如何連夕來我
心痛徹曉念汝度凶荒屈指可過了不虞
麥甫黃倏爾音容杳苦樂未易空死生未

易妙未證虛空心重來明此道我哭有餘
哀宿有好懷抱

自覺尊火

尊崇頭一生擇木三遷勤
普爲衆臨寂撥置後事顯

持藥師名號數
日泊然坐脫

生知所止死知所歸豈無俊士於茲徘徊

咄哉行尊庶不虛爲出世之人

隱菴顯火

顯圓頭勤樸十年如一日
歲幾未來而圓蔬獨豐一

衆願之

隱菴顯老園頭十年爲衆荷鍤不休惟是
歸家一路幾番盤蹕門頭吾今助汝一炬

黃華白菜處處自繇

印潭入塔

即此物非他物取不得捨不得青山以爲
宅

莫無障開闍黎

一靈皮袋皮袋一靈即此皮袋無障真身
杯茶盃飯聊盡衆心嗚呼尚饗

莫志一遠侍者

老成衣鉢

行達行達汝解四大空我今爲汝說真空
灑茶傾三奠香爇一爐

洞如耆德火

性空三昧火自焚實相身今日是我洞如
老灑兄向火燄裏轉大灑輪令大地情與
無情俱證究竟堅固大定現前大衆異口
一音同誦首楞嚴王咒

莫雲標岫侍司

泥多佛大水長船高葉落歸根知己力來
年仔細發春條

峯侍司火

老成衣鉢

雲開峯侍司諦信真空理四大各有歸斯

人無去住無佛處作佛蓮華生確嘴

奠岸回老衲

者漢生亦如是死亦如是吾許汝如是與
汝一杯茶

嘯岳月監院掩龕

幾七

十六

荷衆廿年來歲繞數千指頗多素心人澹
永首肯爾掀眉絕衆緣清光滿大地師雙
手掩龕云多少死於句下不能入道的阿
師只作墻壁話會遂轉身設奠

月監院火

萬仞峰頭撒手時千華競放月明枝以炬
繞龕云東西南北瀉山火堪愛風顛胡亂
吹

奠寂菴洽子

漚雲吾久視來去汝無拘汝有利生願重

幾七

七

來讀舊書

奠月岸彼老衲

捷去捷來善終善始月岸彼老衲吾不弔
汝而慶汝纖纖雲淨夜光寒更莫遲疑落
二三拾得瀑華橋上笑絕塵千古髯無雙

爲南澗和尚火

香水湛然滿浴此無垢人吾兄徹始終火
裏洗箇澡

爲澹齋化主嚴土善上座火

嚴土土嚴寂善善寂萬善已圓善可嘉嘉
善告寂寂不寂再來重理舊絲綸嶺梅香
透千江雪

鎮知屋火

師秉炬云者火從汝十餘年真實心中流
出將來光天燭地去也遂投炬適大雨師

歸方丈問衆雨從何來一僧云大家一身
濕師云是何言歟復云新遷化上座爲汝
等說乾曝曝禪也不知

量空寬都監火

師舉炬云盡大地是寬上座一隻眼寬上
座面前觸目菩提腦後圓光光萬丈山僧
更爲爾錦上鋪花便擲炬

智周足副寺火

足副寺生如幻死如幻發心如幻出塵如
幻辨道如幻進業如幻甘澹泊如幻忘勤
勞如幻始終一德至死不變如幻更有一
種如幻舉揚待汝重來秉炬云臨行助汝
般若燄照徹人間與天上

爲織造馬護灑火

舉炬云昔年相見無相見今日相違未始

違欲識馬公真面目火裏蓮開大十圍
雜著

東語西話

開了兩片皮只是嚼飯罐當世有與麼人
山僧禮他三拜

顛仙謠

憎愛胸中盡是非眼底空泥牛入海後聚
散問溫風

書瀉山語

行脚高士須向聲色裡睡眠聲色裡坐卧
始得山谷云東坡文字語言歷劫贊揚有
不能盡吾於瀉山亦云戊子春二日荆邱
書

題雪竇頌古

野鴨子知何許馬祖見來相共語話盡雲

山水月情依然不會還飛去却把住道道
須出雪竇真能於法自在匪夷所思如清
光匝地猶屏夜塘以盡所欲言而妙此却
把住道道以不完題而妙盡所欲言如千
雷並吼易不完題如千日並照難偶閱之
幾七
直欲擊碎唾壺

九

草堂書壁

日中一食樹下一宿世尊模範如是一語
不投折葦渡江少林九年終日面壁鼻祖
標格何如

荆山旅堂紀事

丁亥十一月朔著新絮襖飽領本菴香飯
飯餘展足熟睡皆行脚經年未曾有事睡
起一跌晚晴快人遺景在屋庭東大樹茂
綠未衰殊映日溢目忽憶十五年前得先

師烏峰竹齋瞌睡起書牕浣壁時復憶甲
戌秋先師遷吳興報恩是日結冬破屋敗
垣炊巾滿谷羣賢卧草眠霜水骨老人支
枯藤指點磚頭瓦礫爲諸人闡最上機示
時獨處江干野色無垠天光連水曾和老
人寄示偈云師關山頭宇吾撐水上門脚
全蹋實地眼獨空叢林小兒無繩尺曠蕩
之言不謂至今多人成誦昨便鴻南去拈
句寄重監院高歌天地外穩卧雪霜中他
日憶此更作何狀

書巖子紙

大雄道人廿年來炊水煮雪接納諸方能
三十夏不憚寒苦者敢保出他人一頭地
巖子能否
參禪悟難既悟已忘悟難且道忘悟的人

何如巖子道看

此事極平易極欺人等閒看得平易者此最受人欺者也戒之哉

多見人在殼漏子裡譚蓋天蓋地之道徒自欺耳蓋天蓋地者能把殼漏子作塗毒鼓搗

書楚紙

近年少至性衲子蓋稍有見處不能出頭天外全體受用多以名利熏心學文字語言還知但患不成佛不怕佛不解說法麼筆此覘子和尚卓立紙末

三師說

吾有三師父師母師師父師生我眼師師開我眼母師護我眼父師身示無常此生我眼者也師師了我生死此開我眼者

庚七

二十

也母師勗我證果此護我眼者也三師皆有大因緣使我悚然省豁然開惻然痛吾何修而得此三善知識師也噫吾於荆溪磬山開此眼於江上永關忘此眼於吳興草堂保此眼不知何年得真不負三師也

有客躡而問曰忘矣何用保爲曰此非汝所知也保矣更俟何年不負師曰此非汝所知也待汝證果地涅槃與汝共報難報之恩可也雖然父師母師出離之緣皆賴師師師乎師乎粉骨碎身未足酬將此身心奉塵刹潛子苦次草述時乙未九月戊戌

庚七

主

西樓聞雪

潛子早失太山之仰不獲徧任兩序列職壬辰夏報恩乏住持供先老人方丈重歸

侍室首修殿公務攝客司諸禪極不安潛
子有餘樂也向志夙夜守塔每爲事奪適
寓監院寮後軒篝燈正當寶峰塔下漏下
三寸刻聞雪起立不禁清絕向於磬山有
生平微幸處千古快心時之句此際是第
二番境界時壬辰十一月癸巳手書所用
破硯猶是二十年前記室舊物并記

報恩旅堂閒書

近日學者有二病一等弄聰明習外學一
等守愚抱拙般若不清楚二者皆不可與
言道不識一丁者必如六祖方可不撥文
字者必須遠同西天龍樹馬鳴近同永明
明教始得無過

題壁

本學古人莫視流俗閱趙州語錄自勵

跋趙州三佛話

金佛不度爐木佛不度火泥佛不度水真
佛內裏坐南嶽磨磚江西鹽醬不是過也
又云非四十年不雜用心者不知斯言簡
盡

題藥師日課語

予辭恩絕塵不暇披覽偶入藏閱藥師如
來本願功德不覺手額失聲願人人入如
來願海也或問何於此經驚歎如是告之
曰予見世人順境淪溺者不一富貴可畏
甚于貧賤今此如來使人所求如願遂從
此永不退道直至菩提則欲於王臣長者
一切人中作同事攝不乘如來願航何從
濟乎大凡修持須量已量法直心直行誠
能厭惡三昧堅志往生則專依阿彌陀經

收攝六根淨念相繼所謂執持名號一心不亂決定往生此先自利而後利人者之所謂也若於現前富貴功名未能忘情男女飲食之欲未知深厭則往生法門未易深信即信矣身修淨土而心戀娑婆果何

卷七

二十二

益乎則求其不離欲鉤而成佛智處於順境不致淪胥者固無如修持藥師願海者之殊勝難思也癸巳之夏山居不寧偶奉親歸養江上晏如程君以刻成藥師日課見示此出人意表是經流傳已久編成日課未之聞也乃得之吾江之善士爲之助喜信能修持久久不懈知不獨富貴功名轉女成男離危迫吉如如意珠隨願成就即得於一切成就處直至菩提永無退轉何幸如之人間亦有揚州鶴但泛如來功

卷七

三

德船

錄餘杭道中詩

舉目千矛刺淚流若爲問路白雲頭大人君子今何在長歎一聲天地秋餘杭道中不知誰書此詩於壁題曰行脚紀事非目擊其中人者不知此詩之悲也

書禹門先師翁詩後

五峰雲頂古文殊盡日跏趺總笑余半點苦寒禁不得躊躇未了又躊躇此禹門師翁臺山下居詩也師翁證處穩密超脫故微言澹語中煞有吼意秀生也晚何幸目聽洪音

跋古德語

諸佛未出世人人鼻孔撩天出世後爲甚麼杳無消息三十棒打雪竇斯言函以

下玉綴以隋珠供於百寶浮屠之上當夜
夜放千道奇光光中時現二龍發大音聲
金聲玉振千佛萬祖于其音中示生音中
涅槃已丑中秋日手記

跋大慧頌古

相體裁衣量水打碓毫髮不差且居門外
昨夜三更月到牕話後人逐塊亂頌無論
蹉過南泉趙州還曾夢見大慧乎兩牕偶
書

書月祖偈

自笑當年畫模則幾番紅了幾番黑如今
謝主老還鄉那管生平得未得今人輕易
敢稱笑巖後裔余略舉此偈示之請莫造
次

船子菴雜記

中秋前後卧鋤雲堂泉聲山色爭勝月出
當門日亦如之旦夕令人應接不暇數日
來倦忘寢饑忘食病廢藥終夜大啟戶牖
以納之早則堅卧不起金峰僧走候謂之
曰爲我寄語重維那道人近得二入室弟
子清超絕倫僧曰二子爲誰曰皆受馬簸
箕記前來日面佛月面佛僧擬議筆以付
之曰可并示峰書狀

潛子傳贊

潛子不知何如人自得法先磬山力以大
法爲已任嗣住報恩數載雖百廢並舉未
嘗一事營心數千指日環擁叅請未嘗有
一元字脚與人其許入室者愈臻玄奧愈
夷然自失久追隨者多忘身爲道高年碩
德之侶主法不讓人情時有以認昭昭靈

靈爲得本以識神空爲末後無疑者明辯
其爲狼跋其胡載鼈其尾復有死於棒下
以心如牆壁爲明道眼等者直斥其爲將
成九仞之山未進一簣之土皆苦其盲引
衆盲非好辯也人不知而不愠其志潛值

奧七

圭

世危亂其時潛布袋和尚贈以偈曰一鉢
千家飯孤身萬里遊青目睹人少問路白
雲頭其行潛遂稱潛子贊曰 汝何人斯
其三代之直歟抑乘願而來續垂絕之脈
者歟人徒描汝之形像汝只瞠目而熟視
其潛子歟

書先賢偈

十方同聚會箇箇學無爲此是選佛場心
空及第歸禪人看公案多不透脫爲書此
偈若曰此老僧之常談吾末如之何也已

書示月庭適

江國春風吹不起鷓鴣啼在深林裏乳峰
老人三十二相八十種好見此老一光者
百千諸佛同時現前透此老一言勝透一
大藏教吐山僧未免向佛頭上淋漓墨汁

書屏

栢樹子幾時成佛虛空落地時成佛虛空
幾時落地栢樹子成佛時落地善財叅後
誰相訪樓閣門開竟日閒

跋保寧勇禪師頌古

煉得通紅打一鎚週遭無數火星飛十成
好箇金剛鑽攤向門前賣與誰夜坐偶憶
此頌不惟枯木頭陀通身毛孔皆笑直教
大地山河草木昆蟲悉皆起舞

偶言

東坡云醉時是醒時語吾於今之言未生
前者亦云

跋古

成株大樹蓋覆天下人去汝師黃檗非干
我事引者風顛漢叅堂去百丈云一句子

幾七

主六

百味具足知言哉

大覺普濟能仁玉琳琇國師語錄卷第七

音釋

聞

苦臭切傾入
聲寂靜也

邗

河干切音
寒地名

萃

秦醉切
音萃

櫛

移廉切音
炎步廊

幾七

二十六

勅封大覺普濟能仁國師塔銘

洪惟

世祖皇帝聖德顯道彰于遐邇深仁厚澤洽于幽明妙智圓通與如來心印爲一嘗命訪僧伽之行解圓證者與論向上宗旨於

特之

二十七

時有大禪師奉

詔入京曰玉琳琇公蓋天隱磬山之子而臨濟三十一世孫也師諱通琇號玉琳常州江陰人族姓楊氏父芳母繆氏皆與般若有大因緣師之生也母夢大士携童子自牖入寤而生師墮地敏悟夙成能語輒誦佛號坐常跏趺十五閱語錄叅誰字疑情大發寢食俱廢晝夜徬徨室中因觸翻溺器有省遂蟬蛻萬緣決意究竟大事時磬山修禪師方弘化

荆溪爐鞴正赤師直造其席依止受具戒爲侍者進則決疑請益立雪不移退則宴默凝神危坐達旦必欲見道乃已一日于一口吸盡西江水下瞥見馬祖用處不覺身心慶快曰佛法落吾手矣自此遇勘辨發語縱橫自如當機不讓無何辭歸省母磬山密囑徵信曰善自護持勿輕洩也師既歸江陰益韜晦日放曠雲水間偶乘月泛小舟舉頭頓忘迷悟如虛空玲瓏不可湊泊急就證天隱於武康之報恩叩擊之次迎刃不留至掀案而出隱知其透關歎曰此吾宗獅子兒也隱示寂遺命令師主法席師不從避之凌霄峰絕頂時天龍業已推出雖欲埋名煙壑而衆莫之許師不得

已起應之開法筵之日黑白環遶者萬
指莫不露被化雨隨根沃潤而去丙戌
過大雄樂其山川幽寂就荒煙蔓草葺
茆爲屋有終焉之志然聲光外流逐羶
者益衆期年復成叢席是時天童方唱
幾七
道東南其機鋒迅利諸方無能抗者惟
二十八
師以法門猶子後先角立應機接物如
疾雷破山龍泉出匣非眞實證悟者不
能窺其縱奪之妙以故年甚少出世最
早而握機行令卷舒自由聞者莫不欽

服焉

順治戊戌

世祖皇帝聞師名遣使

詔師已亥春師應

詔赴闕見

上於外朝慰勞優渥即

命近侍送居萬善殿不時臨訪道要一日問
如何用工師曰端拱無爲又問如何是
大師云光被四表格於上下又問孔顏
樂處師云憂心悄悄

皇清大悅

命近侍傳語恨相見之晚焉

特賜號曰大覺禪師名香法衣之錫殆無虛

日尋以母未葬懇乞還山

詔許之出內府金錢助之襄事師受賜歸

幾七

二十九

以十九飯僧放生而以其一助營塔費
凡畚土運石一一皆身自爲之庚子秋
復

詔至京禮遇尤渥進號大覺普濟能仁國
師至臘月世尊成道日

命於京師阜城門外慈壽寺爲千五百僧說

菩薩大戒又

命作工夫說刊行之次年

世祖皇帝升遐師領大弟子作佛事七晝夜

畢辭還山

欽命遣官護送其寵榮稠疊近代無與同者

師雖遭際昌辰然性恬于榮利無毫髮

矜重意既歸如野鶴孤雲無所留礙會

於潛天目師子正宗禪寺歲久隳廢郡

人順天少京兆姑瞻戴君謂非師無以

舉揚宗風光輝祖席率衆延師居之遠

邇學徒聞風奔赴堂庑殆不能容於頽

垣敗壁中一彈指間金輝碧明樓殿上

揮雲際而未嘗見其有所作爲善權之

請師雖勉強一赴然旋思歸老舊林亦

未嘗久留也天性至孝十二歲即喪父

得法後別構草堂于報恩之側奉母居

之躬進飲饌母歿斷食禪定者七日行

道不離殯次者三年先是師之父振陵

翁與受雲栖大戒深味禪悅臨終染衣

自度謂師兄弟不讀書即當出家母氏

亦受磬山記薊晚年離俗依師得悟世

號大慈老人蓋非積慶之家不能生此

大士而師具全戒孝友陳睦州大慧杲

之風豈非契經所謂五因緣中真友者

耶晚年慈心益切不憚跋涉之勞意將

窮搜泉石接引縛禪物外而不與塵世

接者嘗歎曰趙州八十行脚彼何人哉

乙卯春遂屏給侍飄然常往因觸熱渡

江止於淮安清江浦之慈雲庵索浴跌

坐說偈而逝時康熙乙卯八月十日也
壽六十有二臘四十三弟子奉龕歸天
目全身塔於東塢菴之後隴師凡六坐
道場七會說法解結發覆妙具善巧雖
沉迷重障一遭鉗鏈胃索無不斷絕焦
芽小草一蒙溉灌身心無不光潤得法
弟子二十餘人皆能傳燈續命接席分
輝者也師廣額豐頤平頂大耳面白玉
色目光炯炯射人宴坐如臨大眾故見
者不威而攝一生不蓄私財即纖細供
養亦不輕受嘗過青縣有苦行僧負斗
麴設供隨舟行者數日師憐其誠爲說
法要即揮之使去終不納也每檀施至
輒教以持歸放贖生命同於攝受雖膺
紫衣之寵而服用不及恒僧既悟逸格

幾七

三十一

之禪復教人兼修淨業五會弟子從師
持藥師琉璃光如來名號得度者至不
可算數皆謂師從彼世界應化來此方
云余昔從

內廷間立法席之後親覩師據獅子座舉明
正法發轟雷掣電之機雖老叅宿學罔
知所措既而閉關習靜龍象萃處一室
而戶外不聞人聲至於廣廈細旃從容
詔對語巧意圓窮極實際能助

九重增長法喜一時貴近無不函香問道師
於弘法外不發一言其善慧深厚如此
是以縑素四衆罔不傾心馴至名德上
聞于

天寵被鴻名

龍光赫奕則師豈非乘風世願輪隨助

聖人敷揚大化者乎謂之優曇鉢花千年一

現良不誣也銘曰

西來妙旨 五燈分繼 震動鏗鐃

厥惟臨濟 國師嗣法 三十一傳

金輪御曆 佛日中天 兜率親升

演說般若 光燭大千 聲施九野

應機而出 乘願以來 心光內發

樓閣門開 西江一吸 劈面全體

布袋打失 凡情盡死 扁舟夜汎

水月明融 直入無見 爍破虛空

六坐道場 大施正令 凡聖皈依

天龍恭敬 顯號榮名 自

天之祐 開士何心 白雲出岫

天目高峰 上摩穹碧 師錫振飛

祖庭生色 寶臺珠網 彈指立成

卷七

二十二

隨順世間 何經何營 遽廬終宿

曳杖江口 起滅空幻 我尚不有

坐脫淮上 遊戲自如 死生者誰

隱現在吾 六十二年 悄然無事

居士勒銘 僅有半字

康熙乙丑仲夏

賜進士出身光祿大夫禮部尚書保和殿大

學士加三級宛平王熙薰沐拜撰